


NGANONG MITUAW KA? ISULTI!

 Panalanginan ka sa Ginoo! Magpabilin lang kita sa pagtindog sa kadali, samtang atong ginaduko ang atong mga ulo. Aduna ba’y espesyal nga paghangyo? Kung buot man ninyo, ipahibalo kini diha sa inyong pagpataas sa inyong mga kamot ngadto sa Dios ug moingon, pinaagi niana, “Ginoo, nasayod Ka sa akong gikinahanglan.”

² Langitnong Amahan, kami gayu’y mga usa—usa ka mabibilihiyong mga tawo karong buntaga, nga magkatigum sa balay sa Dios, sa dihang kabalo kami nga daghan kaayo ang gustong moanhi sa balay sa Dios karong buntaga, ug nga anaa sa mga ospital ug sa mga higdaanan sa balatian. Ug gihatagan Mo kami niining prebilibiyong maania dinhi karong adlaw. Ug wala gayud kami nanganhi, Ginoo, aron nga makita sa usa’g usa, bisan nga gusto namo ang pagpakigkauban sa usa’g usa; apan mahimo man namo kana buhaton sa among mga panimalay. Apan nanganhi kami aron sa pagpakigkauban Kaniya Nga naghiusa kanamo ingon nga mga pinangga nga mga anak ug mga kaigsoonan.

³ Amo Kang ginapasalamatan karon. Ug ang paagi lamang nga among nahibaloan sa hustong pagpakigkauban Kanimo mao ang pagpakigkauban alirong sa Imong Pulong. Ang Imong Pulong mao ang Kamatuoran. Nagakatigum kami dinhi alang sa espirituhanong kusog. Kinahanglan namo kini, Ginoo. Kinahanglan nga aduna kami kusog aron makalahutay sa mga krus nga among ginapas-an. Ug nagaampo kami nga Imong ipadala ang gamhanan nga Balaang Espiritu karon, ug nga ligoan kaming tanan. Itugot ang mga pagpangamuyo sa Imong katawhan samtang nagkatigum sila ug nagpataas sa ilang mga kamot nganha Kanimo, nga aduna sila’y mga panginahanglanon sa ingon—anang mga butang. Tubaga ang matag-usa, Ginoo.

⁴ Nagapasalamat kami Kanimo tungod sa pagluwas Mo sa kinabuhi sa among babayeng Igsoon nga si Ungren kagabii, diha sa aksidente sa dalan paingon dinhi. Maloloy-on Ka ngadto kanila, Ginoo, ug ginapasalamatan Ka namo tungod niana. Ug nagaampo kami karon, Langitnong Amahan, nga padayon Ka nga magauban kanamo ug tabangan kami samtang padayon kaming nagapanaw, ang matag-usa kanamo. Ihatag kanamo ang Imong masuportahong gahum ug ang—ang pagtoo sa paghibalo nga ang Imong walay-pagkapakyas nga Presensiya magauban kanamo. Sa nianang takna kon diin nga dili na namo mahimong tabangan ang among kaugalingon, mahibalo kami, “nga ang mga Manulonda sa Dios nagapahaluna palibot ngadto kanila nga may kahadlok Kaniya, ug pagasapnayon kami Nila aron nga dili mahapangdol ang among tiil sa bato.” Ug nagaampo kami karon

nga igahatag Mo kanamo ang Imong mga panalangin alang sa Pulong, ug magasulti pinaagi kanamo, ug sa kinasuloran namo, sa Ngalan ni Jesus Cristo. Amen.

⁵ Mapasalamaton ako nga ang sidlak sa adlaw sa gawas, ang adlaw, nagasidlak. Dili gayud maayo ang panahon kaganinang buntag. Ug siguro, ilabina na, niining kalungSORAN, aduna kita’y madag-umon kaayo, makalaay nga panahon. Ug ang makitang nagasidlak ang adlaw, nga nagasubang, pagkamaanindot niini.

⁶ Sa gamay’ng pagtipon-tipon sa among pamilya karong adlaw, mahimamat ko ang akong igsoong lalaki, ug nga atua sila karon sa balay sa akong igsoong babaye, ug uban pa sa among mga paryente sa tibuok siyudad ug sa palibot niini. Usa ka daku nga pundok ang mga Branham. Kung manganhi silang tanan gikan sa Kentucky, dinhi, siguro kinahanglan na namong abangan ang tibuok siyudad; pagkadaghan gayud kanila. Apan usa lang kini ka gamay’ng pagtipon-tipon. Didto kami tanan sa una nagatipon-tipon sa balay ni mama, ug siya niadto ang karaang haliging-hikutanan nga nagabugkos kanamong tanan kaniadto, nga mora’g ingon-niana. Apan gikuha na sa Dios ang maong haliging-hikutanan paingon sa Langit, ug nagalaum ako magkitaay kaming tanan didto sa umalabot nga adlaw.

⁷ Ug karon nagsulti ako niadtong usa ka adlaw, miingon ko, “Kahibalo mo, siguro ako nang—ako nang mub-an ang pang-Dominggo ko nga mensahe ngadto sa mga baynte minutos, ug—ug, o traynta, ug dayon mag-ampo na alang sa mga masakiton.” Ug nahunahuna ko kana kaganinang buntag.

⁸ Ug nahunahunaan ko kagabii, sa gitawgan ako ni Igsoong babayeng Downing ug giingon nga, gitawgan si Billy ug nag-ingon nga padulong na siya ug si Igsoong babayeng Ungren, nadigyas diha sa dalan ug nabangga. Ug samtang atua pa si Billy sa bintana, sa mga, wala ko kahibalo kung unsang mga orasa kadto; tingali kaganinang buntag, mga ingon nianang orasa. Nakatulog ako sa makadiyut. Milantaw ako didto sa ila ni Igsoong Wood, palung na ang ilang mga suga. Ug miluhod na lang ako sa pag-ampo, ug sa pag-ampo ko, Aduna gayud miingon kanako, “Okey na ang tanan.” Busa giingnan ko dayon si Billy, “Sultihi siya, ‘Sa tanan,’ nga sa hunahuna ko, ‘okey na ang tanan.’” Malipayon gayud ako nga makita sila niining buntaga, ug nanaglingkod sa sulod sa balay sa Ginoo, dinhi balik human niadtong panghitabo sa dalan.

⁹ Mga tawong ingon niana ka daku ang paghigugma kanimo, nga mobiyahe sa mga ginatus ka milya sa pag-anhi aron maminaw sa Maayong Balita, dayon napamalandong ko, “Ang baynte minutos nga mensahe, ug sa ingon ko ka hinay, dili kini igo.” Busa nahunahunaan ko nga ako lang. . . nga ingon niana ka dugay.

¹⁰ Gani dayon, nadungog ko si Igsoong Ungren, ang iyang anak nga lalaki, kaganinang buntag, nga nagakanta sa, “How Great Thou Art.” Nahimo Siyang. . . Mas makahuloganon Siya kaniya karong buntaga kay sa kagahapon sa hapon, tungod kay giluwis sa gamhanang Dios sa Langit ang iyang bilihong, pinangga nga inahan ug igsoong babaye.

¹¹ Karong, adlawa, nagapaabot kita sa usa ka dakung panahon diha sa Ginoo. Ug aduna ako’y duha o tulo ka nagkalainlaining mga teksto dinhi nga akong ginatan-aw kaganina, ug dili ko, dili mahibaloan kung hain sa usa ang pagahisgotan ko niining buntaga. Ang usa niini mao’y, “Itugyan ngadto Kaniya ang inyong mga kabalaka, kay Siya may kahingawa alang kaninyo. Karon, kung nagakahingawa man Siya, nganong dili man ikaw?”

¹² Dayon ang usa pa, si Billy Paul, o dili si Billy Paul. . . Ang usa ko pa ka bata nga lalaki, si Joseph, ang nagdala niining teksto kanako dugay na. Naglingkod siya sulod sa usa ka kuwarto usa niadto ka adlaw, ug miingon siya, nga nakahangad ngadto sa usa ka litrato, ug si Billy. . . O, si Joseph mahiligon kaayo sa mga baroto, sama sa gagmay’ng mga bata; sa mga baroto ug sa mga kabayo, kahibalo na mo. Ug miingon siya kanako, “Daddy, aduna ba’y baroto si Jesus?”

Ug ingon ko, “Wala ko kahibalo.”

¹³ Busa nga human siyang mitindog ug migawas, nahunahunaan ko, “Aduna ba kaha Siya’y baroto?” Ug mikuha ako og usa ka teksto gikan niana, ug gisulat ko lang kini dinhi sa akong libro, “Aduna ba kaha og baroto si Jesus?” Ug akong napamalandongan. Sa ania pa Siya dinhi sa yuta, gikinahanglan Niya nga manghulam og usa ka tagoangkan aron diha ipanganak, usa ka lubnganan aron diha igalubong, usa ka baroto nga didto magawali, apan Siya ang Piloto sa maong karaang baroto sa Sion. Siguradong, mao gayud ang gihimo Niya. Apan, ug kadtong mga teksto nga gipamalandongan ko, sa hunahuna ko nga tingali makuha ko ang mga niini ayha na, sa dili pa kami mangbiya sa pagpauli.

¹⁴ Kahibalo mo, gusto kong mowali gikan sa tabernakulo dinhi, tungod kay ato kining kaugalingong simbahan. Mabati nato ang kagawasan aron isulti ang bisan unsa man nga isulti sa Balaang Espiritu. Sa ubang mga lugar, bisan pa nga gusto sa tawo nga maabiabi ka, medyo mabati mo ang gamay’ng pagpugong tungod nga—nga anaa ka sa iyaha-sa-uban nga simbahan, ug gusto mong magmaigong matinahuron diha sa pagtahud sa ilang—ilang mga panghunahuna ug sa ilang doktrina.

¹⁵ Nagkaaduna ako og maanindot nga panahon niining semanaha didto sa lugar ni Igsoong Burcham. Ug misulod ako didto sa gam-anan kon diin didto nila ginahimo ang keso. Makita ko siya ug ang iyang asawa, ang anak niyang lalaki ug sila, nga

ania karon niining buntaga. Ug nagdahum ako sa una pa nga ang usa ka gam-anan sa keso mahimong sama sa ubang lugar nga naadtoan ko na, oh, nga medyo mabasábasá ug mahugaw. Sus, usa lang ka butang ang masulti ko, makasigurado ka gayud nga dili mahugaw kanang lugara. Mao na kadto ang pinakamalimpyong dapit nga ako gayud naadtoan, ug nga ilabina sa usa ka gam-anan. Ug wala ko gidahum; abi ko, oh, nga nagahimo sila tingali og tulo ka gatus ka libra sa mga keso kada adlaw. Ug ang ginahimo nila unom ka tonelada kada adlaw, ug tulo ka gam-anan ang nagaandar. Hunahuna ko, “Oh, sus, kinsa kaha ang nagapangaon sa tanan nianang mga keso?”

¹⁶ Apan gipanalanginan sa Ginoo kining tawhana. Nagkaaduna ko’y pribilihiyo nga nakaadto sa iyang panimalay, usa ka hiligugmaon kaayong panimalay, usa ka asawa nga matinud-anon. Ug walay rason nganong dili gyud sila magkinabuhi alang kang Cristo sa matag adlaw, sama sa ilang pagkinabuhi. Nahinabi ko ang iyang mga bata nga lalaki, ug pagkabuutan nila nga mga bata. Mapasalamaton kita kaayo tungod niining pagpakigkauban nga aduna kita sa usa’g usa.

¹⁷ Nasayran ko nga ang ilang pastor kanhi usa—usa ka lalaking kaila ko, si Igsoong Gurley, usa ka buutan kaayong lalaki sa United Pentecostal nga pagtoo, nga akong nahibalag sa mga katuigan na nga nangagi, sa Jonesboro, Arkansas. Ug wala ko kahibalo nga sila’y . . . siya niadto ang iyang pastor, diay.

¹⁸ Karon inumudumi ninyo ang panerbisyo unyang gabii. Ug dayon, kon itugot sa Ginoo, nagalaum kami nga makawali sa sunod Domingo pag-usab. Ug dayon siguro sa sunod niana nga Domingo kinahanglan kong moadto sa Chicago. Dayon mawala ako sa kadali, gikinahanglan kong dalhon pauli ang akong pamilya, balik, o balik sa Arizona aron nga sila, ang mga bata, makapa-enroll sa eskwelahan pag-usab. Ug dayon mahunong na ang among pagpangsamok sa pastor, sa pagpangilog sa iyang buluhaton.

¹⁹ Busa, nga mapasalamaton kami kaayo kang Igsoong Neville sa iyang kamaabiabihon, kahibalo na mo, sa—sa pag-imbita kanako. Ug siya gayud, dili . . . gusto ko, ang igsoon, ang tawo nga sama niana, kon diin nga walay limbong, walay pagkahakog, tinuod lang gayud nga pagka-Cristohanon. Gusto ko kana.

²⁰ Karon magabasa kita og pipila ka Kasulatan ug dayon mohatag ta og mga komento. Ug wala ko kahibalo kung unsang orasa gayud kita makahuman, sa niining tag-as nga mga Mensahe, apan hunahuna ko . . . Naghisgot ako niadtong usa ka adlaw mahitungod niining mga tinag-as nga pagpanghisgot, ug adunay miingon, “Bueno, karon, kung ikaw—kung mosulti ka man lang sa pipila ka minuto; ug medyo mosulti ka diha sa mga misteryo, pa gayud,” ingon, “kami—dili gayud kami makasabot niini.” Ingon pa, “Padayon lang pagsulti, ug taudtaod

mapahayag ra gayud kini,” ingon niya. Busa tingali gusto kanato sa Ginoo nga buhaton kini sa ingon niana nga paagi.

Mangduko kita pag-usab.

²¹ Ginoo, ang Imong Pulong nakapahimutang na nga abli ibabaw sa pulpito, ug nasayod ko nga sa umalabot nga adlaw igasarado na Kini sa kaulahian Niyang kahigayonan, dayon ang maong Pulong mamahimo nang unod. Ug kung ingon-ana kami—mapasalamaton kami alang niining kahigayonan karong buntaga. Ug ablihi kanamo, pinaagi sa Imong Balaang Espiritu, ang mga sulod niini nga Pulong nga among pagabasahon. Hinaut nga igatudlo kanamo sa Balaang Espiritu karong adlaw ang mga butang nga among angay’ng mahibaloan. Ug hinaut nga kami dayon, agi’g balus, patalinghugan og maayo ang matag Pulong, timbang-timbangon Kini og maayo. Ug dayon hinaut nga kadtong mga nagapaminaw pinaagi sa teyp, hinaut nga maminaw sila og maayo. Ug hinaut nga makuha namo kung unsa ang ginapaninguhaan sa Balaang Espiritu nga ipadayag nganhi kanamo. Kay naamgo namo, nga kung Iya man kaming pagadihogan, nan dili sa walay kapuslanan ang maong pagdihog. Alang kini sa usa ka katuyoan, nga mahimong mamuhat kini ngadto sa kaayohan, para sa Ginoo. Ug hinaut nga abli ang among mga kasingkasing ug pagpanabot, Ginoo.

²² Hinaut nga aduna kami kagawasan sa pagsulti, ug kagawasan sa pagpaminaw, ug dalan paingon ngadto sa pagtoo, aron tohan kung unsa ang among mapatalinghugan, maingon nga kini nagagikan sa Pulong sa Dios; nga mahimong motagana kini kanamo, og Kinabuhing Walay Katapusan, sa maong dakung Adlaw nga umalabot. Panalangini kami karong adlaw. Kondenaha kami sa diha nga sayup kami. Ipahibalo kanamo ang mga kasaypanan nga aduna kanamo. Ug panalangini kami sa maong dalanon nga matarung, aron mahisayran namo kung hain nga dalan ang angay namong pagaagihan, ug unsaon ang pagpanglihok sa niining kalibutan karon; aron makahatud kami og kadunganan, diha sa among pagkinabuhi dinhi, ngadto kang Jesus Cristo, Nga namatay aron hatagan kami og Kinabuhi diha sa mahinungdanong laing kinabuhi. Among ginapangamuyo kini sa Ngalan ni Jesus. Amen.

²³ Karon gusto kong mobasa og duha lang ka bahin gikan sa Kasulatan, karong buntaga. Ug ang usa kanila makita diha sa Basahon sa Exodo. Sa tinuod, pareho silang gikan sa Basahon sa Exodo. Ang usa, sa ika-13 nga kapitulo, ug ika-21 ug ika-22 nga bersekulo. Ug ang sunod nga usa mao ang ika-14 nga kapitulo, sa ika-10, ika-11 ug ika-12 nga mga bersekulo. Karon magabasa ako gikan sa Exodo 13:21.

Ug ang GINOO milakaw nga nag-una kanila sa adlaw pinaagi sa usa ka haligi nga panganod, aron sa pagmando kanila sa dalan; ug sa kagabhion...sa usa

ka panganod nga kalayo, sa pag-iwag kanila; aron sila makalakaw sa adlaw ug sa gabii:

Wala Niya gibulag ang mao nga haligi nga panganod sa adlaw, ni ang panganod man nga kalayo sa gabii, sa pag-una sa katawohan.

- 24 Karon diha sa Exodo 14, ug sa ika-10 nga bersekulo.

Ug sa paghiduol ni Faraon, ang mga anak sa Israel nanagyahat sa ilang mga mata, ug, ania karon, ang mga Egiptohanon nanagsunod kanila; ug nangahadlok sila pag-ayo: ug nanagtuaw ang mga anak sa Israel sa GINOO.

Ug dayon miingon...si Moises, Tungod kay... (pasayloa ko ninyo)

Ug miingon sila ngadto kang Moises, Tungod ba kay walay mga lubnganan sa Egipto, mao nga gikuha mo kami aron nga mangamatay kami sa kamingawan? ngano ba nga nagbuhat ka sa ingon niini kanamo, nga gikuha mo kami sa Egipto?

Dili ba kini mao nga ginasulti namo kanimo sa Egipto, nga nagaingon, Pasagdi lamang kami, nga magaalagad sa mga Egiptohanon? Kay labing maayo pa kanamo ang pag-alagad sa mga Egiptohanon, kay sa mangamatay kami sa kamingawan.

- 25 Basahon ko ang pipila ka dugang pa nga mga bersekulo.

Ug si Moises miingon sa katawohan, ayaw Kahadlok... .

Karon paminaw dinhi og maayo.

...si Moises miingon sa katawohan, ayaw Kahadlok, dili kamo maglihok, ug tan-awa ninyo ang kaluwasan sa GINOO, nga iyang pagabuhaton...karon kaninyo: kay ang mga Egiptohanon nga inyong hikit-an karon, dili na ninyo hikit-an hangtud sa kahangturan.

Ang GINOO makig-away alang kaninyo, ug maghilum kamo...ang GINOO miingon kang Moises, Ngano ba nga nagatuaw ikaw kanako? ingna ngadto ang mga anak sa Israel, nga magapadayon sila:

Ug bakyawon mo ang imong sungkod, ug ituy-od mo ang imong kamot sa ibabaw sa dagat, ug iwayon mo kini: ug magasulod ang mga anak sa Israel sa taliwala sa dagat sa yuta nga mamala.

Ug Ako, ania karon, Akong pagagahion ang kasingkasing sa mga Egiptohanon, nga sila moapas kanila: ug Ako pagahimayaon ni Faraon, ug sa tibook niya nga kasundalohan, ug sa iyang mga carro, ug sa iyang mga magkakabayo.

Ug manghibalo ang mga Egiptohanon nga Ako mao ang GINOO, sa pagahimayaon Ako ni Faraon, ug sa iyang mga carro, ug sa iyang mga magkakabayo.

Ug ang manolunda sa Dios, nga nagalakaw sa atubangan sa campo sa Israel, mibalhin gikan sa ilang atubangan ug miadto sa ilang likod; ug ang haligi nga panganod mibalhin . . . gikan sa ilang atubangan, ug napahamutang sa ilang likod:

Ug kini nahimong anaa na sa tunga-tunga sa campo sa mga Egiptohanon ug sa Israel; . . . didto miadto ang dag-um ug ang kangitngit, apan naghayag sa Israel sa kagabhion: ug ang usa wala moduol sa usa ka tibook nga gabii.

Ug gituy-od ni Moises ang iyang kamot sa ibabaw sa dagat; ug gibuhat sa GINOO ang pagpaiway sa dagat pinaagi sa kakusog sa hangin sa sidlakan sa tibook niadtong gabhiona, ug nahimo ang dagat nga yutang mamala, ug ang mga tubig nabahin.

Ug ang mga anak sa Israel misulod sa taliwala sa dagat sa yutang mamala: ug nangahimo ang mga tubig nga ingon sa paril sa ilang too, ug sa ilang wala.

Ug ming-apas kanila ang mga Egiptohanon, ug misunod kanila sa ulahi hangtud sa taliwala sa dagat, ang tanan nga mga kabayo ni Faraon, ang iyang mga carro, ug ang iyang mga magkakabayo.

Ug nahatabo, sa pagbantay sa kabuntagon nga gitan-aw sa GINOO sa ubos ang dapit nga hingmutangan sa mga Egiptohanon pinaagi sa haligi nga kalayo ug . . . sa panganod, ug gigubot niya ang dapit nga hingmutangan sa mga Egiptohanon,

Ug iyang gikuha palayo ang mga ligid sa ilang mga carro, ug kini gipanglintuwad nila sa hilabihan gayud: unya ang mga Egiptohanon miingon, Mangalagiw kita gikan sa atubangan sa Israel; kay ang GINOO nagapakig-away alang kanila ug batok sa mga Egiptohanon.

²⁶ Halangdon kaayo ang Pulong sa Ginoo, maayo kaayo, wala gyu'y paagi aron hunongon ang pagbasa Niini. Tinuod nga nagakahimong Kinabuhì Kini, samtang ato Kining ginabasa. Siguro, sa niining teksto karong buntaga, bisan nga ginat-eyp kini, gusto kong isulti kini sa pagsugod, nakaplagan kini, nakaplagan ko ang akong kaugalingon. Ug ang hinungdan nga akong . . . Kagahapon, samtang diha sa pagtuon, ug nahidangat ako niini nga hilisgutan, ug dayon nahunahunaan ko, "Ako gayud, kon itugot sa Ginoo, pagahisgotan ang bahin niana, kay ginaaghat gayud ako niini." Ug nagalaum ako nga kita tanan ginaaghat gayud niini, aron nga makita nato, ug moaghat kanato

sa pagsusi; ug tun-an pa'g diyutay, diha sa pagkompara sa maong adlaw kaniadto, sa . . . ngadto sa adlaw nga mao karon.

²⁷ Gusto kong mogamit og tulo ka pulong alang sa usa ka teksto, ug kana mao'y: *Nganong Mituaw Ka? Isulti!* Miingon ang Dios kang Moises, dinhi sa ika-15 nga bersekulo, “Ngano ba nga nagatuaw ikaw Kanako? Isulti sa katawohan, nga magapadayon sila.” Ug: *Nganong Mituaw ka? Isulti!*

²⁸ Karon, aduna kita'y igong hilisgutan, ug paninguhaon kong dalion sa kutob kong mahimo, nga giniyahan sa Balaang Espiritu. Ug gusto kong palandungon ang bahin sa . . . bahin niining teksto, mahitungod kang Moises nga nagatuaw ngadto sa Dios, diha sa panahon sa kalisdanan; ug gitubag sa Dios si Moises nga ginasaway, sa mismong panahon nga—nga ang kalisdanan nagakahitabo. Ug natural lang, medyo, sa usa ka tawo nga motuaw. Ug kung ingon-ana nga daw sa unsa ka—ka dakung pagsaway nga molingi ang Dios ug badlongon siya tungod sa pagsulti niini, tungod sa pagtuaw ngadto Kaniya. Daw sa usa ka malisud kaayo kini nga butang.

²⁹ Daghang higayon nga sa dihang motan-aw kita sa Kasulatan, diha sa kinaugalingon natong paagi sa pagtan-aw, daw sa malisod kini kaayo. Apan kung tun-an pa gyud nato Kini, makaplagan nato nga ang Dios nga maalam-satanan nasayod gayud sa Iyang ginabuhat. Ug nasayod Siya kung unsaon pagbuhat niining mga butanga ug kung unsa ang pagpakig-atubang sa tawo. Nasayod Siya kung unsa'y anaa sa tawo. Siya, nakaila Siya kaniya. Wala kita nakaila. Nakaila lang kita gikan sa pang-intelektuwal nga bahin. Nasayod Siya kung unsa gayud ang sa sulod sa tawo.

³⁰ Natawo si Moises niining kalibutana, ug nga usa ka tinugahan nga bata. Natawo siya aron mamahimong usa ka propeta, usa ka mangluluwas. Natawo siya nga dala na ang pagsangkap kaniya, sama sa matag tawong miabot sa kalibutan nga natawong dala na niining pagsangkap, sama sa hugot kong pagtoo diha sa—sa daang-pagkahibalo sa Dios, sa predistinasyon.

³¹ “Dili nga kabubut-on sa Dios nga may bisan kinsa nga mawala, kondili nga ang tanan managpakakab-ot sa paghinulsol.” Apan, ingon nga Dios, kinahanglan nga nahibalo Siya, ug nahibalo gayud, “nahibalo na sa katapusan gikan sa sinugdan.” Kita n'yo? Kung wala Siya nahibalo, dili Siya nga walay-kinutuban kung ingon-ana; ug kung dili Siya ang walay-kinutuban, dili Siya Dios. Busa dili Niya kabubut-on, gayud, nga may bisan kinsa ang mawala, apan Siya—nahibalo Siya kung kinsa ang mawala ug ang dili mawala. Kana ang hinungdan, ang pinaka-katuyoan nga si Jesus mianhi sa kalibutan, mao ang pagluwas sa kadtong, pinaagi sa Iyang daang-pagkahibalo, nakit-an na sa Dios ang gustong maluwas, kita n'yo, tungod kay

ang tibuok kalibutan hinukman na sa silot. Ug dili ko makita kung unsaon pa nato pagtudlo niini sa bisan unsa nga uban pang pamaagi gawas sa maong daang-pagkahibalo sa Dios, ug ang Biblia klarong nagaingon nga Siya'y "nahibalo sa katapusan gikan sa sinugdan," ug mahimong ipahayag kini.

³² Busa, sa diha nga ang usa—usa ka tawo nagapaningkamot nga mamahimong si kinsa nga sila dili man mao, nagapanundog lang sila, ug sa kadugayan mabutyag lang kamo. Igabutyag kamo sa inyong mga kasal-anan. Dili ninyo mahimo kining tabuntabonan. Adunay usa lang ka pangtabon para sa sala, kana ang Dugo ni Jesus Cristo, ug dili kini mahimong iaplikar gawas kung tinawag kamo sa Dios sa sugod pa lang sa pagkatukod sa kalibutan. Kana kung unsay hinungdan nga gipaagas kana nga Dugo; dili aron tamak-tamakan, ug himoon nga kataw-anan, ug—ug panamastamasan, ug—ug pagsultihan og dili maayo, ug—ug uban pa. Para Kini sa usa ka direkta nga katuyoan. Husto kana. Dili aron dula-dulaan, dili aron sundogon, sa pagsulti nga natabonan na ang mga kasal-anan nga diay wala pa. Ug walay tawo nga mahimong matabonan ang iyang mga sala gawas kon ang iyang ngalan nasulat na sa Libro sa Kinabuhi sa Cordero sa wala pa ang pagkatukod sa kalibutan. Nag-ingon si Jesus, Mismo, "Wala'y makahimo sa pag-ari Kanako gawas lamang kon ang Akong Amahan magadala kaniya. Ug ang tanan nga gihatag na sa Amahan," nangagi na, "gihatag na Kanako, magaari Kanako." Husto kana. Busa dili mo mahimong ipapamakak ang mga Pulong. Anaa Sila dinha alang sa Kamatuoran ug alang sa pagpanul-id.

³³ Ug natawo si Moises nga inubanan na sa gasa sa pagtoo; daku nga pagtoo ang anaa kang Moises. Makita nato kini, pagkalabay sa pipila ka panahon, nga nagagawas gikan kaniya. Ug natawo siya diha sa usa ka bantugan nga pamilya, sama sa atong nasayran kung unsa nga ang iyang amahan ug ang iyang inahan, ug nagagikan sa usa ka kaliwatan ni Levi. Nga, ang istorya dinhi, nga nag-una niini, diha sa Basahon sa—sa Exodo, matahum kaayo nga nagaasoy sa kinabuhi niining halangdong tawo. Ug usa siya sa—sa bantugang mga tawo sa Biblia, kay usa siya ka bug-os nga tipo kaniadto ni Ginoong Jesus.

³⁴ Natawo siya kaniadto diha sa usa ka talagsaon nga pagkahimugso, sama ni Ginoong Jesus. Natawo siya sa panahon sa pagpanglutos, sama ni Ginoong Jesus. Natawo siya aron nga mamahimong usa ka manluluwas, sama ni Ginoong Jesus. Gitago siya sa iyang mga ginikanan, palayo sa kaaway, sama ni Ginoong Jesus. Ug miabot siya sa iyang panahon sa pagpang-alagad, sama ni Ginoong Jesus. Usa siya ka lider, sama ni Ginoong Jesus. Usa siya ka propeta, sama ni Ginoong Jesus. Ug usa siya ka maghahatag-og-kasugoan, sama ni Ginoong Jesus.

³⁵ Ug nahibaloan nato nga namatay siya ibabaw sa Bato, ug siguradong nabanhaw siya ug tanan na, tungod kay, walo ka

gatus ka mga katuigan human niadto mitindog siya ibabaw sa Bukid sa Pagkabalhin sa Panagway, nga nagapakig-estorya kang Ginoong Jesus. Kita n'yo? Gidala siya niadto sa mga manolunda palayo. Walay nahibalo kung asa siya gilubong. Bisan ang yawa wala nakahibalo niana. Sa tinud-anay, wala ako nagatoo nga gilubong gayud siya. Ako—nagatoo ako nga gidala siya sa Dios palayo, ug—ug namatay siya ibabaw sa Bato nga iyang gisundan sa tanang adlaw sa iyang kinabuhi.

³⁶ Ug usa siya niadto ka hingpit nga tipo ni Cristo. Usa siya ka hari sa maong mga katawhan. Usa siya ka maghahatag sa balaod. Usa siya niadto ka—usa siya ka—usa ka tighatag-kusog ngadto sa mga tawo. Siya'y tanan na, sa—sa tipo, kung unsa si Cristo.

³⁷ Karon, unya, makita nga natawo siya nga dala kining dagkung mga gasa ug kinaiyang anaa kaniya, kung ingon-ana gikinahanglan na lang nga binhi nianang maong Kahayag, Ginabuhi, aron dalhon kanang butanga ngadto sa Kinabuhi.

³⁸ Kita n'yo, ang binhi sa Dios sa tinuod gibutang na sulod kanato sukad pa sa pagkatukod sa kalibutan. Ug sa dihang ginahayagan kana nga binhi nianang maong Kahayag, Ginabuhi Niini kini, apan gikinahanglan una nga moabot ang Kahayag sa mao nga binhi.

³⁹ Sama sa ako nang gitudlo sa makadaghang higayon mahitungod sa maong babaye sa atabay, siya nga atua niadto nga kahimtang. Bisan pa nga siya usa—usa ka tawong dautan'g dungog, bisan nga ang iyang—ang iyang kinabuhi ubos nga matang, ug atua siya niadto nga kahimtang tungod kay wala siya matandog og mga tradisyon, apan, bisan pa, sa unang pagka-igo kaniya niadto nga Kahayag, naila niya Kini dihadiha, kay aduna nay butang dinha sa pagtubag Niini. “Sa dihang nagatawag ang kahiladman ngadto sa Kahiladman,” kinahanglan nga adunay Kahiladman kung asa man sa pagtubag niana nga pagtawag.

⁴⁰ Ug si Moises dinhi nahimugso nga mao kini nga propeta, apan gipadaku siya diha sa usa ka intelektuwal nga tulonghaan ug sa palasyo ni Faraon. Si Faraong Seti, kon diin nga si Moises gipadaku ilalum niini, usa ka tawo kaniadto nga sa gihapon adunay pagpasidungog, ug nga nagtoo kang Joseph ingon nga propeta sa Ginoo. Apan mitungha niadto si Rameses pagkahuman ni Seti, ug si Rameses wala nag-ila mahitungod kang Joseph. Ug busa, mao nga, didto na kon diin misugod ang problema, karon, sa dihang mitungha ang usa ka Faraon nga wala makaila kang Joseph.

⁴¹ Apan ang kining halangdon nga mga kinaiya, atong hisgotan ang mga niini sa kadali lang, ug, sa dili pa kita moadto sa labing mahinungdanon nga bahin sa maong teksto. Aduna ko'y ubang pamaagi sa paghan-ay sa teksto, dayon sa pagporma niini,

ug tabangan kita sa Ginoo niining buntaga sa dihang atong iporma kini.

⁴² Si Moises, ingon nga natawong anaa na kining dakung gasa sa pagtoo. Dayon, gidihogan siya ug sinugo sa nagsilaob nga sapinit, aron sa pagluwas sa katawhan sa Dios. Karon, makita kung unsa ka halangdong mga kinaiyahan nga aduna niining tawhana! Natawo siya alang sa usa ka pihong butang. Adunay katuyoan ang Dios niini.

⁴³ Adunay katuyoan ang Dios kanimong maingon nga ania ka dinhi. Kita n'yo? Kung mamahimo lang ninyo, mahiabot nianang punto, unsa ka dakung kahasol ang mawala ngadto sa Dios ug sa imong kaugalingon, usab.

⁴⁴ Natawo si Moises, ug siya dayon kaniadto, inigkahuman, gidala siya ngadto sa—sa punto kon diin siya gidihogan. Ug, himatikdi, ang nakapahimutang nga binhi didto nga may intelektuwal nga hunahuna, dala ang bug-os nga pagtoo nga natawo siya aron sa pagluwas niini nga katawhan, ug bisan pa man wala gayud kini Nabuhi hangtud nga gisidlakan kini sa kadtong Kahayag gikan sa maong nagadilaab nga sapinit; hangtud sa iyang nakita, dili sa kung unsang butang nga iyang nabasa, kondili butang nga iyang nakita sa iyang mga mata; Usa ka butang nga nagsulti ngadto kaniya, ug nagapakig-estorya siya ngadto Niini. Oh, kung giunsa niana pagpang-Buhi sa mga butang.

⁴⁵ Siguro ang si kinsa man nga tawo nga may...o babaye, lalaki o babaye man. Ug siguro, sa pang-intelektuwal nga hunahuna bahin sa kung unsay pagdahum nila sa Pulong, ug uban pa, dili gayud magkaadunay hingpit nga kasaligan nga baruganan hangtud nga ilang natagbo kana nga Kahayag nga nagapanghimatuud niana nga Pulong.

⁴⁶ Nagtoo ko nga walay iglesia sa naandan na niini, bisan unsa pa niini tingali ka intelektuwal ug ka-pundamental, kana nga iglesia dili mahimong molampos hangtud nga mapaila ang Supernatural sa taliwala nianang mga tawo, ug nga makita nila kini. Usa ka Butang nga mahimo nilang estoryahon, nga motubag ngadto kanila, nga nagapanghimatuud niining sinulat nga Pulong.

⁴⁷ Karon hinumdumi, sa dihang natagbo ni Moises kining nagadilaab nga sapinit, eksaktong gipanghimatud-an kana nga Pulong. Mao kadto ang Pulong. Dili na kinahanglan pang mabalaka si Moises, “Unsa kaha ang ginapasabot niining Tingoga? Unsa kaha kini Siyang ania dinhi?” Tungod kay, daan nang gisulat sa Dios diha sa Kasulatan, sa Genesis, nga, “Mamahimong dumuloong ang imong kaliwat sa yuta sa laing mga tawo, apan magabalik sila human sa upat ka gatus ka tuig, magabalik sila niini nga nasud pag-usab, kay ang—kay ang pagkadautan sa mga Amorehanon wala pa mapuno.”

Karon, ginatus ug ginatus ka mga katuigan sa wala pa kadto, gisulti na sa Dios nga, “Ang Israel mamahimong dumuloong ug pagadaugdaugon diha sa usa ka laing nasud, ug magapuyo didto sulod sa upat ka gatus ka tuig. Apan ang Dios, pinaagi sa usa ka gamhanang kamot, ipahigawas sila.” Busa, nakita n’yo, nga pinaagi niining nagadilaab nga sapinit. . .

⁴⁸ Nahibalo si Moises niini, sa intelektuwal. Ug ang binhi nga anaa na kaniya sugod pa sa iyang pagkatawo, nakapahimutang na sulod sa iyang kasingkasing. Ug gisulayan niya, pinaagi sa kasinatian niya sa Pulong, ang pagpaninguha sa—sa—sa pagpahigawas kanila, sa pagluwas kanila, tungod kay nasayod siyang natawo siya alang nianang katuyoan. Nasayod siya niana, sa maong panahon. Sa bug-os nag-ingon ang mga Kasulatan nga upat na ka gatus ka tuig ang pagpuyo nila didto.

⁴⁹ Sama lang sa nahibaloan nato karon, sa dihang gipangutana ako sa usa ka lalaki dili pa lang dugay, mahitungod sa Pag-abot ug sa Pagsakgaw. Nahibalo kita. Nagkinabuhi kita nga mubo na ang panahon, sa panahong haduol na ang Pagsakgaw, ug nagapaabot kita sa pang-sakgaw nga pagtoo nga makapabira sa Iglesia nga hiusahon ug hatagan kini og supernatural nga kusog, nga makapausab niining mga lawas nga atong gipuy-an. Sa dihang makita nato ang usa ka Dios nga makapabangon sa patay gikan sa salog o gikan sa nataran, ug buhion siya balik ug ipaatubang siya kanato, sa dihang makita nato ang usa ka Dios nga makapatangtang sa kanser nga miut-ot na sa usa ka tawo ngadto sa morag usa na lang ka landong ug banhawon ngadto sa usa na ka himsog og mapiskay nga tawo, angay gayud kana makahatag og pang-sakgaw nga pagtoo ngadto sa mga tawo. Nga, sa dihang mokidlap na kana nga Kahayag gikan sa kawanangan, ug motingog na ang trumpeta, tigumon sa kalit ang Lawas ni Cristo, ug mangausab sa kalit ug pagasakgawon na ngadto sa Kalangitan. Oo, aduna gayu’y butang nga mahitabo sama niana. Ug ang atong mga tulonghaan sa teolohiya dili gayud makahimo niana, bisan pa man nga okey sila sa pang-intelektuwal. Apan kinahanglan matagbo mo gayud kana nga Kahayag! Kinahanglan nga makaplagaan mo kana nga Butang.

⁵⁰ Ug ania si Moises, nga ginabase ang halangdon niyang pagkatawag diha sa Pulong, ug halangdon kadto, hangtud usa niana ka adlaw natagbo niya kini nga Kahayag, ug ang Mismong Pulong nagsulti ngadto kaniya. Dayon nadawat niya ang iyang pagkadinihogan. Gidihogan niadto kung unsa ang atua na kaniya, kadtong atua sa sulod, ang—ang salabutan nga nagtoo niini, ang pagtoo nga nakabase diha sa iyang pagtoo sa Dios, nga nagpahimulag kaniya gikan sa iyang inahan. Ug karon sa dihang nahiadto siya sa Presensiya niining Kahayag, gidihogan Niini kadtong iya nang gitooan. Kita n’yo? Daw sa unsang pagkadihog! Ug sinugo na siya.

51 Karon, nahibalo kita, nadungog niya sa intelektuwal ang iyang inahan. Nasayod siya kung unsay mahitabo, ug nasayod siya nga nagapuyo siya nianang panahona. Apan ania nakaplagan niya nga pakyas siya, busa mahimong aduna siya’y . . . mahimong mikunhod og diyutay ang iyang pagtoo. Apan human niadto sa dihang miduol siya ngadto sa maong sapinit, misulti ang Dios, “Hingdunggan Ko ang pagtuaw sa Akong katawhan, ug nahinumdam Ko sa Akong saad ngadto sa ilang mga amahan, kang Abraham, Isaac, ug kang Jacob, ug mikanaug Ako.” “Ako,” diha na, ang—ang puli-ngalan nga pang-personal, “Mikanaug Ako aron sa pagluwas kanila.”

52 Ug karon, ug mahimo bang idugang ko kini kung kini . . . Pasayloon ako sa Dios kung medyo man kini og mapasipadon. “Dili Ako nagapamuhat ibabaw sa yuta, gawas lamang nga pinaagi sa tawo. Ako—Ako—Ako mao ang Punoan sa parras; kamo mao ang mga sanga. Ug ginapahayag Ko lang ang Akong Kaugalingon sa dihang makakaplag na Ako og usa ka tawo. Ug ikaw Akong gipili, ug ginapadala Ko ikaw didto aron ipahigawas sila.” Kita n’yo? Karon himatikdi, “Ako magauban sa imong baba, ug ako . . . bitbita kini nga sungkod.”

53 Ug miingon si Moises, “Mahimo bang makita ko ang ebidensya nga Imo akong igapadala, ug nga dinihogan Mo ako, ug nga pagabuhaton Mo kining mga butanga?

Miingon, “Unsa ba kana nga anaa sa imong kamot?”

Ingon niya, “Usa ka sungkod.”

Miingon, “Ibalibag kana sa yuta.” Nahimo kini nga usa ka bitin. Milikay siya.

54 Miingon Siya, “Pudyota kini.” Balik kining nahimo nga usa ka sungkod. Miingon, “Isulod sa imong dughan ang imong kamot.” Pagkakuha niini, ug gisanla kini. Sa gibalik kini, ug naayo kini.

55 Ang ingon, “Nakita niya ang himaya sa Dios.” Wala na’y pagpangutana pa, alang kang Moises. Inyo bang nahimatikdan, wala na gayud siya miadto sa kamingawan pag-usab? Nasayod siyang dinihogan siya. Nasayod siya kung asa, ang tanan niining mga butanga nga sa una pa anaa na sa iyang kasingkasing, kining mga maayo’g halangdong mga kinaiya, ug siya . . . dinihogan na ang mga niini karon. Siya’y, andam na siya. Andam na siya sa pag-adto. Busa paadto na siya paingon sa Egipto.

56 Nag-ingon ang Dios, “Magauban Ako kanimo,” busa kana—mao na kana. Kung, “Ako magauban kanimo,” mao lang kana ang kinahanglan nga mahibaloan ni Moises, alang niining dakung pagtawag sa iyang kasingkasing. Ug karon nag-ingon ang Dios, “Ako magauban kanimo.”

57 Karon, gipanghimatud-an usab sa Dios ang iyang, ang mga pagpahayag ni Moises. Nagapahayag si Moises, “Natagbo ko ang

Ginoo. Ug nag-ingon Siya sultihan kamo, ‘si MAO AKO’ ang nagsugo kanako.” Kita n’yo?

⁵⁸ Karon miingon sila, “Aniay usa ka lalaki, usa na usab ka Judio, usa tingali niining mga panatiko nga nagsige’g panganhi nga dala ang tanan nang matang nga plano sa pagpahigawas kanato sa pagkaulipon.” Ug kahibalo mo kung naunsa na ang mga tawo sa dihang mga nangaulipon sila, o naulipon sa usa ka butang, aduna kanunay sa kung unsa nga matang sa pagpa-ukyab ang manungha, kahibalo na mo, aron buhaton kini.

⁵⁹ Busa, si Moises, nagsaad ang Dios kang Moises, “Ako magauban kanimo. Magauban Ako sulod kanimo. Ang Akong mga Pulong mamahimong imong mga Pulong. Igasulti mo ang Akong mga Pulong ug isulti mo lang kung unsay Akong isulti.”

⁶⁰ Ug karon sa dihang miadto na si Moises ug gihatud kini nga panawagan, ug miatubang kang Faraon, ug gisultihan kini, “Ang Ginoong Dios sa mga Hebreohanon nag-ingon, ‘Ipahigawas mo ang maong mga kaanakan.’” Ug dili niya tugotan silang manglakaw. Busa siya—nagbuhat siya og usa ka ilhanan sa atubangan sa mga katigulangan ug sa atubang ni Faraon, ug ang mga ilhanan nga gibuhath sa Dios. Miingon siya, “Karon, ugma, mga ingon niining orasa, magasalop ang adlaw. Magakangitngit sa tibuok Egipto,” ug eksakto gayud nga nahitabo kini. Ug dayon miingon siya, “Adunay—adunay magaabot nga mga langaw ibabaw sa—ibabaw sa kayutaan,” ug gituy-od niya ang iyang sungkod ug nagtawag og mga langaw, ug nangabot ang mga langaw. Ug nagpropesiya siya, ug ang tanan nga iyang gipropesiya eksakto gayud nga nahitabo. Dios kadto. Kita n’yo?

⁶¹ Tinawag siya sa Dios gikan pa sa iyang pagkatawo, gibutangan siya og mga kinaiyahan, og dakung pagtoo, ug dayon mikanaug pinaagi sa Iyang Presensiya ug gidihogan ang kadtong halangdong butang sulod kaniya, ug gisugo siya didto nga dala ang Iyang Pulong, ug bug-os siyang gipanghimatud-an sa iyang mga pagpahayag. Bisan unsa pa kadaghang mga mini ang nanungha, unsa pa ka daghan niining mga butang ang nangahitabo, ang Dios ang nagapakigsulti sa...napaila gayud si Moises. Si Moises, kung unsa ma’y gisulti ni Moises, gipasidunggan sa Dios. Gusto ko kaninyo nga ayaw gayud kalimti kana nga Pulong. Kung unsa ma’y gisulti ni Moises, gipasidunggan sa Dios, tungod kay ang Pulong sa Dios atua kang Moises. “Ako magauban sa imong baba; igasulti niini ang hustong mga butang.” Karon, kon unsa ma’y isulti sa Dios—kon unsa ma’y isulti sa Dios, isulti Niya kini pinaagi kang Moises, ug gipamatud-an niini ug gipanghimatud-an ang iyang mga pagpahayag.

⁶² Mao usab, nga gisultihan siya sa iyang inahan, mahitungod sa iyang misteriosong pagkahimugso, ug kung unsa nga pahaduol na niadtong panahona ang oras nga magkaaduna na

og kaluwasan. Si Amram ug—ug si Jocabed, ang anak nga lalaki ug anak nga babaye ni Levi, misugod pag-ampo sa Dios nga magpadala og usa ka mangluluwas. Ug nanginahanglan kini . . . sa dihang makita mo ang panahon sa saad nga nagapahiduol na, nagaaghat kini sa mga tawo ngadto sa pag-ampo ug sa pagkauhaw. Ug walay pagduhaduha nga—nga si Jocabed nagsugilon na kaniya sa makadaghang higayon, ang iyang inahan; ingon nga kini ang iyang magtutudlo, usab, sama sa atong nahibaloan sa maong estorya. Ug nasuginlan siya kung giunsa niini pag-ampo. “Ug, Moises, sa dihang natawo ka, anak, usa ikaw ka matahum nga bata. Lahi ka. Adunay nahitabo nga butang sa imong pagkahimugso.”

⁶³ Gi-drama ko na kini alang sa mga bata, dili pa lang dugay, ug miingon pa, “Samtang atua nagaampo si Amram sa maong lawak, nakita niya ang usa ka Manolunda nga gihulbot ang Iyang espada ug gipunting kini ngadto sa Amihanan, ug miingon, ‘Magkaaduna ka og usa ka bata, ug pagadad-on niya ang maong mga kaanakan pa—Amihan ngadto sa yutang saad.’” Gina-drama kini alang sa gagmay’ng mga bata aron ilang masabtan kini; nga ang ilang panabot dili pa makaapas sa punto sa kaninyong mga dagku na, ug nga mahimong sabton ang mga butang sa diha nga ginapadayag kini sa Balaang Espiritu kaninyo.

⁶⁴ Karon, bisan nga naestorya na kaniya sa iyang inahan kining mga butanga, ug nahibalo na siya niini, nagkinahanglan siya bisan pa man og usa pa ka paghikap. Ang—maayo ang pagtudlo, apan nagkinahanglan siya og usa ka personal nga pagpakig-kontak.

⁶⁵ Mao kana kung unsa ang gikinahanglan sa kalibutan karon. Mao kana ang gikinahanglan sa iglesia karon. Mao kana ang gikinahanglan sa matag-usa, nga mga anak nga lalaki ug mga anak nga babaye sa Dios. Aron mamahimong ingon niana, gikinahanglan mo ang personal nga pagpakig-kontak, kita n’yo, Usa ka Butang. Bisan pa, nga nasayod kang matuod ang Pulong, nasayod kang husto Kini; apan sa dihang nagapakig-kontak kini, ug dayon makita mong nagakahitabo ang maong butang, kung ingon-ana makita mong anaa ka sa hustong dalan. Kita n’yo? Ug, bantayi, kanunay kining mosubay sa Kasulatan. Magasubay kini mismo sa Kasulatan, kay gibuhay na niini.

⁶⁶ Eksakto gayud sa Kasulatan ang pag-ampo ni Amram. Misubay sa gisaad nga Pulong ang ilang mga pag-ampo. Nagsaad ang Dios nga buhaton na kini niadtong panahona. Nag-ampo sila para niini, ug ania natawo ang usa ka matahum nga bata. Ug sila’y . . .

⁶⁷ Bantayi! Oh, gusto ko gayud kini! Kita n’yo, sa maong oras nga ginapamatay ni Faraon ang tanan nga mga bata, kita n’yo, nga ginapangtuhog sila sa—sa espada, sa pang-sundalo nga espada; sila, gipangdunggab nila kining gagmay’ng mga

bata hangtud mamatay, gipakaon sila ngadto sa mga buaya, ang gamay nilang mga lawas, hangtud nga ang mga buaya mitambok na tingali tungod sa mga lawas sa mga batang mga Hebreohanon. Apan nag-ingon ang Biblia, nga, “Wala nangahadlok ang maong mga ginikanan sa mando ni Faraon nga pamatyon ang mga bata.” Wala sila nangahadlok. Wala sila nangahadlok, tungod kay aduna sila’y butang nga nakita niining bataa, sa sugod pa lang. Nakita nila kini, nga mao na kadto ang tubag sa ilang pag-ampo.

⁶⁸ Ug karon aduna si Moises niining tanan ingon nga mga kaagi, busa nasayod si Moises nga pinadala siya tungod sa pinaka-katuyoan sa pagluwas sa mga anak sa Israel.

⁶⁹ Kita n’yo, nangtingub na lang ang maong tanang kaagi. Sa dihang makuha mo ang unsa man, ug mahimong dalhon mo ang Biblia, ingnon, “*Kini* ang magakahitabo,” ug ania na nahitabo kini; “ug *kini* magakahitabo nianang panahona,” ania na nahitabo; “ug *kini* magakahitabo sa nianang pihong panahon,” nahitabo gayud; kung ingon-ana nagakatipon-tipon kini ug nagahulagway og usa ka larawan ngadto kanato.

⁷⁰ Oh, daw sa unsa na kining tabernakulo karong buntaga, kung unsa nga kitang mga tawo niining orasa, Igsoong Neville, sa diha nga makita nato nga nagakaubanon na ang atong mga buhok, nagakabako na ang atong mga abaga, sa dihang makita nato nga ingon niana na ang pag-katabyogtabyog ug pag-uyog-uyog sa kalibutan, ug kung unsa na nga matan-aw nato ang palibot ug makita ang saad nga nagakahaduol na! Kini’y, kini. . . Gihunahuna ko, sa makadaghang higayon, nga kung aduna lang makapamalandong Niini sa makausa, ug dili masabtan Kini, o masabtan Kini, diay, ug mapamalandongan Kini sa makausa, halos iganoy ka na ngadto sa Eternidad, sa ingon gayud ka mahimayaong kalipay! Ug nga wala gayud nahibalo niini, ug nga, oh, nga makita ang mga butang nga atong nakita ug masayran ug nga masabtan, ug bug-os nga mapamalandongan sa usa ka higayon. Ang maong lalaki, o babaye, ang batang lalaki, o batang babaye, malagmit gayud nga itaas nila ang ilang mga kamot ug moingon, “Adto na ta, Ginoong Jesus,” nakita n’yo. Oh, pagkahaduol na gayud ang takna!

⁷¹ Si Moises ingon nga nahibalo nga natawo siya alang nianang katuyoan, ug midungaw sa mga bintana ug gitan-aw kining mga Hebreohanon samtang nangahago sila; gisusi dinhi sa Kasulatan, ug nag-ingon Kini, “Ug mamahimo silang mga dumuloong sulod sa upat ka gatus ka tuig, kita n’yo, apan ipahigawas Ko sila pinaagi og gamhanang kamot.” Dayon sa dihang mibalik siya, human sa pagkasugo, dinihogan na, nasayod na nga siya niadto natawong. . . Ug ang pagtoo nga anaa kaniya nagtan-aw, pinaagi sa pagtoo nakita niya ang kadtong mga tawo ug nasayran nga mga anak sila sa Dios, kay ang

kalibutan. . . ang—mao ang giingon sa Pulong. Dili sila iyaha sa kalibutan, ug dili sama sa uban pa kanila. Lahi sila. Ug sila mga salikwaot ug mga panatiko, ngadto sa—sa taas nga garbo sa Egipto; ug gitakda na siya nga mamahimong anak ni Faraon, manununod sa gingharian, ug ang sunod na. Apan, siya, aduna sa kung unsang butang sa kinasuloran niya, usa—usa ka pagtoong tinuod nga wala mitan-aw niadtong mga butanga, ang garbo nga panulondon niya. Naglantaw siya sa saad sa Dios, ug nasayod siya nga ang maong panahon haduol na. Ug unsa gayud kaha ang gihunahuna niadtong tawhana!

⁷² Gusto ko siyang estoryahon bahin niini, sa umalabot, sa dihang mahibalag ko siya sa pikas nga kinabuhi. Moingon ka, “Binuang, igsoon!” Dili, dili kini binuang. Mahibalag ko gayud siya, sa grasya sa Dios. Oo, sir, Pagaestoryahon ko siya, sa umalabot, si Moises mismo. Ug kung unsa ko kagusto siyang pangutan-on, kung unsa, sa makita niya ang iyang pagpangandam!

⁷³ Kung daw sa unsa nga mga kalibog, ang yawa nga nagaingon, “Aw, dili motoo ang mga tawo kanimo. Huh-uh. Wala—wala ra kana.”

⁷⁴ Apan sa dihang Nabuhi kana nga Binhi dinha, aduna sa kung unsay miigo kaniya, ug nasayod siyang adunay butang nga magakahitabo. Nasayod siya. Gitan-aw ang iyang orasan ug nakita kung unsang orasa na kadto, ug nasayod siya, ug unsa kaha ang gihunahuna niya sa diha nga gipanid-an niya. Karon sa diha nga nadugtong-dugtong niya kini tanan, ang tanan niining dakung butang nga iyang nakita; ang panahon nga giingon sa Kasulatan, ang giampo sa iyang inahan ug amahan, ug nga natawo siya sa usa ka talagsaong pagkahimugso, usa ka talagsaon nga bata. Ug, tibuok niining panahon, aduna na sa kung unsa nga butang diha sa kinasuloran niya.

⁷⁵ Ug siya karon miikyas ug naninguha paghunahuna nga gamiton niya ang iyang pang-militar nga pagkabinansay gikan sa iyang tulonghaan, ug luwason ang maong mga kaanakan, ug napakyas kadto.

⁷⁶ Dayon miadto siya sa kamingawan ug nagminyo sa usa—usa ka matahum nga babayeng Etiopiahanon, ug nakabatton sila og usa ka anak nga lalaki nga ginganla’g Gersom.

⁷⁷ Ug usa niana ka adlaw nga samtang siya nagabantay sa iyang panon, dihadiha iyang nakita ang usa ka nagadilaab nga sapinit didto sa ibabaw sa bukid, nga nagasilaob. Ug miadto siya didto. Ug dili usa ka intelektuwal, dili usa—usa ka imahinasyon, dili usa ka lamat, usa ka pagkamata-mata, apan kaniya. . . Kadto ang Dios ni Abraham, sa usa ka Kahayag, usa ka Haligi nga Kalayo didto sa usa ka sapinit, kadto nga Kalayo, ingon nga nagasilaob, apan wala ginaugdaw niini ang sapinit. Ug ang Tingog sa Kasulatan, ang Tingog sa Dios, nagsulti gikan

didto, ug nag-ingon, “Ikaw ang Akong gipili. Ikaw ang kanang maong lalaki. Gipadaku Ko ikaw alang niining katuyoan. Akong ginapamatud-an kanimo dinhi, pinaagi og mga ilhanan, nga moadto ka didto aron luwason ang maong mga kaanakan tungod kay kinahanglan nga mamatuman ang Akong Pulong.”

⁷⁸ Oh, ang Iyang Pulong alang niining panahon gikinahanglan nga matuman. Nagpuyo na kita sa maong panahon. Bisan unsa pa ang isulti ni kinsa man; kinahanglan nga matuman ang Pulong. Mangahanaw man ang mga langit ug yuta, apan dili ang Iyang Pulong.

⁷⁹ Karon, sa mapamalandongan kini tanan ni Moises, ug nga nakita ang tanang anggulo, gidihogan niini ang iyang pagtoo. Amen! Oh, sus! Pagkamaanindot hunahunaon! Kini, mismo, makita mismo ang Kasulatan nga direktang nagatudlo ngadto sa kung unsa kini, ug ang pagpanulti sa Dios, ug ang kapanghimatuoran niini nga atua didto, gidihogan niini kung unsang pagtoo ang atua kaniya, aron palihokon.

⁸⁰ Unsa ma’y angay buhaton niini kanato? Gikinahanglan nato ang paghinulsol. Gikinahanglan nato ang usa ka rebaybal. Ginasulti ko sa kaugalingon ko mismo. Kita n’yo? Nagkinahanglan ako og usa ka pag-uyog. Nagkinahanglan ako sa kung unsa man. Ingon ko nga nagasulti ako sa kaugalingon ko mismo niining buntaga, o mahitungod sa akong kaugalingon. Ako—ako—ako nagkinahanglan og usa—usa ka pagpukaw.

⁸¹ Ug sa dihang mahunahuna ko kanang dakung kapanghimatuuran, ang tanan nga hingpit naipahayag didto, ug gidihogan niini ang pagtoo ni Moises. Ug, sus, nakita niyang wala’y unsa man . . .

⁸² Ania, siya nga mikalagiw gikan sa Egipto, nga, sa tinud-anay, mahimo niyang sugdan ang usa—usa ka pag-rebelde o unsa man, ug mahimo niya niadto—mahimo niya unta niadto ang pag-rebelde ug sugdan ang usa ka rebolusyonaryo sa Egipto, ug mahimo niyang gamiton niadto ang usa ka panon sa kasundalohan ug nakiggubat na unta, apan, nakita n’yo, aduna siya niadto og linibo nga iyang kadapig. Apan imbis niana, nahadlok siya bisan sa pagbuhat niana, nga ang mga kasundalohan kadapig niya.

⁸³ Apan ania siya nga nagabalik karon, pagkahuman sa kuwarenta ka tuig, nga otsenta na ka tuig ang kagulangan, dala ang usa lamang ka sungkod sa iyang kamot. Ngano man? Nahimo nang usa ka realidad kung unsa man ang nagadilaab niadto sa kinasuloran sa iyang kasingkasing. Dinihogan na siya niadtong tungora, ug nasayod siyang aduna siya og MAO KINI ANG GINAINGON SA GINOO. Wala na’y bisan unsa man ang makapugong kaniya karon. Wala siya nagkinahanglan og kasundalohan. Uban niya ang Dios. Mao lang kana ang iyang gikinahanglan; ang pag-uban sa Dios kaniya.

⁸⁴ Oh, sa dihang nasayod ka nga ang Dios nagpadala kanimo aron buhaton ang usa ka butang, ug makita mo kini nga nagapanglihok didto, didto—wala’y bisan unsa man ang makapuli niini. Kana lang.

⁸⁵ Mahinumduman ko ang mga higayon sa dihang gisultihan ako sa Dios bahin sa pipila ka magakahitabo nga mga butang, ug gipadayon ko ug makita nga atua kini mismo, daw sa . . . Oh, pagkaanindot bation! Kontrolado na ang sitwasyon, kana lang, kita n’yo, tungod kay giingon na sa Dios.

⁸⁶ Mahinumduman ko, daghan kaninyo ang makahinumdum, bahin sa gamay’ng batang lalaki nga gibanhaw didto sa Finland, ug human nga namatay, namatay nga nabangga sa awto. Ug nga nagatindog ako niadto sa kilid sa dalan, ug naglakaw na palayo gikan niadto nga bata, ug miliko ako ug milingi. Ug aduna sa kung unsa nga mihikap nga kamot niini sa akong abaga, ug abi ko nga si Igsoong Moore kadto, ug wala ma’y tawo sa tapad ko. Ug milingi ako, ug niadtong tungora mihangad ako sa bukid nga nakita ko. Ingon ko, “Buena, nakita ko na kana nga bungtod kung asa man, apan wala man kami miagi dinhi. Lahi man ang among giagian. Asa kaha kana nga bungtod?”

⁸⁷ Ug milantaw ako ug nakita ko kadtong sakyanan didto, nga guba na; nakita ang kadtong gamay nga batang lalaki didto nga ang iyang . . . nagbuy-od didto nga may—may alut nga medyo kulonon, ingon sa maong tawag nato niini dinhi. Nanggibudlat na ang mga mata, sama sa iya ni Igsoong Way niadtong miaging adlaw sa dihang nahulog siya. Ug ang gamay niyang tiil milahus na sa medyas, kon diin nabali ang gamay niyang mga tiil. Ug ninggawas ang dugo sa iyang mga mata, ug sa ilong, ug sa mga dalunggan. Ug nakita ko ang iyang gamay, mubo niyang karsones; ug nakabutones kini, sa iyang, *dinhi* ug kilid sa iyang gamay nga hawak; ug nakataas ang gamay niyang medyas, medyo tag-as nga medyas sama sa atong ginasuot niadtong katuigan nang nangagi.

⁸⁸ Ug gitan-aw ko ang palibot, ug didto eksakto, ingon ka eksakto gayud sa gisulti sa Balaang Espiritu duha na ka tuig nga wala pa nahitabo kadto, sa dihang kamo sa tibuok nasud gipangsulat kini diha sa inyong mga Biblia, nga mahitabo kini. Oh, didto, dayon, kontrolado na ang sitwasyon. Bisan unsa pa siya ka patay na, bisan unsa pa ang isulti ni kinsa man; human na kini. Mabuhi gayud siya pag-usab!

⁸⁹ Ingon ko, “Kung kini nga bata dili mobangon gikan sa patay, mini ako nga propeta kung ingon-ana, usa ako ka yabag nga representante sa Dios. Kay, didto sa akong nasud, duha na ka tuig ang milabay, nagsulti Siya kanako nga mahitabo kini. Ug niining mga ministro didto, ug tanan na, nakasulat kini sa una nga blankong panid sa among Biblia, ug eksaktong ania na. Basahon mo kini sa mao nga panid, kung unsa nga ‘mahitabo

kini sa usa ka nasud, nga may nagkapatong-patong nga mga bato, ug uban pa, adunay mamatay, ug anaa sa . . . diha sa tuo nga bahin sa dalan.” Ingon ko, “Mao na kini. Walay bisan unsa man nga makapugong niini. Kontrolado na ang sitwasyon.”

⁹⁰ Dinihogan na ang maong pagtoo nga atua sa sulod sa akong kasingkasing. Oh, kung masaysay ko lang unta kana! Ang pagtoo nga ang Dios . . . Anaa kanako diha sa Dios, nga nagsulti kanako, ug nga wala gayud kini napakyas, nag-ingon kanako, “Kontrolado na karon ang sitwasyon. Ania na sa eksakto kung unsa ang gipakita Ko kanimo duha ka tuig na ang milabay, ug ania na kini karon napahimutang sa eksaktong pagkahan-ay gayud. Ang butang lang nga kinahanglan mong buhaton mao ang pagsulti lang sa pulong.” Ug ang maong gamay’ng bata mibangon gikan sa patay. Kita n’yo?

⁹¹ Naghunahuna ako, ug nga ginatan-aw ko niadto si Igsoong Fred Sothman nga nagalingkod didto, ug si Igsoong Banks Wood ug sila. Sa miaging adlaw, didto sa—sa Alaskan Highway, kung unsa nga mitindog ako dinhi sa simbahan ug gi-estoryahan ko kamo bahin sa usa ka mananap nga medyo may sungay sa usa, nga kuwarenta’y dos pulgada ang katas-on, ug usa ka kapihong oso nga silver-tip. Wala pa gayud ako nakaadto didto, ug kung unsa nga ang . . . nga makuha ko kini, ug kung unsaon pagkahitabo niini, ug kung pila ang mahiuban kanako, ug kung unsa ang ilang pangsul-obon. Nahibaloan ninyo kini, ang matag usa kaninyo, sa mga semana sa wala pa kadto nahitabo.

⁹² Ug didto na sa pagkaadto ko didto, sa walay pagkasayod niini, atua nahimutang kadto nga mananap. Ug miadto ako, ug—ug siya’y . . . usa ka imposible. Kung masayran sa usa ka mangangayam, o makapaminaw man niining teyp, kung unsa nga dili mo mahimong moduol atubang sa usa ka mananap, molukso kini ug modagan dayon. Apan wala siya midagan.

⁹³ Ug didto siya gisab-it karon sa akong lawak. Didto karon nagbitay ang maong silvertip, nga eksaktong mao gayud. Ug usa—atua ang usa ka sukdanan, usa ka sukdanan’g sintas, aron ipakita ang iyang pagka-eksakto. Ug ang sungay mokipus sa duha ka pulgada o sobra pa, kung linghod pa kini diha sa maong mananap ug sa diha nga mikaging na kini, apan wala gayud kini mikipus. Mao gihapon kini eksaktong-eksakto sa kuwarenta’y dos ka pulgada. Kita n’yo? Atua na kini didto karon ang maong silver-tip, pito ka piye ang gitas-on niini, sa ingon ka eksakto, ug ang tanan nga eksaktong-eksakto kung unsa kini niadto, nga atua kini didto karon.

⁹⁴ Apan sa dihang nagsulti kini nga tawo kanako, “Karon, tan-awa, Igsoong Branham, nadakup na nato kini nga mananap nga mao’y imong ginahisgotan, apan ang gisulti mo kanako nga makuha mo ang usa ka kapehon nga silver tip sa dili ka pa

makaabot didto ilalum sa maong bungtod, pabalik kon diin didto silang mga kalalaken-an, kadtong adunay berde nga kamisin.”

⁹⁵ Miingon ako, “Kini ang MAO KINI ANG GINAINGON SA GINOO. Mao’y gisulti sa Dios.”

⁹⁶ “Apan, Igsoong Branham,” ingon niya, “Makita ko na ang tanan-tanan dinhi, sa minilya, wala ma’y bisan unsa. Asa man kini gikan?”

⁹⁷ Miingon ko, “Dili na kana alang kanako nga pangutan-on pa. Mao ma’y giingon sa Dios! Ug Siya ang Jehovah-Jireh. Mahimo Siyang modala og usa ka oso didto. Mahimo Siyang mobutang og usa ka buok didto.” Ug gihimo Niya kadto. Ug atua na siya. Kini ang kontrolado nang sitwasyon.

⁹⁸ Ug sa nakita ni Moises nga gipatungha siya alang niining katuyoan, ug nga natagbo niya nga inatubangay, kining gamhanang Dios nga Mao’y nagbuhat sa maong pagtawag, ug nga nagdihog kaniya ug nagpaila kaniya, ug nga miingon, “Kini ang pagkatawag kanimo, Moises. Ginasugo Ko ikaw, ug igapakita Ko kanimo ang Akong Himaya. Ug ania Ako, sa usa ka sapinit, nga nagadilaab. Pag-adto didto! Magauban Ako kanimo.” Wala siya nagkinahanglan ni usa ka tukog. Aduna kaniya ang Pulong, ang gipanghimatud-an nga Pulong, ug miadto siya didto. Gidihogan niini ang pagtoo nga atua na kaniya.

⁹⁹ Ug dihogan kita niini sa dihang makita nato nga ania kita nagakinabuhi sa kaulahian na nga mga adlaw, ang mahibaloan nga ang tanan niining mga ilhanan nga makita natong nagakahitabo, nga gisulti na diha sa Kasulatan, magakahitabo sa kaulahiang mga adlaw; gikan pa sa Langit, paingon ngadto sa mga pulitikanhong pangkagamhanan, ug ang kinaiyahan na sa mga tawo, ug ang pag-ubos sa moral sa kalibutan, ug sa mga kababayan-an, ug kung unsay pangbuhaton nila sa kaulahiang mga adlaw, ug kung unsay pangbuhaton sa mga kalalaken-an, ug kung unsa na’y pangbuhaton sa mga kaiglesiahanan, kung unsay pangbuhaton sa mga kanasuran, ug kung unsay buhaton sa Dios. Ug makita nato kini tanan nga nahayag sa atong atubangan.

¹⁰⁰ Oh, dihogan niini ang atong pagtoo. Ginadala kita niini ngadto sa halangdong mga pagbiyo. Kita n’yo? Kini—ginapahimulag kita niini sa uban pang mga butang sa kalibutan. Kita n’yo? Bisan kung unsa pa kita ka diyutay, o kung unsa pa kita ka minorya, bisan kung unsa pa kita nga gikataw-an, nga gibiyaybiay, dili kini makahatag og kabilinggan. Kana lang. Makita nato kini. Aduna sa kung unsang butang ang anaa sa sulod kanato. Gikatakda na kitang daan aron makita kini nga oras, ug wala’y bisan unsa man ang makapugong kanato nga makita kini. Amen! Ania ang Dios nga nagsulti na niini. Kini—nagakahitabo na kini. Makita nato kini. Oh, kung daw sa

unsa nato ginapasalamatan ang Dios tungod niini! Oh, dayon, ginapadayag niini ang inyong pagtoo sa dihag makita nato kining mga butanga nga nagakahitabo na karon.

¹⁰¹ Karon, dinhi pag-usab mabasa nato nga, “Giisip ni Moises ang pasipala nga pagaantuson alang kang Cristo ingon nga labi pa ka dakung bahandi kay sa mga bahandi sa Egipto.” Karon, mas labaw pa niyang giisip ang—ang pasipala nga pagaantuson alang kang Cristo.

¹⁰² Karon hinumdumi, “ang pasipala nga pagaantuson alang kang Cristo.” Kita n’yo, adunay pasipala nga pagaantuson sa pag-alagad kang Cristo. Kung ikaw dinayeg sa kalibutan, kung ingon-ana dili ka makapangalagad, wala ka nagaalagad kang Cristo. Dili, dili mo mahimo. Tungod kay, nakita n’yo, adunay pasipala nga pagaantuson nga nagauban Niini. Sa una pang kanunay nang nagapasipala ang kalibutan.

¹⁰³ Sa una pa, linibo nang mga katuigan ang nangagi, aduna na’y pasipala nga nag-uban Niini. Ug gitakda nang mamahimong Faraon si Moises niadto, siya na ang mamahimong sunod nga faraon, ang anak nga lalaki ni Faraon. Ug siya na ang mamahimong sunod nga faraon, nga gikagustohan sa mga tawo, ug bisan pa iyang “gitan-aw...” Nagakahulogan ang giisip nga—nga “gitan-aw.” “Iyang gitan-aw ang pasipala nga pagaantuson alang kang Cristo nga labi pang dakung butang kay sa tanan nga mahimong maabut sa Egipto nga ihatag kaniya.” Atua na sa mga kamot niya ang Egipto. Apan, bisan pa, nga nahibalo siya nga ang pagpili sa dalanon nga iyaha ni Cristo usa ka pasipalang pagaantuson, apan nalipay siya kaayo nga masayran nga adunay butang sa sulod niya, nga nagpatan-aw kaniya nga kining pagduol kang Cristo, ang pasipala nga pagaantuson alang kang Cristo, diay, labi pang daku kay sa tanan nga garbo nga iyang—iyang gipanunod. Adunay siya’y panulundon nga anaa sa sulod niya nga labi pa kaayong daku kay sa kung unsay gihatag kaniya sa pang-gawas niyang punulundon.

¹⁰⁴ Oh, kung mamahimo unta nga mahisama kita niana sa karon, ug tugotan ang Balaang Espiritu nga dihogan ang kana nga anaa sa sulod kanato, kanang pagtoo, ngadto sa usa ka Diosnong kinabuhi, nga naihalad alang kang Cristo!

¹⁰⁵ Karon, sa ingon nianang pagtoo sama niini nga anaa kaniya, nakita niya, ug iyang gitan-aw kana nga pasipalang pagaantuson ingon nga usa ka kadungganan.

¹⁰⁶ Sa karong panahon, mahimong adunay moingon, “Hoy, usa ka ba sa niadtong mga tawo, kanila?”

“Ah, ah, bueno, ah.” Mora og naulaw ka niini.

¹⁰⁷ Apan gitan-aw niya kini ingon nga usa ka labi pang dakung bahandi kay sa tibuok kalibutan, tungod kay adunay butang nga anaa sa sulod niya nga makasulti siya og moingon, “Oo, ako—

akong giisip kini. Madungganon kaayo kini. Nalipay ako nga mamahimong usa kanila.” Kita n’yo? “Nalipay ako nga isipon ang akong kaugalingon ingon nga usa ka Hebreohanon ug dili nga usa ka Egiptohanon.”

¹⁰⁸ Kinahanglan nga mao sa gihapon ang igasulti sa mga Cristohanon karon. “Nalipay akong isipon ang akong kaugalingon ingon nga usa ka Cristohanon, ang dili pag-ambit sa mga butang nga iyaha sa kalibutan ug sa mga kagawian sa kalibutan. Dili lang ingon nga usa ka miyembro sa iglesia, kondili ingon nga usa ka natawo na pag-usab nga Cristohanon nga nagakinabuhi sumala sa Kasulatan. Bisan pa nga tawgon man ako, sa mga miyembro sa iglesia, ‘nga panatiko,’ sa gihapon ako—ako—akong ginaisip kana nga usa ka labing daku—labing dakung butang kay sa kung ako pa ang pinaka-inila nga tawo sa siyudad o sa nasud. Mas gustohon ko pa kana kay sa mamahimong Presidente sa Estados Unidos, o—o mamahimong hari sa tibuok kalibutan. Nakita n’yo? Ako—akong ginaisip kana ingon nga hataas, tungod kay ang Dios sa Iyang kalooy, sa wala pa ang pagkatukod sa kalibutan—sa kalibutan, nakita na ako, ug—ug gibutang ang usa ka binhi dinha, aron nga ang akong pagtoo makalupad ibabaw niining mga butang sa kalibutan. Ug karon Iya akong gitawag, ug akong—ginahatagan ko’g kamahinungdanon ang akong puwesto.”

¹⁰⁹ Sama sa giingon ni Pablo, iyang giisip ang iyang katungdanan nga may hataas nga . . . kita n’yo, ug, oh, nga gitawag siya sa Dios gikan sa pagka-batid nga magtutudlo sama ni Gamaliel. Apan tinawag si Pablo aron mamahimong usa ka halad alang kang Cristo. Kita n’yo? Mao sa gihapon karon.

¹¹⁰ Himatikdi, tungod sa ingon-anang pagtoo, wala gayud siya nagsalig sa iyang panglantaw, kung unsa ang iyang makita. Karon, wala siya’y nakitang unsa man didto kondili usa ka panon sa—sa mga tawong maglalapok, mga ulipon, mga binilanggo, mga ginapamatay adlaw-adlaw, ginapanglapdusan og mga latigo, gihimong kataw-anan, ang ilang relihiyong tinoohan, ing “mga panatiko.” Ug adunay usa ka faraon nga nagalingkod sa iyang trono, nga walay hibangkaagan o ming-ila sa bisan unsa man bahin sa ilang relihiyon. Wala siya’y hibangkaagan bahin niini. Usa siya ka pagano, busa iya lamang. . . Daw sa unsa ka hulagway sa karon! Ug atua kini, usa ka lahi nga relihiyon. Ug kung unsa nga kung—kung kining Moises, nga anaa na halos sa mismong lingkuranan sa presidente, o sa—o sa maong gamhanan nga tawo, nga si Faraon, aron pulihan kini sa puwesto sa adlaw sa kamatayon niini, ug nga usa na kini ka tigulang na nga tawo. Ug bisan pa man gihunahuna ni Moises nga kadtong pagtawag. . . Midungaw siya didto, sa mao rang bintana nga gidungawan ni Faraon, kay atua siya niadto sa balay niini.

111 Ug midungaw si Faraon ug nakita ang maong mga tawo nga nanggibayaw sa ilang mga kamot, ug manguha sila og latigo ug panglatiguhon ang mga niini hangtud mamatay tungod lang nga sila nagaampo. Pangdugsakon nila sila sa espada tungod lang sa ilang pagkapakyas, sa pagtuman diha sa unsa mang higayon, ug ginapatrabaho sila hangtud nga mangalup-og na ang ilang maniwang og tigulang na nga mga lawas, ug panghatagan lang sila og pagkaon nga dili moigo. “Bueno, mga wala sila’y pulos kondili usa ra ka panon sa mga panatiko, dili mahimong tagdon nga mga tawo.”

112 Ug sa gihapon si Moises, ang kadtong pagtoo nga atua kaniya, gitan-aw sila, ug miingon siya, “Sila ang mga tawong gipanalanginan sa Dios.” Amen. Gusto ko kana. Tungod nianang pagtoo, wala nadani ang iyang mga mata ngadto sa mga garbo sa Egipto, nadani kini sa saad sa Dios. Minglusot sa garbo sa Egipto ang makita sa mata niyang agila nga pagtoo. Siya, hinumdumi, nahimo na siya nga agila karon. Usa siya ka propeta, ug ang mata niyang agila nagapaibabaw niadtong mga butanga. Oh gusto ko kaayo kana! Huh! Sus!

113 Daw sa unsa sa makadaghan karon, sa karong panahon, nga ang mga Cristohanon nakasalig diha sa ilang mga sensiya, ug sa kung unsa ang ilang makita, o sa kung unsa ang ilang masabot, imbis sa ilang pagtoo, ang pagsalig diha sa kung unsa ang imong makita sa imong mata ug sa mga garbo. Sama kaninyong mga kababayen-an, kanunay ko kamong ginasultihan, mahitungod sa kinahanglan nga inyong ipataas ang inyong buhok, nga kinahanglan dili kamo mang-meyk-ap, kinahanglan manglihok kamo ingon nga mga gining ug nga mga Cristohanon. Motan-aw kamo diha sa kadalanan ug makita ang mga kababayen-an karon nga nagpamisti na’g imoral. Bueno, hunahuna ninyo, “Bueno, miyembro man siya sa simbahan, nganong dili ko man kana mahimo?” Kita n’yo? “Ug ginapaputlan niya ang iyang buhok, ngano—nganong dili ko man kana mahimo?” Bueno, mora og buutan man pud siya og maalam, ug may personalidad nga wala gani ako. Bueno, nganong dili ko man kana mahimo? Angay nga buhaton ko man pud kana.” Pagbuhaton mo kana, ginaparalisa mo ang imong pagtoo. Kita n’yo? Wala mo ginahatagan og higayon ang imong pagtoo nga motubo. Dinha ninyo sugdan, sama sa giingon ko na.

114 Adunay miingon, “Igsoong Branham, ang nasud, ang mga tawo, ginaila ka ingon nga usa ka propeta. Dili mo angay unta kasab-an silang mga kababayen-an nga sama niana, ug silang mga kalalaken-an, tungod niining mga butanga. Ikaw, angay mo unta silang tudloan kung unsaon sa—sa pagpropesiya ug pagdawat og mga gasa.”

115 Ingon ko, “Unsaon ko man pagtudlo kanila sa algebra sa dihang wala pa man gani nila nahibaloan ang ilang ABC?” Kita n’yo?

116 Karon sugdan mo lang dinha. Limpyohi ang imong kaugalingon aron nga sa paglakaw mo didto sa dalan Cristohanon ang itsura mo, bisan pa man, kita n'yo, ug dayon paglihok nga sama nga usa niini. Kita n'yo? Ug dili mo mahimo kini sa kaugalingon mo lang. Gikinahanglan nga mosulod si Cristo kanimo. Ug kung kana nga binhi anaa sa sulod dinha, ug kana nga Kahayag moigo niini, Mabuhi kini. Kung dili man kini Mabuhi, wala gyu'y unsa man dinha nga mahimong Buhion. Tungod kay, tinuod nga napamatud-an na kini diha sa uban, kita n'yo, Nabuhi kini dihadiha pagkaigo niini sa maong Kahayag.

117 Usa kana ka pagbadlong ngadto sa mga kababayenan, kahibalo ko, nga nagapaminaw niini nga teyp, o nga magapaminaw pa lang niini. Usa kini ka pagbadlong kanimo, igsoong babaye. Angay lang. Angay lang, tungod kay nagapakita kini. Dili mahinungdanon kanako kung unsa na'y imong nahimo; mahimong relihiyoso ka sa una pa, sa tibuok mong kinabuhi, mahimo nga sa simbahan ka na nagpuyo, tingali ministro ang imong amahan, o usa ka ministro tingali ang imong bana; apan samtang nga ikaw wala nagatuman sa—sa Pulong sa Dios, nagapakita kini nga wala'y Kinabuhi dinha. Sa dihang makita mong napahayag na ang maong butang, ug ang Kinabuhi sa Balaang Espiritu, makita mo Kini sa dihang miabot Kini sa uban. Makita mo kung unsay ilang ginabuhat, kung ginahatud na Kini diha kanila. Dili ikatingala kon nganong . . .

118 Daw sa unsang—daw sa unsa nga pagbadlong sa kadtong mga Fariseo, nga gihinganlan si Jesus, sa diha nga mahimo Niyang hibaloon ang ilang mga hunahuna, gitawag Niya silang, “Beelzebu.”

119 Ug giingon niadtong gamay'ng bigaon, “Aba, kining Lalaki ang maong Mesiya. Nagaingon ang Kasulatan nga Iyang pagabuhaton kini.” Kita n'yo, atua didto ang kanang gikatakda nang daan nga binhi. Ug sa dihang giigo kini sa mao nga Kahayag, Nabuhi kini. Dili mo kini mahimong ipabilin nga nakalubong. Dili mo mahimong itago ang Kinabuhi.

120 Mahimo kang mokuha ug magbûbô og semento sa usa ka pundok sa sagbot, ug patyon kini sa panahon sa tigtugnaw. Pagkasunod nga tingpamulak, asa na ang halos sa imong mga sagbot? Anaa na palibot mismo sa kilid sa maong nag-uga nang semento. Tungod kay, ang kadtong buhi nga binhi ilalum niadtong bato, nga pagsugod sidlak sa adlaw, dili mo na kini mapugngan. Maningkamot kini nga makapangita sa iyang agianan didto ug molusot mismo pagawas niana sa kilid ug igitib pataas ang ulo niini ngadto sa kahimayaan sa Dios. Kita n'yo, dili mo mahimong itago ang kinabuhi. Pag-nasidlakan sa adlaw ang kinabuhi sa tanum, mabuhi gayud kini.

121 Ug sa dihang masidlakan sa Balaang Espiritu ang Kinabuhi nga nagasubay sa Kasulatan nga anaa sa usa ka tawo, mamunga

kini dinha sa iya mismong bunga. [Ginapalagitik ni Igsoong Branham ang iyang tudlo—Ed.] Kita n'yo?

¹²² Busa bisan kung unsa ka pa ka matinuuron ug matinud-anon, bisan unsaon mo pa pag-ingon nga dili ka ingon niana, ug ginaingon, nagasulti nga sila'y. . . Kining mga kababayan-an nga nagapangsul-ob niini—niining mga mahilas nga mga bisti ug ingon nianang mga butang didto, ordinaryo na nga hubo nga maglilingaw, diha sa dalan. Bisan pa, nga dili ka motoo nga ikaw ingon niana, dili mo mahimong ipatoo ang imong kaugalingon. Mahimo mong ipamatuud nga ikaw inosente sa pagpanapaw, apan, sa Libro sa Dios, ikaw nagapanapaw. Nag-ingon si Jesus, “Ang si bisan kinsa nga nagatan-aw sa usa ka babaye sa pagkaibog kaniya, nakapanapaw na uban kaniya sa iyang kasingkasing.” Ug gipresentar mo ang imong kaugalingon sa ingon nianang paagi. Kita n'yo, dili mo mahimong makita kini gawas kung kana nga Kinabuhi anaa dinha.

¹²³ Motan-aw ka sa uban, motan-aw ka ug moingon, “Bueno, kaila ko si Igsoon nga babayeng Jones. Si Igsoon nga lalaking Jones usa gani ka. . . Usa siya ka ministro. Ginabuhat sa iyang asawa ang *ingon niini* ug *ingon niana*.”

¹²⁴ Dili mahinungdanon kanako kung unsa may ginabuhat *niana*; Kini ang Pulong. Nag-ingon si Jesus, “Pasagdi nga ang pulong sa tanang tawo bakak, ug ang sa Ako matuod.” Ang Biblia kini. Ug sa diha nga masidlakan kini niana nga Kahayag, Mabuhi gayud kini. Kinahanglan nga Mabuhi gayud kini.

¹²⁵ Karon, ang mahait nga mata ni Moises, ang iyang matang-agila, milantaw nga lapos sa mga garbo sa Egipto.

¹²⁶ Ang matuod nga Cristohanong magtotoo karon, bisan kung unsa pa'y ginaingon sa iglesia, kung unsa pa'y ginaingon ni kinsa man; pag-nasidlakan na kini nianang Kahayag, makita nila ang pinaka-kapanghimatuuran sa Dios, nianang Haligi nga Kalayo nga atua didto, ug ang maong gisaad nga mga ilhanan ug mga kahibulongan, ang Kasulatan nga naipahayag, ug Mabuhi kini; bisan pa kung unsa ka diyutay kini, ug kung pipila lang ang anaa sa minoritya. Ang panon sa Dios sa una pa anaa na sa minoritya. Kita n'yo? “Ayaw kahadlok, gamay'ng—gamay'ng panon, kay mao ang nahamut-an sa inyong Amahan ang paghatag kaninyo sa Gingharian.” Kita n'yo? Nasabtan nila kini. Obligado ang Dios sa pagpasulod kanila gikan sa matag denominasyon, sa matag orden kung asa man, aron makita Kini, kung sila man gikatagana nang daan ngadto sa Kinabuhi.

¹²⁷ Tan-awa ang tigulang nga si Simeon, ang gitagana nang daan ngadto sa Kinabuhi. Sa pag-abot sa Mesiyas didto sa templo, diha sa porma sa usa ka bata nga anaa sa mga bukton sa inahan niini; si Simeon, atua sa usa ka lawak kung asa man, nga nagabasa. Gipatindog siya sa Balaang Espiritu, kay naghulat siya niadto. Anaa na kaniya kadto nga Kinabuhi. Ingon

niya, “Dili ako mamatay hangtud nga makita ko ang Cristo sa Ginoo.” Ug atua na sa templo ang maong Cristo sa Ginoo. Gigiyahan siya sa Balaang Espiritu gikan sa iyang buluhaton, pagawas, ug milakaw paingon didto ug gikugos ang kadtong bata, ug miingon, “Itugot na—itugot na nga ang Imong ulipon magabiya na nga malinawon, kay nakita na sa akong mga mata ang kaluwasan gikan Kanimo.”

¹²⁸ Adunay usa ka tigulang na nga buta nga babaye didto sa suok, nga gihinganlan og Anna, nga nangalagad sa Ginoo adlaw og gabii. Una na Niyang gisulti usab, ug ginasulung, “Paanhi na ang Mesiyas. Makita ko Siyang paanhi na.” Bisan pa, nga ang maong babaye buta. Sa mao mismong oras, sa dihang didto na Siya . . . Kadtong gamay’ng Kinabuhi nga atua sulod kaniya, nga una nang nagaingon, “Maatua Kini didto! Maatua Kini didto! Maatua Kini didto!” Dayon, ang mao ra nga Kinabuhi, ang maong Kahayag misulod sa bilding, diha sa porma sa usa ka Bata, ingon nga “usa ka anak sa gawas,” nga giputos sa Iyang lampin, nagapasaka na sa maong bilding. Ug miabot ang Balaang Espiritu niadtong buta nga babaye, ug miduol kini pinaagi sa Espiritu, gigiyahan paingon sa mga tawo, ug mitindog atubangan niini nga Bata; ug gipanalanginan ang inahan ug gipanalanginan ang maong Bata, ug nagsugilon kung mamaunsa ang umalabot Niini. Kita n’yo, gitagana nang daan ngadto sa Kinabuhi! Kita n’yo?

¹²⁹ Tan-awa sila, wala gani sila mag usa ka dosena. Aduna lang walo ka kalag ang naluwas sa adlaw ni Noe, halos wala kaayo, apan ang kadtong gitagana nang daan ngadto sa Kinabuhi nakasulod niadtong higayona. Tan-awa kung ginaunsa pagpamuhat sa Balaang Espiritu sa matag kapanahon, ginapaduol ang maong mga tawo.

¹³⁰ Karon nahibaloan nato nga ang pagtoo ni Moises ang nag-aghat kaniya aron bantayan kung unsa ang mahitabo, dili sa kung unsa na ang nahitabo. Tan-awa ang kaugmaon imbis ang sa karon. Tan-awa ang saad imbis nga sa mga garbo. Tan-awa ang mga tawo imbis nga sa organisasyon. Kita n’yo? Gihimo kana sa Dios.

¹³¹ Makita ni Lot ang mga garbo sa kauswagan didto sa Egipto, o didto sa Sodoma. Makita ni Lot ang mga posibilidad bahin sa—bahin sa . . . bahin sa pagkaaduna og dinaghan nga—nga kuwarta. Makita ni Lot ang kaus- . . . ang mga posibilidad bahin sa pagkalantaw niya didto sa Sodoma ug siya nga mamahimo tingaling . . . Ingon nga siya usa ka Hebreohanon, mamahimo siya tingaling usa ka bantugan nga tawo didto, tungod kay usa siya niadto ka inilang intelektuwal nga tawo, ug nga pag-umangkong ni Abraham, busa gipili niya nga moadto sa Sodoma. Ang pagkamaalam ni Lot ang nag-aghat kaniya nga makita ang garbo sa—sa kauswagan. Ang pagkamaalam ni Lot ang nag-aghat kaniya nga makita ang panalangin sa—sa mga garbo.

Apan, naparalisado na kaayo ang iyang pagtoo tungod niini, wala niya nakita ang kalayo nga mao'y magalaglag nianang matang sa pagkinabuhi.

¹³² Ug ingon niana na sa karon ang mga tawo. Nakita nila ang mga posibilidad nga mahisakup sa usa ka bantugan nga organisasyon, nakita nila ang posibilidad nga magkaaduna og taas nga kabutang uban sa mga tawo sa siyudad, apan wala nila nakita ang posibili-. . . Wala nila makita nga naparalisa na ang ilang pagtoo. Tugoti kong isulti kana'g otro aron nga dili kini masaypan pagsabot. Ang mga kababayen-an sa karon, sila, sa ginaingon ko na, gusto nilang—gusto nilang manglihok nga sama sa mga artista. Ang mga kalalaken-an karon gusto usab manglihok nga sama sa mga komedyante sa telebisyon.

¹³³ Ang mga magwawali sa karon mora og gustong himoon ang ilang mga kasimbahanan nga sama sa pipila ka matang sa modernong kapunongan, mga pagpamiembro ug uban pa. Nakita nila ang mga posibilidad nga mahimo tingaling usa ka obispo o usa ka tagdumalang pangkadaghanan, o unsa man nga sama niana, kung mouyon sila sa iglesia; nga ginasalikway na ang Kasulatan, sa dihang nakabuklad na Kini mismo sa ilang atubangan, nga bug-os napanghimatud-an na pinaagi sa Gahum sa Dios, ug pinaagi sa buhi nga Pulong sa Dios nga nagapuyo sa mga tawo. Bisan pa man, ayaw nila Kini. Ginaingon nila, “Ayaw namong mapasagol sa butang nga sama Niana.” Wagtangan niini ang ilang fellowship card. Tangtangan niini ang ilang orden pangdenominasyon. Bisan pa man matinud-anong tawo, sama ni Lot, nga atua sa Sodoma, nasayod nga sayup kana. Kita n'yo? Kita n'yo? Unsa may ilang ginahimo pag-ginabuhat nila kana? Ilang ginaparalisa ang gamay'ng pagtoo nga atua kanila. Dili kini magpulos.

¹³⁴ Karon, gisalikway kana ni Moises, ug iyang. . . giparalisa sa iyang pagtoo ang kalibutan.

¹³⁵ Mahimo nga ang pagtoo nga anaa kanimo ang moparalisa sa garbo, o kon dili ang garbo mao'y moparalisa sa imong pagtoo. Karon, kinahanghan nga pilion mo ang usa o ang laing usa. Ug makita mo ang Biblia nga wala nagausb. Wala nagausb ang Dios. Siya'y Dios nga wala'y pagkausab.

¹³⁶ Ug karon atong makita, sa karon, nga ang mga tawo niining panahona, kita n'yo, nagatan-aw sila dinagkung mga butang, sa dakung organisasyon. “Miyembro ako sa *Ingon-ani ug ingon-ana*.” Kita n'yo? Ug nagaadto sila didto, ug, tan-awa, wala'y kalainan kanila sa mga tawong kalye. Wala na'y butang nga uban pa. Aduna sila'y gamay'ng butang nga intelektuwal, ug mopadayon. Pagmohisgot ka mahitungod sa Balaanong pagpang-ayo, sa Haligi nga Kalayo, sa Kahayag sa Dios, moingon sila, “Panghunahuna lang kana.”

137 Usa ka lalaki ang mipunit sa larawan sa Manulonda sa Ginoo, sa miaging adlaw, usa ka ministrong Baptist, ug gikatawanan Kini. Kita n'yo, kana—pagpasipala kana. Kita n'yo? Wala na'y kapasayloan alang niana.

138 Mao kana kung unsay giingon ni Jesus, kita n'yo. Pagpasipala kini; sa dihang nakita mo na Kini nga nagapamuhat sa mismong mga buhat nga gibuhat ni Cristo. Ug nag-ingon Siya . . . Sa dihang, nakita nila kadtong mga buhat ni Cristo, Siya niadto ang maong Halad, ug ila Siyang gihinganlan og “Beelzebu, usa ka yawa,” kay, tungod nga ginabuhat Niya kadto. Ug karon ginaingon nila . . . Miingon Siya, “Ginapasaylo Ko kamo niana. Apan sa dihang moabot na ang Balaang Espiritu sa pagbuhat sa mao rang butang, nga magsulti kamo og usa ka pulong batok Niini, dili na gayud kamo arang mapasaylo, bisan niini nga panahon sa kalibutan o bisan niadtong umalabot.” Kita n'yo? Usa lang ka pulong ang kinahanglan mong maisulti batok Niini. Kita n'yo? Ug dayon . . .

139 Tungod kay, kung kanang Kinabuhia, kung ikaw gitagana nang daan ngadto sa Kinabuhing Wala'y Katapusan, kung ingon-ana kana nga Kinabuhi mogitib pag-nakita mo na Kini. Maila mo Kini, sama sa gamay'ng babaye didto sa atabay, ug—ug sa uban pa. Apan kung wala kini dinha, dili Kini Mabuhi, kay wala'y unsa man dinha nga mahimong Mabuhi. Sama sa ginaingon sa akong inahan sa una, “Wala ka'y makuha nga dugo sa usa ka singkamas,” tungod kay wala ma'y dugo sulod niini. Karon, ingon niana kini sa gihapon.

140 Ug ginaparalisa niini kung unsang gamay'ng pagtoo ang anaa kanimo. Makita ni Lot ang garbo, apan wala siya'y igong pagtoo aron makita ang kalayo nga magalaglag sa ingon niana nga garbo.

141 Ginahunahuna ko kung aduna kaha kita sa karon? Ginahunahuna ko kung kita kaha, bueno, sama sa mga kababayen-an nga gusto mamahimong inila, nga gusto manglihok sama sa—sa tanang uban pa nga kababayen-an sa iglesia, kung makita nila kana nga gusto nila nga—nga manglihok sama sa uban. Sila—makita nila ang mga posibilidad ingon nga usa—usa—usa ka mas matahum nga babaye, pinaagi sa pagpangmeyk-ap. Makita nila ang usa ka mas matahum nga babaye pinaagi sa pagkaaduna og usa ka mas batan-on nga hitsura, pinaagi sa pagpapatul sa ilang buhok ug paglihok sama sa pipila kanila, o sa artista. Apan ginahunahuna ko kung dili kaha kana nakaparalisa sa ilang pagtoo, ang mahibaloan nga ang Biblia nagaingon nga, “ang babaye nga nagabuhat niana usa ka maka- . . . usa ka makauulaw nga babaye,” ug, “ang usa ka babaye nga nagasul-ob og bisti nga iya sa lalaki, usa ka dulumtanan sa atubangan sa Dios,” mga karsones, ug uban pa, ug mga syort nga ilang ginapangsul-ob. Ug—ug gikubalan na kini og ayo hangtud nga nahimo na kining usa ka nakasagaran

nang buhaton sa mga tawo. Ginahunahuna ko kung wala ba nila ginaparalisa ang mismong gamay'ng pagtoo nga aduna kamo, bisan sa pag-adto sa simbahan, nakita n'yo. Ingon niana ang butang nga ginahimo niini.

¹⁴² Gibuhat kana ni Lot, ug giparalisa siya niini, ug giparalisa niini ang iyang mga tawo didto. Dili nila kini makita.

¹⁴³ Apan si Abraham, uban ang—ang gipanghimatud-an nga pagtoo, ang iyang uyoan, wala kini mitan-aw sa garbo, ayaw niyang makighilambigit niini, bisan pa nga gikinahanglan niyang manglimbasog ug manginabuhi alang sa iyang kaugalingon. Ug si Sarah nagpuyo didto sa kamingawan kon diin malisod ang pagpanginabuhi, didto sa yutang dili katubuan. Apan wala sila nagtan-aw sa garbo o sa mga posibilidad nga mamahimong inila.

¹⁴⁴ Si Sarah, ang pinakamatahum nga babaye sa yuta, mao'y giingon sa Biblia. Maanyag siya, ang pinakamaanyag sa tanang mga kababayan-an. Ug karon bisan niana nagpabilin siya ug nagmasinugtanon sa iyang bana, hangtud nga iya pa gani gitawag kini nga iyang “ginoo,” nga ginapahinungdan sa Biblia, hangtud diha sa—sa Bag-ong Tugon; nag-ingon, “Kang kinsa nga kamo iyang mga anak nga babaye, kung kamo masinugtanon sa pagtoo.” Kita n'yo, gitawag ang iyang bana nga iyang “ginoo.”

¹⁴⁵ Ug giduaw sa Manulonda sa Ginoo ang ilang templo ug . . . o ang ilang gamay'ng balongbalong didto, ug nagsulti kanila. Wala gani sila'y balay aron mapuy-an; nagapuyo lang sila niadto sa mga yutang dili katubuan. Ug didto tan-awa. Makita n'yo ba nga ang maong adlaw nahibalik pag-usab, eksaktong sama gayud kung unsa kini kaniadto?

¹⁴⁶ Karon, si Moises diha sa iyang dakung pagtoo, mao gihapon, nga makaingon “dili” ngadto sa mga butang sa karong panahon nga iya sa kalibutan sa karon, ug makahimo'g usa ka matarung nga pagpili. Iyang gipalabi nga antuson ang mga kasakit nga kauban ang katawhan sa Dios. Mas pinili niyang mouban niini. Ngano man? Tungod sa iyang pagtoo! Nakita niya ang saad. Nakita niya ang ulahing panahon. Nakita niya ang anaa sa kaugmaon, ug gipasinungtan na niya ang iyang pagtoo. Ug wala siya nanumbaling sa kung unsay nakita sa iyang mga mata sa mga posibilidad sa karon, nga siya ang faraon ug ang sunod na nga mahimong faraon. Diretso siyang mitan-aw sa kaugmaon.

¹⁴⁷ Oh, mahimo lang unta kana sa mga tawo, nga dili tan-awon ang sa karon nga kalibutan. Kung tan-awon mo ang sa karon nga kalibutan, mamili kang uban niini. Taboni ang imong mga mata sa mga niana, ug tan-awa ang saad sa Dios, didto sa kaugmaon.

¹⁴⁸ Makapamilya siya pinaagi sa iyang pagtoo. Gipili niya nga mahimong tawgon nga anak ni Abraham, ug gisalikway nga tawgon nga anak ni Faraon. Giunsa niya kini pagbuhat, sa dihang ang tanan nga gingharian. . . Gidaug niadto sa Egipto

ang tibuk kalibutan. Siya niadto ang hari sa kalibutan, ug usa pa ka batan-on sa edad nga kuwarenta ka tuig, nga ania nahiangam na sa paglingkod sa maong trono. Apan wala gayud niya gitan-aw ang iyang kaa- . . .

¹⁴⁹ Tan-awa ang mga kababayan-an nga nakapalibot kaniya niadto, adlaw-adlaw, hinugpong sila nga mga kababayan-an. Tan-awa ninyo ang kagarbohon; molingkod ug moinum og bino, ug motan-aw sa mga maglilingaw nga hubo sa atubang niya, samtang nanggisayaw kini, ug ginapaypayan siya sa . . . Ug mga kababayan-an nga gikan pa sa nagkalainlaing bahin sa kalibutan, ug mga alahas pa ug mga bahandi, ang iyang mga kasundalohan nga atua pa didto. Ang butang lang nga kinahanglan niyang buhaton mao ang paglingkod ug kumaon sa iyang lamiang pagkaon, ug moingon, “Ipadala ang . . . ipadala ang kasundalohan numerong *ingon-ani ug ingon-ana* didto sa *ingon-ani ug ingon-ana*, sakupa ninyo kana nga nasud. Siguro gusto ko lang kini.” Ingon-ana lang ang kinahanglan niyang buhaton. Maglingkod didto, ug paypayan nila siya, ug ablihan lang ang iyang baba; tugotan ang—ang mga maanyag, matahum nga hubo nga magsasayaw niadtong adlaw, paimnon siya og bino, hungitan siya sa iyang pagkaon nga nakaakbay ang ilang mga kamot palibot kaniya, ang tanan nga pinakamaanyag na nga mga babaye sa kalibutan. Ang tanang garbo nga aduna niadto, atua mismo nakapahimutang sa iyang tapad.

¹⁵⁰ Apan unsa ma’y iyang gibuhat? Gilingiw niya ang iyang panan-aw palayo niadto. Nasayod siyang nahiangam na ang kalayo alang niadto. Nasayod siyang nagahulat na ang kamatayon nianang linyaha. Kita n’yo? Nasayod siyang ingon gayud niana kini. Ug milantaw siya didto sa usa ka panon sa mga tinamay ug sinalikway nga katawhan, ug pinaagi sa pagtoo mas gipili niyang antuson ang pagpasipala alang kang Cristo, ug gitawag ang iyang kaugalingon, “Ako’y usa ka anak ni Abraham. Dili ako anak niining faraon. Himoon man ninyo akong usa ka obispo, o diyakono, o arsobispo, o papa, dili ako anak niining butanga. Usa ako ka anak ni Abraham, ug gipahimulag na ang akong kaugalingon sa maong mga butang sa kalibutan.” Amen, amen, ug amen! Pinaagi og pagtoo, nabuhat kana!

¹⁵¹ Gisalikway niya ang garbo. Gisalikway niya ang mga posibilidad ingon nga mao’y sunod na nga ma-obispo, iyang gisalikway ang—ang mga posibilidad ingon nga mao’y sunod na nga ma-arsobispo, og ang sunod nga pangkinatibuk-an nga tigdumala sa sunod nga piniliay, o unsa man kini, iya kanang gisalikway. Nagdumili siyang tan-awon kini.

¹⁵² “Karon, pagmahimo na akong obispo, magasulod ako ug ingnon na sa mga tawo, ‘Amahan nga Balaan,’ o—o ‘Doktor *Ingon-ani ug ingon-ana*,’ o—o—o ‘Elder *Ingon-ani ug ingon-ana*.’ Kung unsaon nga ilang, ang tanan nang mga ministro sa maong pagtipon-tipon, nga ila akong pikpikon sa likod,

ug moingon, ‘Oy, dong, aduna gyu’y butang kanang tawhana, sultihan ta ka. Oh, sh-sh-sh, hilum, ania na ang maong obispo, kita n’yo. Kung unsa may isulti niya, mao na kana ang balaod. Kita n’yo, ania na ang *Ingon-ani ug ingon-ana*.’” Manggibiyaha ang mga tawo gikan sa nagkalain-laing bahin sa kalibutan aron nga mamahimong. . . nga makita lang ang papa, ug nga mahalokan ang tiil ug ang mga singsing, ug uban pa. Daw sa, unsa ka dakung posibilidad alang sa Katoliko, daw sa unsa ka dakung posibilidad alang sa Protestante, nga mamahimong obispo o ang pang-kinatibuk-an nga tigdumala, o unsa man kini, ang mamahimong usa ka bantugan nga tawo sulod sa maong organisasyon.

¹⁵³ Nakalantaw, bisan pa man, apan, makita ninyo, ang mata sa pagtoo nagalantaw lagpas pa niana. Ug makita ninyo ang katapusan niini didto, nga, nagaingon ang Dios nga pagalaglagon ang maong tibuok butang. Ang pagtoo, kanang agilang mata, ipaababaw ka nga mas itaas pa niana, ug nga makita mo ang kaugmaon, dili ang karon, ug pilion nga pagatawgon nga anak ni Abraham.

¹⁵⁴ Si Faraon, nga walay pagtoo, nakita ang mga kaanakan sa Dios ingon nga “mga panatiko.” Walay pagtoo, gihimo niya sila nga mga ulipon tungod kay wala siya mahadlok sa kung unsa ang iyang giingon. Wala siya nahadlok sa Dios. Nagdahum siya nga dios siya. Gihunahuna niya ang iyang—iyang mga dios-dios nga gialagaran, nga siya usa ka obispo, nga siya ang punoang pang-kinatibuk-ang tigdumala, nga ang iyang mga dios-dios ang mao’y nagbuhat niadto. “Wala ra kining Butanga *dinhi*,” busa gihimo niya silang mga ulipon. Gikataw-an niya sila, gihimong kataw-anan sila. Sama sa ginahimo sa mga tawo karon, ang mao rang mga butanga sa tukma gayud.

¹⁵⁵ Nakita sila nianang pagtoo nga anaa kang Moises didto sa yutang saad, nga usa ka gipanalanginan nga katawhan. Mamahimong usa kini ka malisod nga pakigbisog ang dad-on sila ngadto sa maong saad, apan gipili ni Moises nga mouban kanila. Mahimo ko pa unta nga ibuklad kana, pero pahurot na ang akong oras. Kita n’yo?

¹⁵⁶ Himatikdi, mahimong usa ka malisod kadto nga butang nga usabon kadto nga mga tawo. “Kinahanglan nga mamuyo ka nga kauban kanila, kinahanglan nga mahimo kang usa kanila, ug sobra na sila ka intelektuwal nga dili mo na sila mapalihok pa. Kita n’yo? Pero kinahanglan nga adunay usa ka butang nga mahitabo didto. Kinahanglan nga adunay usa ka supernatural ang mapasundayag sa atubangan kanila. Mahimong malisod gayud kini nga butang. Pagadumilian ka sa mga organisasyon, ug kining mga butanga mamahitabo. Kini—pagkalisora niini, kung unsa ang kinahanglan mong buhaton, apan gikinahanglan mong mamili.”

157 “Usa ako kanila.” Oo. Ang iyang pagtoo mao’y nagpahimo niana. Misila ang iyang pagtoo. Oo, sir. Nakita niya kadto. Malisod kadto nga butang ang dad-on sila paingon niadtong saad, pero iyang gipili nga ubanan sila, sa gihapon. Bisan kung unsa pa ang ilang gibuhay ngadto kaniya, ug kung giunsa nila siya pagsalikway, miuban siya sa gihapon. Migawas siyang kauban nila.

158 Karon nagalaum akong nasabtan na ninyo. Bueno. Ubanan mo sila, sa gihapon. Himoa, nga mahimong usa ka kanila, husto kana, tungod kay katungdanan mo kini. Mahimong usa ka malisod nga pakigbisog, ug daghan pa nga mahiagian, pero pagpadayon sa gihapon.

159 Apan gipangunahan siya sa iyang pagtoo aron pilion ang Pulong, ug dili ang garbo. Gipili niya ang Pulong. Mao kadto ang gihimo sa pagtoo nga aduna kang Moises. Sa dihang ginalantaw sa pagtoo ang labing kabus sa Dios. . . Hinumdumi, ania na ang maong garbo karon, ang kalibutan, ang kinatas-an, ang pagkahari sa kalibutan. Ug asa man ang gisaaran sa Dios? Atua sa yanang, mga maglalapok.

160 Apan sa dihang ang pagtoo, sa dihang malantaw sa pagtoo ang labing kabus sa Dios, isipon niini kini nga labi pang halangdon ug labi pang mahinungdanon kay sa pinakamaayo nga mahimong ipakita sa kalibutan. Oo, sir. Sa dihang malantaw kini sa pagtoo, sa dihang makita kini sa pagtoo, sa dihang ang maong pagtoo sa Pulong makitang nahipadayag ang Pulong, mas labaw pa kini sa tanang garbo ug pagka-arsobispo ug tanan nang uban pa nga mahimo mong hisgotan. Ang pagtoo ang nagahimo niana. Kita n’yo? Makita mo ang labing kabus, ang tinamay, ang sinalikway, ang kung unsa pa man niini; pasagdan mo na sa labing kabus na niining kahimtang, ug ang pagtoo bisan pa man isipon kana nga minilyon ka milyas ang kalabaw niini kaysa ang pinakamaayo nga mahimong ikapakita sa kalibutan. Amen! Sa ingon niana nato ginaawit kini nga awit, “Pagapilion ko ang dalan kauban sa mga tinamay nga gamay’ng panon sa Ginoo.” Kita n’yo? Oh, sus!

161 Kay, makita n’yo, makita sa pagtoo kung unsay gustong ipabuhay sa Dios. Oh, nagalaum akong mituhop kini. Wala nagatan-aw ang pagtoo sa kung unsa ang karon. Wala nagatan-aw ang pagtoo sa kung unsay *ania*. Nagatan-aw ang pagtoo aron makita ang kung unsay gusto sa Dios, ug nagapamuhat subay niini. Ingon niana kung unsay ginabuhay sa pagtoo. Makita niini ang kung unsay gusto sa Dios, ug kung unsay gusto ipabuhay sa Dios, ug dinha nagapamuhat ang pagtoo.

162 Usa ka pang-malagyoang panan-aw ang pagtoo. Wala niini ginapaubos ang lantawanan niini. Nakapunting kini sa pusilonon. Amen! Ang si kinsa mang hanas sa pamusil nasayod niana. Kita n’yo? Nga, kini pangmalagyoan. Usa kini—usa kini

ka teleskopyo. Usa kini ka largabista, nga wala mo gamita para magtan-aw-tan-aw lang *dinhi*. Wala mo gamita ang largabista aron tan-awon kung unsa nang orasa kini; kita n'yo, wala mo gamita kana. Apan gigamit mo ang largabista aron molantaw sa halayo.

¹⁶³ Ug ingon niana ang ginahimo sa pagtoo. Ginapunit sa pagtoo ang maong largabista nga iya sa Dios, pareho sila, ang maong duha ka bahin, ang Bag-o ug Daang Tugon, ug makita ang matag saad nga Iyang gisaad. Ug makita kini sa pagtoo didto sa halayo, ug pilion kana sa pagtoo bisan pa kung unsay ginasulti sa anaa sa karon nga panahon *dinhi*. Ginalantaw niya ang tumoy. Wala niya ginapaubos ang tan-awanan niya aron lantawon ang sa *niining* dapita. Nagalantaw siya didto sa unahan. Ginapabilin niyang nakasentro gayud ang puntinganan ngadto sa Pulong. Mao kana ang kung unsay ginahimo sa pagtoo. Mao kana ang pagtoo nga anaa sa tawong nagabuhat nianang mga butanga.

¹⁶⁴ Karon himatikdi, kung unsa ang gitawag ni Faraon, sa tawag, kung unsa ang gitawag ni Faraon nga *halangdon*, gitawag sa Dios kini nga “dulumtanan!” Mahimong giingon ni Faraon, “Tan-awa, Moises, ania, aba, ikaw na ang sunod nga faraon. Akong—ako nang ipasa kining setro diha kanimo pagnamatay na ako. Ipasa ko na kini nga setro. Sa imo na kini. Kita n'yo? Karon, halangdon kini. Mamahimo ka nang usa ka bantugan nga tawo, Moises. Ikaw na ang mamahimong obispo. Mamahimo ka nang ingon *niini*, *niana*, o *uban pa*. Ayaw kami pagbiyai. Pabilin ka *dinhi*.” Pero, nakita ninyo, gitawag niya kadto *halangdon*, ug giingon sa Dios nga usa kadto ka “dulumtanan!”

¹⁶⁵ Karon, kamong mga kababayen-an pamalandunga sa makadiyut, ingon man usab, kamong mga kalalaken-an. Kung unsa man ang ginatawag sa kalibutan nga *halangdon*, gitawag sa Dios nga “kahugawan.” Wala ba ginaingon sa Biblia, “Usa kini ka dulumtanan ngadto sa usa ka babaye nga magsul-ob og bisti nga iya sa lalaki”? Ug nagdahum kamo nga maantigo kamo sa paghimo niini. Kita n'yo? Ginapasundayag lang ninyo ang unod sa babaye para sa yawa, ug kana lang. Busa, ayaw buhata kana.

¹⁶⁶ Ug kamong mga kalalaken-an nga nagakinabuhi subay sa mga butang nga iya sa kalibutan, ug nakighugoyhugoy ug nakiggakus-gakus sa mga niini! Ug kamong mga kalalaken-an nga walay igong kaisog diha kaninyo aron paundangon ang inyong asawa ug mga butang sa paghimo niana, makauulaw kamo! Ug tawgon ang inyong kaugalingon nga mga anak sa Dios? Mas sodomanhon pang tan-awon para kanako. Kita n'yo? Dili aron pasakitan ang inyong mga pagbati, kondili nga sultihan kamo sa Kamatuoran. Matul-iron ang gugma. Ingon niana kini sa kanunay. Ang inahan nga dili moatiman sa iyang anak, ug tul-iron kini ug bunalan kini, ug ipamatuto kini, wala siya'y pulos nga inahan alang niini. Husto kana.

167 Karon, ug himatikdi kung unsay nahitabo karon. Nakita kini ni Moises, pinaagi sa iyang maong panan-aw. Ug giingon ni Faraon nga, “*Halangdon* kini.” Miingon ang Dios, “Usa ka dulumtanan kini.” Busa ang Dios . . . Gipili ni Moises kung unsa ang gisulti sa Dios.

168 Karon, himatikdi, makita sa pagtoo kung unsay gustong ipakita sa Dios kanimo. Kita n’yo? Makita sa pagtoo ang makita sa Dios.

169 Ug makita sa pagpangatarungan ug sensya kung unsa’y gusto sa kalibutan nga ipakita kanimo. Himatikdi ang pagpangatarungan, “Aba, sensya lang sa tawo kini. Kini lamang—ang hinungdan lang nga kining . . . Bueno, dili ba nga okey ra *kini* sa gihapon?” Kita n’yo? Eksaktong ingon niana gayud, sa dihang gamiton mo kanang mga sensya nga supak sa Pulong, kita n’yo, nan mao kana kung unsay gusto sa kalibutan nga makita mo.

170 Pero ang pagtoo wala nagatan-aw niana. Nagalantaw ang pagtoo sa kung unsa ang giingon sa Dios. Kita n’yo? Kahibalo mo, isalikway ninyo ang mga pagpangatarungan.

171 Mga pangatarungan, ang sensya sa pagpangatarungan, makita kung unsa ang gusto sa kalibutan nga makita mo, ang dakung denominasyon. Bueno, usa ka ba ka Cristohanon? “Oh, usa ako ka—usa ako ka Presbyterian, Methodist, Lutheran, ug Pentecostal, kung unsa pa. Usa ako ka *niini*, *niana*, o *uban pa*.” Kita n’yo, kana, mao kana ang mga sensya. “Miyembro ako ngadto sa nahaunang iglesia, nakita n’yo. Oh, usa ako ka Katoliko. Ako—usa ako ka *niini*, *niana*.” Kita n’yo, inyo kanang ginasulti. Karon, kana, ingon niana ang sensya. Gusto mong isulti kana tungod kay usa kini ka denominasyon, usa ka dakung butang. “Bueno, kami—kami—daghan kaayo kaming mga miyembro, halos, kay sa unsa mang iglesia dinhi sa kalibutan, kita n’yo. Kami . . .”

172 Apan aduna lamang usa nga tinuod nga Iglesia, ug wala kamo nagapamiyembro Niini. Natawo kamo diha Niini. Kita n’yo? Ug kung natawo kamo diha Niini, nagapamuhat ang buhi nga Dios Mismo pinaagi kanimo, ug ginapadayag ang Iyang Kaugalingon Mismo. Kita n’yo? Diha niana kon diin ang Dios nagapuyo, diha sa Iyang Iglesia. Ang Dios anaa sa Iglesia sa matag adlaw. Nagapuyo gayud sa Iglesia. Nagapuyo Siya sulod kanimo. Ikaw ang Iyang Iglesia. Ikaw mao’y Iyang Iglesia. Ikaw ang maong Tabernakulo nga ginapuy-an sa Dios. Ikaw ang Iglesia sa buhing Dios, ikaw mismo. Ug kung ang buhi nga Dios nagapuyo sa Iyang buhing linalang, kung ingon niana ang imong mga lihok iya sa Dios; kung dili man, wala ang Dios dinha kung ingon-ana. Dili ka Niya palihokon nga ingon niana, sa dihang ginaingon Niya sa Pulong dinhi, ang Iyang plano, “Ayaw’g buhata kana,” ug gibuhat mo kini sa gihapon. Kita n’yo,

sayup kana. Sa dihang ginasalikway mo kini, kung ingon niana nagapakita kana nga ang maong Kinabuhi wala kanimo. Kita n'yo? Husto kana.

¹⁷³ Ang pagtoo ang nagtultol kang Moises ngadto sa dalan sa pagkamasinugtanon. Himatikdi, gibuhat ni Moises. . . Adunay batan-ong Faraon, adunay batan-on nga si Moises, pareho silang may kahigayonan. Nakita ni Moises ang pagpasipala sa maong mga katawhan, ug giisip kini ingon nga labing dakung bahandi kay sa tanan nga aduna ang Egipto. Ug siya, nga giniyahan sa pagtoo, iyang gisunod ang kung unsay gisulti sa iyang pagtoo diha sa Pulong, ug gitultolan siya niini ngadto sa dalan sa pagkamasinugtanon, ug sa katapusan ngadto sa Himaya, sa kawalay-kamatayon, dili na gayud mamatay, diha sa Presensiya sa Dios. Ang talan-awon ug mga sensya, ang nagtultol, ug ang garbo, ang nagdala kang Faraon ngadto sa iyang kamatayon, ug sa pagkalaglag sa Egipto, nga iyang nasud, ug wala na gayud kini nakabangon pa sukad niadto.

¹⁷⁴ Mao gyud kana. Tan-awa *kini*, mamatay ka. Lantawa Kana, mabuhi ka. Karon mamili ka. Ingon niadto usab nga butang ang gipahimutang sa Dios sa atubangan nila Adan ug Eva, didto sa Tanaman sa Eden. Kita n'yo? Pinaagi sa pagtoo, kinahanglan nga mopili ka.

¹⁷⁵ Karon himatikdi, giagak sa talan-awon si Faraon padulong sa iyang kamatayon, ug padulong sa pagkalaglag sa iyang siyudad.

¹⁷⁶ Si Moises, pinaagi sa iyang pagtoo, wala gayud mahadlok kang Faraon. Kita n'yo? Dili niya ikasapayan kung unsay giingon ni Faraon. Wala niya tagda ang mahitungod kang Faraon, kung giunsa nga dili ikasapayan sa iyang amahan ug inahan ang ilang mga hulga. Sa dihang napamatud-an ni Moises ngadto kaniya, ug nga mao siya ang kadtong tawo nga mopahigawas didto sa Egipto. . . o pangunahan ang Israel pagawas sa Egipto, dili niya ikasapayan ang kung unsa ma'y giingon ni Faraon. Wala siya malisang kaniya. Amen, amen, amen! Nasabtan ba ninyo ang buot kong ipasabut? [Nagaingon ang kongregasyon, "Amen."—Ed.]

¹⁷⁷ Walay pagkahadlok diha sa pagtoo. Nasayod ang pagtoo mahitungod niini. Ang pagtoo, sama sa kanunay ko nang ginaingon, aduna kini og dagkung mga muskulo, ug mga balhibo sa dughan. Nag-ingon ang pagtoo, "Panghilum kamo!" ug ang tanan nanggihilum. Kana lang. "Nasayod ako kung asa ako!"

Ang uban kanila nanag-ingon, "Bueno, karon, tingali nasayran gayud niya." Kita n'yo?

¹⁷⁸ Pero kinahanglan mo nga mobarug ug ipakita ang imong mga muskulo. Kana lang. Ang pagtoo ang nagahimo niini.

¹⁷⁹ Himatikdi, wala sukad nahadlok si Moises kang Faraon human nga gipanghimatud-an sa Dios ang iyang pagkatinawag.

Sa dihang gitoohan ni Moises nga tinawag siya para niana, pero sa dihang giingon na gayud sa Dios didto, “Mao na gayud,” ug milugsong ug nagpasundayag sa atubangan ni Faraon, ug kanilang tanan, nga gipadala siya aron buhaton kadto, wala na sukad nahadlok si Moises kang Faraon.

¹⁸⁰ Himatikdi, gigamit ni Faraon ang iyang kaalam kang Moises, bisan pa man. Bantayi. Miingon siya, “Sultihan ko ikaw kon unsa, ako—ako magapakigsabut kanimo.” Human nga nakastigo na siya sa mga hampak, miingon siya, “Magapakigsabut ako kanimo. Panglakaw na mo alang sa usa ka gamay’ng pagsimba, sa tulo ka adlaw. Ingon lang niana ang kahalayo, ug ayaw na gayud pagpalayo pa.” Pero, kahibalo mo, ang... Mga sensya kadto ni Faraon nga nagasulti kaniya niana, kita n’yo, “Ingon lang niana kamo nga kahalayo, ug ayaw na gayud pagpalayo pa.”

¹⁸¹ Dili ba mao man usab kana ang aduna kita sa karon? “Kung magpamiyembro ka lang sa simbahan, okay na.”

¹⁸² Pero, kahibalo mo, ang pagtoo nga anaa kang Moises dili motoo sa “hangtud ingon lang niana” nga relihiyon. Ingon niya, “Manglakaw kaming tanan. Magpadayon kami hangtud sa tibuk panaw. Husto kana. Mopadulong kami ngadto sa yutang saad. Dili kami nga manggawas lang dinhi ug motukod og usa ka denominasyon, ug mohunong na. Magpadayon kami.” Amen. “Magpadayon ako padulong sa yutang saad. Nagsaad kanamo ang Dios.”

¹⁸³ Unsa na kadaghan nga Faraon ang aduna kita sa karon nga panahon nga nagatindog diha sa pulpito, nga mga pangulo sa mga organisasyon! “Karon, kung buhaton mo lang *kini* ug buhaton *kana*, kana lang. Bueno, kita n’yo, kutob lang niana.”

Pero miingon si Moises, “Oh, dili! Dili, dili! Dili, dili!” Kita n’yo?

¹⁸⁴ Ingon ni Faraon, “Bueno, nganong dili man? Kung magkaaduna kang ingon niana nga relihiyon, sultihan ko ikaw kung unsay imong buhaton, ikaw lang ug ang mga anciano ang moadto og mosimba, kita n’yo. Ikaw lang ug ang maong mga anciano ang moadto og mosimba. Kay, kamong tanan mahimo nga magkaaduna og ingon niana nga matang sa relihiyon, apan ayaw na kini dalha ngadto sa mga tawo.”

¹⁸⁵ Kahibalo ba mo kung unsay giingon ni Moises? “Walay mahibilin bisan gani usa ka koko sa mananap. Magpadayon kami hangtud sa tibuk panaw. Tanan kami manglakaw! Dili ako molakaw gawas nga sila palakwon. Ug, samtang nga ania ako, anaa ako sa imong mga kamot.” Amen. “Dili ako molakaw gawas nga palakwon usab sila, ug kana lang.” Oh, daw sa unsa ka maisogon nga alagad! Amen. “Gusto ko nga kuyogon ko sila. Tungod lang kay nakuha ko na kini, ug molingkod na ako ug ingnon, ‘Bueno, karon, okey na ba *kini*’? Dili, sir.

Gikinahanglan namo ang mga katawhan, usab. Ang matag usa kanamo manglakaw.” Amen. Miingon siya, “Dili kami manglakaw nga biniyaan ang mga karnero, o bisan unsa man, nga may nahibilin. Wala ni usa ka koko sa mananap ang mahimong ibilin. Tanan kami manglakaw padulong sa yutang saad.” Amen!

¹⁸⁶ “Kaming tanan! Kung ikaw man usa ka asawa, o ikaw man usa ka—usa ka katabang, o ikaw man usa ka tigulang na nga babaye, o usa ka batan-ong lalaki, o usa ka tigulang na nga lalaki, o unsa ka man, manglakaw kita, bisan unsaon pa. Wala ni usa kanato ang mabilin.” Amen. “Kitang tanan manglakaw, ug dili kita manghunong tungod sa unsa pa man nga butang.” Husto kana. Aha! Ang mga relihiyon nagkalalislalis na gayud didto, dili ba? Oh, sus!

¹⁸⁷ Dili, si Moises dili motoo niini nga “hangtud ingon lang niana” nga relihiyon. Dili, dili siya motoo diha niana. Huh-uh. Oo, sir. Oh, sus!

¹⁸⁸ Mahimo nato nga mopabilin diha sa tibuok adlaw, pero kinahanglan kong moadto na sa akong teksto pagkataudtaud ug sugdan na ang pagwali.

¹⁸⁹ Himatikdi, himatikdi kini, kung unsa ka maanindot! Oh, nagustohan ko kini. Abi ninyo, sa kaulahian, giingon ni Faraon, “Panglakaw na kamo!” Gihampak gayud siya sa Dios, pinaagi sa tingog ni Moises. Gikastigo Niya ang tanan na. Gihimo Niya ang tanan butang nga angay buhaton. Gipahunong Niya ang . . . gipasalop niya ang adlaw, sa udtong totok. Gihimo niya ang tanan og ang uban pa. Iyang—gipangitngit niya ang maong mga adlaw. Gipatungha niya ang mga baki, mga pulgas, kuto, ang tanang uban pa, kalayo, aso, ug ang kamatayon sa mga kaliwatan niini, ug tanan nang uban pa. Gihimo niya ang tanan hangtud, sa kaulahian, nga gikinahanglan na ingnon ni Faraon, “Panglakaw na kamo! Kuhaa ang mga inyo, ug lumakaw na.” Oh, sus! Dalaygon ang Dios!

¹⁹⁰ Nalipay ako’g maayo nianang tawo nga makahimo’g bug-os kaayo nga pag-alagad sa Dios hangtud nga niini, ang yawa, dili na makahibalo kung unsay pagabuhaton ngadto kaniya. Husto kana. Bug-os nga gituman gayud ang Dios hangtud nga ang yawa miingon, “Oh, sus, panghawa na mo! Ako—dili ko na gustong madungog pa kana.” Husto kana. Mahimo mo kini, sa ingon ka hingpit.

¹⁹¹ Tan-awa karon, kung—kung wala pa gipaluyohan sa Dios si Moises, nan nahimo na unta siyang kataw-anan. Apan atua didto mismo ang Dios, nga nagapanghimatuod. Ang tanan niyang gipang-ingon, nangatuman.

¹⁹² Ug gikinahanglan barugan ni Faraon ang iyang katungdanan, kay siya niadto ang obispo, kahibalo na mo, busa siya—kinahanglan siyang magpabilin didto. Dili siya

makapangulipas. Dili siya maka-ingon nga dili, tungod kay nagakatuman na kadto. Kita n'yo? Dili siya mahimong—dili siya mahimong makapangulipas niini, kay nagakahitabo na kini. Busa sa kaulahian miingon siya, “Oh, panglakaw na lang kamo! Dili ko na gustong madungog pa kamo. Panggawas na kamo dinhi! Kuhaa ang mga inyo, ug panglakaw na!” Oh, sus!

¹⁹³ Karon makita nato si Moises, dinhi, human nga nangahimo na sa Dios ang ingon na sa kadaghang butang alang kaniya, ug gipakita na kaniya ang ingon ka daghang mga ilhanan ug mga katingalahan. Karon, alang sa sunod nga mga kinse minutos, atong ipangplaster kini dinhi. Ug bantayi kina'g maayo. Miabot si Moises niining puntoha kon diin siya. . .

¹⁹⁴ Nag-ingon ang Dios, “Magauban Ako kanimo. Ang imong mga pulong mao'y Akong Pulong. Gipamatud-an Ko na kini kanimo, Moises. Ikaw, sa dihang wala'y langaw sa maong kayutaan, wala pa kini sa iyahang panahon, ug gisulti mo, ‘Magkaadunay mga langaw,’ ug nangabot ang mga langaw.” Paglalang kadto. Kinsa man ang makapangitngit sa tibuok yuta, gawas sa Dios? Miingon Siya, “‘Magkaadunay kangitngit,’ ug dihay kangitngit. Misulti ka, ‘Magkaadunay mga baki,’” ug ang mga baki mingsulod bisan pa gani sa balay ni Faraon, sa mga higdaanan, ug sa dihang napangtapok na nila ang mga niini diha sa dakung dinapog. Magbubuhat! “Ug nagsulti Ako pinaagi kanimo, Moises, ug—ug namuhat ang Akong Pulong pinaagi sa imong mga ngabil. Sa tinuod gihimo Ko ikaw ingon nga usa ka dios sa atubangan ni Faraon.” Oo, sir. “Akong gihimo ang tanan niini.”

¹⁹⁵ Ug ania miabot sila sa usa ka punto, nga may usa ka pagsulay nga miabot, ug misugod sa pagtuaw si Moises, “Unsa ma'y akong pagabuhaton?”

¹⁹⁶ Gusto kong himatikdan ninyo. Usa kini ka dakung leksyon dinhi karon. Nagustohan ko kini, kita n'yo. Kita n'yo, si Moises, kung husto ang pagbasa nato dinhi, nga si Moi- . . . Sa diha nga, ang maong mga kaanakan mingsugod na sa pagkahadlok, nakita nila nga giapas sila ni Faraon, diha sa pangangatungdanan.

¹⁹⁷ Gibuhat sa Dios ang tanan sa hingpit. Gipasugod na Niya sila karon sa ilang panaw. Natigum na Niya ang iglesia. Human na silang gipangtawag pagawas. Nagagikan sila sa tagsatagsa ka denominasyon. Nagkatigum na silang tanan. Miadto didto sa luyo si Moises, ug miingon, “Ginoo, unsa ma'y akong angay nang buhaton?”

¹⁹⁸ Ingon Niya, “Buena, buhata *kini*.” Sige, padayon lang. “Karon, Moises, nasayod ka na nga gitawag Ko ikaw sa pagbuhat niini.”

“Oo, Ginoo.”

¹⁹⁹ “Sige, isulti *kini*, ug mamahitabo kini,” ania na ang mga langaw. “Magsulti ka para *niini*,” ug ania na nagaabot. “Buhata

kini,” ania na kini nagaabot. Ang tanan na’y MAO KINI ANG GINAINGON SA GINOO, MAO KINI ANG GINAINGON SA GINOO, MAO KINI ANG GINAINGON SA GINOO! Ania karon siya napahamtang sa usa ka problema . . .

²⁰⁰ Ug miingon ang Dios, “Karon nga napahisugdan Ko na ang ilang panaw. Human na silang tanan napahigawas. Nahitigum na ang iglesia, mao nga gipasugod Ko na sila diha sa ilang panaw. Karon, Moises, dad-on mo na sila didto. Sa nasulti Ko na sa imo. Molingkod usâ ako ug mopahulay sa makadiyut.”

²⁰¹ Miingon si Moises, “O Ginoo, tan-awa ang nagapadulong, ania nagapadulong na si Faraon! Ang tanan nang katawhan . . . Unsa na ma’y angay kong buhaton? Unsa na’y angay kong buhaton?” Makita n’yo dinha, dili ba ingon niana gayud ang tawo? Oo, sir. Misugod na sa pagtuaw, “Unsa na’y angay kong buhaton?”

²⁰² Ginapakita kanato ni Moises dinhi, ang hingpit nga kinaiyahan sa tawo, nga gusto mo kanunay’ng ginapaluyohan ka sa Dios ug nga ginatulod ka ngadto sa usa ka butang. Karon, ingon niana kita sa karon. Gusto mo nga ang Dios, human nga nakita na nato ang tanan nga angay natong masaksihan, bisan pa niana gusto mo sa gihapon nga itulod ka pa sa Dios aron buhaton ang usa ka butang. Kita n’yo?

²⁰³ Nagkulang lang sa kadasig si Moises, miingon, “Dios, ako’y mangutana Kanimo, tan-awon kung unsa kaha Imong igaingon. Oo, oo, igasulti Mo kini. Bueno, sige, igasulti ko kini, usab.” Kita n’yo?

²⁰⁴ Apan ania siyang gikatakda nang daan sa Dios alang sa maong buluhaton, napamatud-an na nga Siya’y uban niya. Ug ania siya karon, miabot ang maong panghitabo, ug mituaw na siya dayon, “Unsa na ma’y akong buhaton? Ginoo, unsa na ma’y akong buhaton?”

²⁰⁵ Karon mahinumduman ninyo, nagpropesiya na siya niining tungora, kay nag-ingon na siya, “Kining mga Egiptohanon nga inyong makita sa karon, dili na ninyo makita pa.” Ug mituaw na siya dayon, “Dios, unsa na ma’y akong buhaton?” Kita n’yo? Diha nga human na gayud niyang nahimo didto ang maayo kaayong pagpropesiya. Nakita n’yo, nasulti na niya kanila kung unsa ang mahitabo. Kung ang Pulong sa Dios atua kaniya, atua gayud Kini kaniya. Ug sa dihang gisulti niya kadto, natuman gayud kadto. Kung unsa man ang giingon niya andam nang matatuman niadto, ug ania siyang nagatuaw, “Unsa na ma’y akong pagabuhaton?”

²⁰⁶ Oh, kung dili pa kana ingon niana ang tawo! Kung dili pa ingon niana ako! Kung dili pa ingon niana ako! Kita n’yo?

²⁰⁷ Napamatud-an na Niya, “Mamatuman kung unsa ma’y imong igasulti. Ako uban kanimo.”

208 Ug ania miabot sa kalit lang ang usa ka panghitabo. “Unsa na ma’y akong buhaton? Unsa ma’y angay kong buhaton, Ginoo? Oy, Ginoo, asa Ka na man? Oy, nadungog Mo kaha ako? Unsa na’y angay kong buhaton?” Ug human na Niya siyang gikatudlo, ug nga napanghipamatud-an na, ug nagpamatuod ug nga gipamuhat na ang tanan pinaagi kaniya. Ug ania nga, “Dios?” Oh, sus! Nagapakita lang sa tuman, nga gusto sa tawo nga magpahayahay lang ug pasagdan na ang Dios nga mao’y manlimbasug.

209 Ug, bisan pa nga, nasayod na siya nga dinihogan siya sa Dios alang niining buluhaton, aron buhaton kini, ug nga klaro nang gipanghimatud-an sa Dios ang iyang mga pagpahayag. Panahon na kadto aron nga ipagawas na ang maong katawhan. Ang Dios, pinaagi sa iyang mga milagro ug mga katingalahan, nahitigum silang tanan ingon nga usa na ka pundok. Nasundan ba ninyo ako? [Nagaingon ang kongregasyon, “Amen.”—Ed.] Gipangtigum silang tanan ingon nga usa na ka pundok, sa pagpanghimatuod sa iyang mga pagpahayag. Ingon niana ang giingon sa Kasulatan; ania ang ilhanan, ania na ang kamatuoran dinhi, ang tanan na nga iyang giingon. Dayon mianha Siya diha kanila ingon nga usa ka propeta. Sa tanang panahon, bisan unsa ma’y iyang gisulti, gipasidunggan kini sa Dios, bisan ang pagbuhat ug pagpatungha sa mga langaw, ug pagpatungha sa mga butang diha sa pagkaanaa. Ug ang tanan nga Iyang gisaad ngadto kaniya, ania gipangtuman Niya.

210 Apan gusto pa niyang hulaton ang MAO KINI ANG GINAINGON SA GINOO. Kita n’yo? Nasayran na niya unta nga ang kapanghimatuoran mismo sa iyang pagkatinawag mao na ang MAO KINI ANG GINAINGON SA GINOO. Ang iyang buluhaton nga siya’y gikatakda nang daan ngadto mao’y MAO KINI ANG GINAINGON SA GINOO. Masabtan ba ninyo kini? [Nagaingon ang kongregasyon, “Amen.”] Hum! Nganong naghulat pa man siya sa MAO KINI ANG GINAINGON SA GINOO?

211 Ang gusto niya, “Ginoo, unsa ma’y mahimo kong buhaton?” Ania na nadala ko na kining mga kaanakan dinhi, sa ingon na niini kalayo. Ania ang maong panghitabo, nagapaduol na si Faraon. Mangamatay silang tanan. Unsa na ma’y akong buhaton? Unsa na’y akong buhaton?” Hum! Hum!

212 Nasulti na niya kung unsa’y ilang pagabuhaton. Nasulti na niya sa eksakto kung unsa gayud, ang pagbuhat niini. Nasulti na niya ang katapusan sa mismong nasud nga diin siya gipadaku. Nagalaum akong nasabtan ninyo. [Nagaingon ang kongregasyon, “Amen.”—Ed.] Kita n’yo? Nasulti na ni Moises, “Dili na ninyo sila mamakita pa. Pagalaglagon sila sa Dios. Igo na ang panahon nga ila kamong gikataw-an. Pagalaglagon na sila sa Dios.” Nasulti na niya kung unsa’y mamahitabo sa mga niini.

213 Pagkahuman niadto, “Ginoo, unsa na’y angay kong buhaton?” Nakita n’yo ba ang tawhanong kinaiyahan dinha? Kita n’yo? “Unsa na’y angay kong buhaton? Magahulat ako alang sa MAO KINI ANG GINAINGON SA GINOO.” Oo, sir. “Tan-awon ko kung unsay igaingon sa Ginoo, dayon ako kining buhaton.” Huh!

214 Hinumdumi, adunay mitungha nga Faraon nga wala nakaila kang Joseph, kahibalo na mo, sa niadtong panahona, mismo niadtong panahona. Kita n’yo? Kita n’yo? Ug nagtindog mismo didto si Moises ug gisulti ang katapusan niadtong nasura.

215 Ug atua siya mismo sa maong punto kon diin nga andam nang mahitabo kini, dayon mituaw siya, “Unsa na’y angay kong buhaton, Ginoo? Unsa na’y angay kong buhaton?” Kita n’yo? Dili ba ingon niana man ang tawo? Dili ba tawhanong kinaiyahan gayud kana? “Unsa na’y akong buhaton?” Huh!

216 Human na siya niadto, nagpropesiya. Gipasadunggan na sa Dios ang tanan nga iyang gisulti, ug tinawag siya alang sa maong buluhaton, busa ngano man nga kinahanglan pa niyang isulti, “Unsa na’y angay kong buhaton?” Adunay panginahanglan niadto; anaa ra sa iya kadto aron litukon kini. Gusto sa Dios kang Moises nga ipapamuhat ang maong gasa sa pagtoo, nga Iyang gikahatag kaniya. Gipanghimatud-an na kadto sa Dios. Kadto ang Kamatuoran. Ug gusto sa Dios nga si Moises, nga makita sa mga tawo nga Siya nagauban kang Moises.

217 Ug siya, didto sa likod, naghulat siya, nagaingon, “Karon, Ginoo, bata pa man ako. Sultihan Mo usá ako karon.”

“Oo, pagabuhaton ko na *kini*. Aduna kanako ang MAO KINI ANG GINAINGON SA GINOO.”

“Igsoon, mao ba kana ang MAO KINI ANG GINAINGON SA GINOO?”

218 “Oo, mao ni,” Igsoong Moises, “kana ang MAO KINI ANG GINAINGON SA GINOO. Oo.”

219 “Sige, aduna na kanato kini karon, MAO KINI ANG GINAINGON SA GINOO.” Ug nahitabo gayud kadto. Wala gayud ni usa ka higayon nga napakyas kadto. Wala gayud napakyas sukad-sukad.

220 Ug ania kini karon sa maong panghitabo, mibalik na usab. Karon naipa-panaw na Niya siya. Nahitawag na ang iglesia pagawas, naipa-panaw na sila, ug padulong na sila didto. Ug misugod pagtuaw si Moises, “Ginoo, kini ba’y MAO KINI ANG GINAINGON SA GINOO? Unsa na’y angay kong pagabuhaton?” Bueno.

221 Gusto sa Dios kang Moises nga magkaadunay pagtoo, nga Iya nang napahiluna diha sa sulod, diha sa gasa nga klaro na Niya nga—nga napanghimatud-an. Klaro nang napamatud-an sa Dios kang Moises ug sa mga katawhan nga Siya gayud kadto,

pinaagi sa Pulong ug pinaagi sa nahitabo nang mga butang nga gikaingon nang mahitabo. Klaro kadto nga napaila. Dili na Siya kinahanglan nga mabalaka pa bahin niini. Kita n'yo? Dili na niya kinahanglan nga maghunahuna sa unsa pa man bahin niini, tungod kay human nang nahiklaro kadto. Nahimo na niya kining mga butanga. Ug napamatud-an na niya, pinaagi sa mga langaw ug mga pulgas, nga napatungha niya sa pagkaanaa ang maong mga butang pinaagi sa paglitok, nga ang Pulong sa Dios anaa gayud kaniya.

²²² Busa ania siya karon magapangutana pa kung unsa'y buhaton, sa dihang ang mga panghitabo atua na mismo sa iyang atubangan. Kita n'yo? Oh, sus!

²²³ Nagalaum ako nga motuhop kini sa sulod kanato, ug nga atong makita kung asa na kita. Kita n'yo? Dili ba nakapabati kini nga *ingon niana* na lang ka kadaku? [Nagaingon ang kongregasyon, "Amen."—Ed.] Ang mahunahunaan nga ginapakita ni Moises ang iyang mga kasaypanan, ug tan-awon kung unsa na kaha sa ato. Oo. Kita n'yo?

²²⁴ Ania siya, nagatindog didto, kita n'yo, nasayod nga nag-ingon ang mga Kasulatan nga mao na kadto ang gikatak dang oras ug ang adlaw nga mamahitabo kana, ug nasayod nga gikatagbo na siya sa Dios sa usa ka Haligi'ng Kalayo. Ug miadto Kini mismo didto sa atubangan sa mga tawo ug gipangbuhat kadto nga mga milagro. Ug ang tanan nga gisulti niya, nangatuman kini, bisan sa pagbuhat nga motungha ang mga butang. Ang pagbuhat sa mga butang nga ang Dios lamang ang makahimo, ginapakita nga ang iyang tingog mao ang Tingog sa Dios

²²⁵ Ug ania ang panghitabo kauban niadtong mga katawhan nga iyang ginaamuma, padayon nga ginadala ngadto sa yutang saad, ug dayon nga atua didto, nagatuaw, "Unsa na'y angay kong buhaton?" Mao kana ang tawo, nga gusto gayud . . .

²²⁶ Sama ni Igsoong Roy Slaughter, nagtoo ko nga anaa siya dinha sa gaway sa pultahan nagalingkod, nga nag-ingon kanako usa kahigayon niadto, mahitungod sa usa ka tawo nga adunay ginahimo nga butang kanako. Ug ingon ko, "Bueno, gihimo ko na *kini*, ug karon ingon niana na usab."

²²⁷ Ingon niya, "Igsoong Branham, pasagdan mo silang mosandig sa imong abaga sa karon, ug ugma pagapas-anon mo na gayud sila." Ug ingon niana ang tawo. Mosandig sa imong abaga sa karon, ug pagkaugma pas-anon mo na sila.

²²⁸ Mao gayud kadto, ingon niana kung unsa ang ginabuhay ni Moises. Kinahanglan nga pas-anon pa siya sa Dios human nga Iya na siyang gikatudlo ug gipamatud-an na kini nga buhaton kini. Ug gisulti na unta sa mga tawo, "Moises, isulti na ang pulong. Nakita ko na nga nahimo mo kini *didto*. Gipasidunggan ka na sa Dios didto, ug mao pud ikaw sa karon." Amen. Kita

n'yo? "Buhata kini!" Amen. Nasayod na siya unta niini, apan wala niya gihimo. Bueno. Sama sa kung unsa kini kaniadto, mao usab kini sa karon. Nahibaloan nato, kana. Busa giingon Niya, "Moi- . . ."

229 Tingali napuno na ang Dios niini. Napul-an na gayud ang Dios niini. Miingon Siya, "Unsa man ang ginatu-aw nimo nganhi Kanako? Dili ba Ako nang gipamatud-an ang Akong pagpaila? Dili ba giingon Ko na kanimo nga gipadala Ko ikaw alang sa maong buluhaton? Wala Ko ba giingon na kanimo nga lakaw og buhata kini? Wala Ko ba gisaad nga Akong buhaton kini; nga Ako magauban sa imong baba, ug Ako magasulti pinaagi kanimo ug nga buhaton Ko kini, ug nga ikaw magapakita og mga ilhanan ug mga katingalahan? Wala Ko ba gisaad nga buhaton kini? Wala Ko ba buhata sa eksakto gayud, ug nga gilaglag ang matag kaaway sa palibot mo? Ug ania ka nagatindog dinhi karon, nianang Dagat nga Mapula, mismo diha sa maong pangatungdanan, sa kung unsa'y gisugo Ko kanimo nga buhaton, ug dayon sa gihapon nagasige ka'g singgit ug nagatuaw Kanako. Wala ka ba mingtoo Kanako? Wala mo ba nasabtan nga gipadala Ko ikaw aron buhaton kini?" Oh, kung dili pa ingon niana ang tawo! Sus! Busa napul-an na gayud Siya tingali niini.

230 Ug miingon Siya, "Nasayod ka nga aduna ka'y panginahanglan niini. Nasayod gayud ka kung dalhon mo na kining maong mga kaanakan ngadto sa yutang saad. Eksaktong ingon niana gayud. Wala na ka'y kaikyasana dinhing dapita. Wala na ka'y uban pang mahimo. Busa adunay panginahanglan. Unsa ma'y imong ginatuaw Kanako? Unsa pa ma'y ginahulat mo Kanako? Sa unsa man ang ginatawag mo Kanako? Dili ba gipamatud-an Ko na kini ngadto sa mga tawo? Dili ba gipamatud-an Ko na kini kanimo? Dili ba Ako'y nagtawag? Dili ba nga subay kini sa Kasulatan? Wala Ko ba gisaad nga pagadalhon kining katawhan ngadto nianang yutaa? Dili ba nga gitawag Ko man ikaw ug gisultihan ka na nga buhaton Ko kini? Wala Ko ba ikaw gitawag ug nga naga-ingon nga gipadala Ko ikaw aron buhaton kini, nga dili ikaw kadto, Ako kadto? Ug mokanaug Ako ug nga maanaa Ako sa imong mga ngabil, ug nga bisan unsay imong igapamulong, panghimatud-an Ko kini ug pamatud-an kini. Wala Ko ba gibuhat kini?"

231 "Kung ingon-ana, nganong sa dihang dunay moabot nga unsang gagmay'ng butang, manglihok ka nga sama sa usa ka bata? Angay kang magpakalalaki. Sumulti ka sa mga katawhan," amen, "dayon pagpadayon!" Amen. Tan-awa. "Ayaw'g tuaw. Isulti!" Amen. Oh, gusto ko kana. "Unsa ma'y imong ginatuaw Kanako? Isulti lang ngadto sa katawhan ug pagpadayon sa imong tumong. Kung unsa man kini, kung balatian man kini, o kung unsa man kini, aron buhion ang patay,

o kung unsa man kini, isulti! Napamatud-an Ko na kini. Isulti ngadto sa katawhan.”

²³² Pagkadakung panambag! Pagkadakung panambag, oh, sus, sa niining hugna sa maong panaw sa kung asa na kita sa karon. Tan-awa kung asa na kita sa karon, oo, sir, anaa na sa maong Ikatulong Pagbira. Himatikdi, ania na kita mismo dinhi sa pultahan, sa Pag-abot na sa Ginoo.

²³³ Gidihogan na siya alang sa maong buluhaton, ug nagahulat pa gihapon sa MAO KINI ANG GINAINGON SA GINOO. Mahimong napuno na gayud ang Dios niini. Miingon Siya, “Ayaw na pagtuaw pa. Isulti! Gipadala Ko ikaw.”

²³⁴ O Dios, unsa na ang angay kaha mahimong kahimtang niining Iglesia niining buntaga! Nga anaa na ang hingpit nga pagpanghimatuod sa Dios, pinaagi sa Haliging Kalayo ug ang mga ilhanan ug mga katingalahan, nga ang tanan susama na gayud sa mga adlaw kaniadto sa Sodoma. Giingon Niyang mobalik kini.

²³⁵ Ania na ang kalibutan sa maong kahimtang niini. Ania na ang nasud diha sa maong kahimtang niini. Ania pa ang mga kababayan-an diha sa maong kahimtang. Ania pa ang mga kalalaken-an sa maong kahimtang. Ania pa ang iglesia sa mao nga kahimtang. Anaa na ang tanantanan. Ang maong mga elemento, ang mga ilhanan, mga flying saucer ug ang tanan na diha sa kawanangan, ug ang tanan na nga matang sa mga misterioso nga mga butang, ug ang dinaguok sa kadagatan, mga balud sa linog, mga kasingkasing sa tawong nangakuyapan, sa kalisang, panagkalibug sa panahon, kagul-anan sa kanasuran, nanibug na ang mga iglesia.

²³⁶ Ug ang maong tawo sa sala nagatungha na, nga nagatuboy sa iyang kaugalingon batok sa tanan; nga gitawag og Dios, siya nga nagalingkod sa templo sa Dios, nga nagapasundayag sa iyang kaugalingon, oh, sus, ug nga mianhi na niining nasud. Ug naorganisa na ang iglesia, ug ang tanan sa mga niini nanagkahiusa na, ingon nga mga babayeng bigaon sa inahan nga bigaon, ug ang tanan na eksaktong atua na gayud ngadto sa dalan sa pagkabigaon.

²³⁷ Ang pagkahimong bigaon, unsa man kini? Ang sultihan ang mga kababayan-an nga mahimo nilang pamutlan ang ilang mga buhok, sultihan ang mga kababayan-an nga mahimo nila ang pagpangsul-ob og mga syort, sultihan ang mga kalalaken-an nga mahimo nilang buhaton *kini* ug mahimo nilang buhaton *kana*; ug ang mga magwawali, nga ilang ginahimo *kini*, ug nga usa ka ebanghelyong pangkatilingban ug ingon nianang mga butang. Dili ba ninyo makita, mao kini ang paghimo og pagpanapaw batok sa tinuod nga Pulong sa Dios!

²³⁸ Ug gipadala kanato sa Dios ang Iyang tinuod nga Pulong, nga dili maka-denominasyon, walay unsa mang kutay nga mga

higot ngadto Niini, ug nga gikahatag kanato ang Haliging Kalayo, ang Espiritu Santo nga nag-uban kanato karon sa mga katloan na ka tuig. Ug ang tanan nga Iya nang gikasulti ug gikaingon, eksaktong nangahitabo gayud subay sa Iyang pagkasulti.

²³⁹ Isulti sa katawhan, ug mopadayon na kita. Amen. Aduna kita'y tumong, kana ang Kahimayaan. Magpadayon kita paingon Niini. Padulong na kita ngadto sa Yutang saad. "Ang tanang butang mahimo ngadto kanila nga nagatoo." "Isulti sa katawhan. Dili ba nga gipamatud-an Ko na kini. Dili ba nagpahulagway pa gani Ako sa inyong taliwala, ug tanan nang uban pa, ug gibuhat na ang tanan nga angay buhaton, aron pamatud-an nga Ako uban kanimo? Di ba ang mga mantalaan, pipila pa lang ka mga semana ang nanglabay, gibalita na ang maong artikulo, sa dihang gisulti mo dinhi sa pulpito kung unsay mamahitabo dinhi, ug nga tulo pa ka bulan sa wala pa kadto mahitabo, ug nga atua kadto nagakahitabo na ug nga gipanghimatud-an? Bisan ang siyensiya nasayod mahitungod niini. Ug tanantanan nga gihimo Ko na, ug nagahulat ka sa gihapon. Isulti sa katawhan ug magpadayon na sa imong katuyoan." Amen.

²⁴⁰ Dili ba miingon man si Nathan kang David? Si Nathan, nga propeta, nagalingkod usa ka higayon niadto, sa makita si David ang dinihogan nga hari, miingon siya, "Buhata ang tanan nga anaa sa imong kasingkasing, kay anaa ang Dios uban kanimo." Giingnan si David, "Buhata ang tanan nga anaa sa imong kasingkasing. Anaa ang Dios uban kanimo."

²⁴¹ Dinihogan ni Josue aron kuhaon niadto ang yuta para sa Dios ug alang sa iyang katawhan. Hamubo ra ang maong adlaw. Gikinahanglan niya ang dugang pa nga oras alang sa maong buluhaton nga sa niini dinihogan siya ug nga gikasugo aron buhaton. Si Josue, usa ka tawong, dinihogan. Giingnan siya sa Dios, "Ingon nga Ako nag-uban kang Moises, mao man usab magauban Ako kanimo." Amen. "Kanang yutaa, igahatag Ko kini kanila. Ug gusto Kong moadto ka didto ug papahawaa ang mga Amalecahanon, ug—ug ang Heti- . . . Tanan—tanan nang uban pa, ang mga Filistehanon ug—ug ang mga Persehanon, ug tanan nang nagkalain-lain pa, papahawaon mo sila. Anaa Ako uban kanimo. Akong. . . Walay bisan kinsang tawo nga arang makasukol kanimo, sa tanang mga adlaw sa imong kinabuhi. Walay si bisan kinsang tawo nga makababag kanimo. Lakaw og sudla didto."

Ug gihulbot ni Josue kadtong espada ug miingon, "Sunod kamo kanako!"

²⁴² Ug nakaabot siya didto, ug ania siya karon nagapakig-away. Ug unsa na kadto? Giparut niya ang kaaway. Adunay gamay nga mga panon *dinhi* ug adunay gamay nga mga panon *didto*. Pag-

moabot na ang kagabhion, manggitipok silang tanan ug kauban nga manggikuta, ug mosulong sila nga usa na ka dakung puwersa batok kaniya. Ug pasalup na niadto ang adlaw. Gikinahanglan niya ang lugway pa nga kahayag. Pasalup na ang adlaw. Wala siya miluhod ug moingon, “Ginoong Dios, unsa may akong buhaton? Unsa may akong buhaton?” Gisulti niya! Aduna siya niadto og panginahanglanon. Misulti siya, “Adlaw, humunong ka!” Wala siya mituaw sa kung unsa man. Nagmando siya, “Adlaw, humunong ka! Nanginahanglan ako niini. Alagad ako sa Ginoo, nga dinihogan para niining buluhaton, ug aduna ko’y panginahanglanon. Humunong ka, ug dili ka ba mohayag. . . Ug, bulan, magpabilin ka sa imong nahimutangan,” hangtud nga nahuman niya ang pagpakig-away ug napanglatus niya ang maong tibuk butang. Ug ang adlaw mituman kaniya.

²⁴³ Wala na’y tuaw-tuaw pa. Gisultihan niya ang adlaw, miingon, “Humunong ka. Adlaw, hunong ka dinha! Ug, bulan, magpabilin ka sa imong nahimutangan.” Wala siya motuaw, “Ginoo, karon unsa may akong mahimong buhaton? Hatagi ko og lugway pa nga kahayag sa adlaw.” Nanginahanglan siya sa kahayag sa adlaw, busa gimandoan niya kini, ug ang adlaw mituman kaniya. Oh, sus! Gimandoan niya ang adlaw nga mohunong.

²⁴⁴ Si Samson, dinihogan, gipadaku, nga gikatakda nang daan sa Dios, nga gihatagan og gasa sa kusog, gikatakda nang daan nga mao’y mogun-ob sa nasud sa mga Filistehanon. Gikatakda nang daan, gipakatawo sa kalibutan, gidihogan sa Dios, aron laglagan ang mga Filistehanon. Ug usa ka adlaw naabtan nila siya didto sa kapatagan, nga walay iyang espada, walay bangkaw. Ug usa ka libo niadtong maong armado nga mga Filistehanon dungan nga minghasmag kaniya. Miluhod ba siya ug miingon, “O Ginoo, nagapaabot ako sa panan-awon? O Ginoo, unsa may angay kong buhaton? Tudloi ako karon sa kung unsay angay kong buhaton”? Nasayod siyang aduna siya’y panginahanglanon. Wala siya’y nakita gawas niadtong usa na ka daan nga bukog sa apapangig sa usa ka mula, ug gipamatay niya ang usa ka libo ka mga Filistehanon. Amen!

²⁴⁵ Wala gayud siya mituaw sa Dios. Gigamit niya ang dinihogang gasa kaniya. Nasayod siya nga gipadala siya alang sa maong buluhaton. Nasayod siya nga gipakatawo siya alang niana. Nasayod siya nga dinihogan siyang adunay usa ka gasa, ug gipamatay niya ang usa ka libo nga mga Filistehanon. Wala siya mohilak ngadto sa Dios. Gikatudlo na siyang daan sa Dios ug gipanghimatud-an nga mao siya, pinaagi sa uban pang mga butang nga nabuhat niya. Ug siya gipanghimatud-an, dinihogang alagad sa Dios, aron pamatyon ang mga Filistehanon, ug gihimo niya kini. Bisan unsa pa man ang kahintang niadto, gibuhat niya kini. Wala gayud siya nangayo sa unsa man. Buluhaton niya kadto. Nga, ang Dios nagapanglihok

pinaagi kaniya; gipudyot kadtong bukog sa mula ug didto gipangbunalan ang maong mga Filistehanon. Giunsa nga . . .

²⁴⁶ Aba, usa lang ka dukdok sa maong butang, usa sa niadtong mga tumbagang helmet nga usa ka pulgada ug tunga ang kabagaon nga sama niana, nadugmok na into kadtong bukoga ngadto sa minilyon kabuok. Ug gipangbunalan ang usa ka libo kanila, ug gipamatay sila, ug nagpabilin nga mao ra sa gihapon kini diha sa iyang kamot.

²⁴⁷ Wala na'y mga pagpangutana pa. Wala siya motuaw. Gilitok niya. Gipangparut niya sila. Oh, sus! “Buntogon ba ang Filistehanon, mahimo ko kaha nga buntugon ang mga Filistehanon, Ginoo? Akong—nahibalo ako nga gipadala Mo ako aron buhaton kini, Ginoo. Oo, Ginoo, nahibalo ako nga gipadala Mo ako aron laglagon kining nasud sa mga Filistehanon. Ania karon, napalibotan ako sa usa ka libu kanila, ug wala ako'y hinagiban ni unsa man. Unsa, unsa may buhaton ko karon, Ginoo?” Oh, sus! Walay bisan unsa man nga makapabalaka kaniya. Dinihogan siya sa maong buluhaton. Walay makapasakit sa imo. Wala, ni usa ka butang. Aleluya! Gigamit lang niya kung unsay atua kaniya ug gibunal kini ngadto kanila. Husto kana.

²⁴⁸ Sa dihang nalukong na siya sa kaaway, nanag-ingon, “Karon nalukong na nato siya sa mga pader, napalibotan na nato siya karon. Nalukong na nato siya sa sulod dinhi nga kauban niining babaye. Karon nasirado na nato ang pultahan, sa tibuok palibot, ug dili na siya makagawas. Nadakpan na nato siya.”

²⁴⁹ Wala magtuaw si Samson, “O Ginoo, nalukong na gayud nila ako sa niining denominasyon.” Huh! “Uh, Unsa may buhaton ko? Nakapamiyembro na ako kanila. Unsa may buhaton ko?” Wala gayud niya buhata kana.

²⁵⁰ Migawas lang siya, ug giguba ang maong pultahan, ug gipasan kini diha sa iyang abaga, ug milakaw palayo nga pas-an kini. Amen! Dinihogan siya alang sa maong buluhaton. Tinawag siya sa Dios. Wala siya malukong. Wala, gayud! Gidala niya mismo ang maong pultahan. Wala na siya miampo pa bahin niini. Wala niya gipangutana ang Dios kung buhaton ba niya kadto o dili. Atua na kadto mismo sa linya sa pangatungdanan. Amen, amen, amen! Diha mismo sa linya sa pangatungdanan. “Nganong motuaw pa nganhi Kanako? Isulti, ug pagpadayon!” Amen! “Ayaw'g hilak. Isulti!” Naghunong na siya sa pagmulo ug pagdanguyngoy karon. Igo na ang katigulangon aron makasulti. Husto kana. Nasayod siya nga ang iyang dinihogang gasa sa kusog mahimong patyon ang si kinsa mang Filistehanon nga moatubang kaniya. Amen.

²⁵¹ Apan dili pa kita kahibalo niana, kita n'yo. Mga gamay'ng bata pa kita sa gihapon, ug nga may babyron pa diha sa atong mga baba.

²⁵² Nahibalo siya niini, nahibalo siya nga napadaku siya alang nianang katuyoan, ug nga walay unsa mang makasukol kaniya, sa tanang mga adlaw sa iyang kinabuhi. Walay makabuntog kaniya. Gipadaku siya alang nianang katuyoan, sama kang Moises kaniadto. Walay makapugong kaniya. Walay Amalechahanon o kinsa pa man ang makapugong kaniya. Padulong na gayud siya sa yutang saad. Nasayod si Samson nga padulong na gayud siya.

²⁵³ Nahibalo si Josue nga makuha na niya ang maong yuta. Siya usa ka gipanghimatud-an. Gisaad na kini sa Pulong sa Dios, ug atua ang Espiritu Santo nga nagapanghimatuod niini.

²⁵⁴ Padulong na siya didto, mao nga wala na’y makapugong kaniya diha sa iyang dalan. Wala na, sir. Dinha na mismo sa maong katungdanan, uban ang Dios, wala na’y makapugong diha sa iyang dalan. Busa iya lang gisakwat ang maong mga pultahan ug gipas-an kini sa iyang abaga, nga may gingbug-aton sa mga upat o lima ka tonelada, ug mitungas didto sa kinaibabwan sa bungtod ug gilingkuran kini. Walay si bisan kinsa man ang mahimong mobabag diha sa iyang dalan. Aduna kaniya ang gasang dinihogan nga gikan sa Dios. Dili niya kinahanglan nga motuaw pa, “Ginoo, unsa may angay kong buhaton karon?” Dinihogan na siya aron buhaton kadto. Kadto na ang MAO KINI ANG GINAINGON SA GINOO, “Papason mo sila!” Aleluya! “Papason mo sila! Gipadaku Ko ikaw alang nianang katuyoan.” Amen.

²⁵⁵ “Unsa may angay kong buhaton, Ginoo? Uh, unsa na ma’y akong buhaton dinhi sa maong Dagat nga Mapula?”

²⁵⁶ “Dili ba gisulti Ko na kanimo nga naghatag Ko kanimo og usa ka ilhanan nga bukid dinhi? Pabalik ka na ngadto nianang bukira, ug pagadad-on mo kining mga kaanakan ngadto sa maong yuta. Dili ba gitawag Ko man ikaw tungod nianang katuyoan? Unsa pa ma’y imong gikabalak-an bahin sa kung unsa man ang mobabag diha sa dalan? Isulti, ug magpadayon na!” Amen ug amen! “Oo, gitawag Ko ikaw alang niining katuyoan.”

²⁵⁷ Si David, kahibalo gyud siya nga dinihogan siya, ug gipanghimatud-an na nga usa ka tawong tangigo. Nahibalo siya nga kahibalo sila nga tangigo gayud siya. Dinihogan si David. Nasayod siya niini. Ug sa dihang giatubang niya si Goliath, wala gayud siya motuaw, “O Dios, unsa na may angay kong buhaton karon? Kadyut lang, angay ba akong—ako. . . Nahibalo ako kung unsa na’y gibuhay Mo sa mga nangaging panahon. Imong, gitugotan Mo akong patyon ang usa ka oso, ug gitugotan Mo akong patyon ang usa ka liyon. Apan unsa man kining si Goliath nga atua didto?” Huh! Wala niya gayud buhata kana. Gisulti lang niya. Unsay gisulti niya? “Mamahisama ka kanila sa kaniadto, sa inyong mga mata.” Gisulti niya ug misulong na.

258 Wala na siya nag-ampo pa og usa ka pag-ampo. Wala na siya mohalad pa og unsa man. Nasayod siyang dinihogan siya. Amen. Dinihogan siya, ug nagpamatuod kadtong lambuyog sa maong husto nga matang sa butang. Aduna siya'y pagsalig diha sa pagkadinihogan niya. Aduna kaniya ang pagtoo nga mahimong giyahan sa Dios ang maong bato diretso mismo sa pinakatunga niadtong helmet didto, nga mao lamang ang dapit nga mamahimong ig-anan. Nagtindog siya didto.

259 Kahibalo siya nga tangigo siya. Amen. Nahibalo siya nga gibuhat siyang ingon niana sa Dios. Amen. Kahibalo gayud siya nga nakapatay na siya og liyon, kahibalo gayud siya nga nakapatay na siya og oso, apan tungod kadto sa panag-iyang sa iyang yutan-ong amahan. Ania karon ang gipanag-iyahan sa iyang Langitnong Amahan! Amen. Wala na siya moluhod, "Kinahanglan . . . Unsa may angay kong buhaton karon, Ginoo?" Nag-sulti siya ug miingon, "Mamahisama ka sa liyon ug oso, ug ania na ako." Amen! Dalayegon ang Dios! Oo, sir. Nag-sulti siya ug misulong aron tagbuon kining si Goliath. Oh, sus!

260 Bisan unsa pa ma'y iyang gidak-on! Usa siya ka gamayon, medyo mapula-pula nga bata, kahibalo na mo. Dili siya dakuon. Dili gayud siya kaayo gwapo kon tan-awon, gamay nga lalaking medyo bakuon ang abaga. Ang giingon sa Biblia nga mapula-pula siya. Karon, bisan unsa pa ma'y iyang kadakuon ug ang gitawag nga abilidad niya sa pagbuhat niadto.

261 Kahibalo mo, sa—giingnan siya sa obispo, miingon, "Karon tan-aw dinhi, anak, kanang tawhana usa ka batid nga teologo. Kita mo, usa siya ka manggugubat. Natawo siyang usa ka manggugubat ug usa siya ka . . . Manggugubat na siya, gikan pa sa iyang pagkabata; ug wala ka'y ikasarang batok kaniya." Ug miingon pa ang iyang mga igsoong lalaki, "O, pilyohon ka gayud. Mianhi ka lang para buhaton mo ang butang nga sama niana, pauli didto."

262 Wala kadto nakapabalaka kaniya. Ngano man? Nasayod siyang dinihogan siya. "Ang Dios nga nagluwas kanako gikan sa liyon, ang Dios nga nagluwas kanako gikan sa mga kuyamas niadtong oso, mas labaw pa niana nga Iyang, luwason ako sa kamot gikan nianang Filistehanon. Ania na ako. Ginatagbo ko ikaw diha sa Ngalan sa Ginoong Dios sa Israel." Amen. Wala na siya mag-ampo pa; human na siyang naiampo. Human na siyang naiampo sa Dios sa wala pa ang pagkatukod sa kalibutan. Nadihogan na siya alang sa maong buluhaton. Kinahanglan lang niyang isulti ug atubangon. Ingon lang niana ang kinahanglan buhaton niini, isulti lang ug atubangon. Oh, ingon lang niana ang kinahanglan niini tanan. Oh! Dili niya . . .

263 Ang mahitungod sa iyang mga makadenominasyon nga mga igsoon, silang mga tigbugalbugal nga atua didto, usab, kahibalo na mo. Oh, oo. Nanggitindog sila didto nga nagapanulti,

nanagbugalbugal ug nangatawa, ug nagsige'g sulti. . . Ang mga igsoon niyang lalaki, kahibalo na mo, ug moingon, "Ah, ah, ah, dili nimo mahimo. Ikaw, medyo pelyohon ka gayud." Wala siya matarug niadto bisa'g gamay. "Gusto mo lang magpalahi-lahi sa uban. Gusto mo lang manghinambog." Kung pagpanghinambog pa kadto, ingon na niana unta kadto sa una pa. Apan ila lang gitan-aw kadto sa intelektuwal nga bahin.

²⁶⁴ Nasayod si David nga naidihog na kaniya ang pangdihog nga lana. Amen. Wala na'y unsa mang mga kabilinggan diha kaniya. Miingon siya, "Kanang maong Filistehanon mamahisama na gayud niadtong oso ug liyon, mao nga ania na ako." Gisulti na niya daan sa wala pa kini mahitabo. Unsa ba'y iyang gihimo? Gipatay niya ang oso. Gipatay niya ang liyon. Gitumba niya ang maong liyon sa. . . Pinaagi sa unsa? Pinaagi sa—pinaagi sa lambuyog, ug mikuha og punyal, ug ang oso na dayon ang giatubang. Ang liyon, gipatay niya ang liyon pinaagi sa punyal. Ingon niana usab ang gibuhat niya kang Goliath. Gitumba niya siya pinaagi sa bato, ug gihulbot niya ang iyang espada, ug giputol ang mismong ulo niini, didto mismo sa atubangan niini. Unsa ba'y iyang gisulti daan sa wala pa kadto mahitabo? "Ug mamahisama ka usab sa ila." Ngano man? Gisulti na niya ang pulong nga mamahitabo kini, ug dayon mipadayon aron tumanon kini didto. Amen. Oh, igsoon! Gisulti na niya, ug gikontrola ang sitwasyon niadtong adlaw.

²⁶⁵ Kung aduna may panahon sukad nga angay nang sumulti ang tawo, kini na karon. Sa pagtapus, pipila na lang ka sunod nga mga minuto kung makapabilin pa kamo og pipila pa ka minuto. Aduna pa'y akong uban pang naisulat dinhi, pipila ka mga Kasulatan nga gusto kong hisgotan.

²⁶⁶ Wala gayud mituaw si Pedro, sa dihang natagbo niya ang usa ka lalaki nga may igong pagtoo nga mamaayo, nga naghigda didto sa pultahan nga gitawag og Matahum. Wala gayud siya miluhod ug nag-ampo sa pang-tibuok gabii nga pag-ampo, ug, o pang-tibuok adlaw nga pag-ampo, usa ka hataas, dugay nga pag-ampo, ug nga nagsulti, "Ginoo, ginaampo ko Kanimo karon nga Imong tabangan kining makalulooy'ng bakol nga lalaki. Makita ko nga aduna siya'y pagtoo. Nasayod ako nga usa siya ka magtotoo. Ug gipangutana ko siya, ug iya—iyang. . . Akong—akong—akong. . . Nagsulti siyang aduna siya'y pagtoo, nga pagatooan niya kung unsa ma'y igasulti ko kaniya. Ug gisulti ko kaniya ang mahitungod sa. . . mahitungod sa kung unsa ang gibuhat Mo, ug akong—nahunahuna ko lang karon, Ginoo, nga—nga. . . Mahimo Mo bang ihatag kanako ang usa ka MAO KINI ANG GINAINGON SA GINOO para sa iya?"

²⁶⁷ Wala, nasayod siya nga dinihogan siya nga apostol. Nasayod siyang sinugo siya ni Jesus Cristo. "Ayoha ninyo ang mga masakiton, banhawa ang mga patay, hinloi ang mga sanlahon, pagulaa ninyo ang mga yawa. Maingon nga nadawat ninyong

walay bayad, ipanghatag nga walay bayad.” Ang giingon Niya, “Pedro, lakaw buhata kana!” Dili na niya kinahanglan nga mag-ampo pa. Sinugo na Siya.

²⁶⁸ Unsa may iyang gisulti? Ingon niya, “Sa Ngalan ni Jesus Cristo!” Gilitok niya ang Ngalan ni Jesus Cristo, ug nga ang maong lalaki nakahigda gayud didto. Ug gikuptan siya sa kamot, ug miingon, “Tumindog ka!” Ug gigunitan niya siya didto hangtud nga nagkabaskog ang iyang buolbuol, ug sugod na siyang nakalakaw. Ngano man? Wala siya mag-ampo sa tibuok gabii. Wala siya motuaw ngadto sa Dios. Nakasiguro siya, gikan sa baba ni Jesus Cristo, nga dinihogan gayud siya alang sa niining maong buluhaton. Oo. Nagsulti siya ug iyang gipatindog, tungod kay nasayod siya nga dinihogan siya nga apostol alang sa maong katuyoan.

²⁶⁹ Ang mga tawo nga nahilandongan sa iyang anino wala gayud miingon, “O, ali, apostol Pedro, ug ipangaliya mo kami, ug iampo ang pag-ampo sa pagtoo alang kanamo, ngadto sa Dios.” Wala, wala, wala gyud nila gisulti kana. Nasayod sila nga dinihogan siya ug nga usa ka gipanghimatud-an nga apostol sa Dios. Mao nga miingon sila, “Ipahilandong mo lang kami sa iyang anino. Dili na kinahanglan mosulti pa og pulong. Nasayod na kami niini. Nagatoo kami niini.” Anaa ang Kinabuhi kanila! Dili mahimo sa maong apostol nga maabot silang tanan. Ug sila, sila mismo, kabahin sila niini.

²⁷⁰ Giingon ni Moises, “Dili lang ako ang molakaw. Kami tanan ang molakaw.” Tanan kami adunay pagabuhaton. Tanan kami kinahanglan nga madihogan.

²⁷¹ Ug nakita nila ang kadtong apostol nga atua didto nagatindog, ug nakita nga giayo niya ang maong lalaking masakiton ug nga ginabuhat ang mga butang nga iyang gibuhat. Nasayod sila nga dili siya makaduol kanila. Miingon, wala nila gisulti, “Pedro, ali ka ug—ug mag-ampo ka, ug hulata karon hangtud nga madawat mo na ang MAO KINI ANG GINAINGON SA GINOO, ug duol ngari og sultihi ako. Makita kung unsa ang ginaingon sa Ginoo.” Ang giingon nila, “Kung malandongan lang kami sa iyang anino, tungod kay ang mismong Dios nga atua kang Jesus Cristo anaa kaniya, ug makita namo ang mao rang nagapamuhat. Mao nga ilang gihikap ang sidsid sa bisti ni Jesus ug nagpahilandong sa Iyang anino, ug si Jesus anaa sulod niining tawhana. Kung mahilandongan kami nianang anino, mamaayo gayud kami.

²⁷² Ug giingon sa Biblia nga nangaayo ang matag usa kanila. Wala na’y binuntaga nga pag-ampo, nga nanag-ingon, “Ginoo, kung malandongan kami diha sa anino niining apostol?” Dili, nahibalo na sila niini. Miabot na kanila ang Kahayag. Nangapuno ang ilang mga kasingkasing. Nahipalihok ang ilang

mga pagtoo. Amen. Gitoohan nila kini. Nakita nila kini. Sa mga panyo ni Pablo, mao man usab.

Karon, sa pagtapos na.

273 Wala gayud mituaw si Jesus sa gidala nila ang giyawaan nga batang lalaki ngadto Kaniya, nga may patol, nga maglukso-lukso sa kalayo. Wala gayud Niya gisulti, “Amahan, Imo Akong Anak, ug karon gipadala Mo Ako dinhi aron buhaton ang *ingon ani-ug-ingon ana*, ug *ingon niini*. Mahimo Ko bang ayohon kining bataa?” Wala Siya magsulti. Ingon Niya, “Gumula ka kaniya, Satanas!” Gisulti Niya, ug naayo ang maong bata.

274 Sa dihang nahinagbo Niya si Legion, nga aduna sa sulod niini ang duha ka libu ka mga yawa, dili si Jesus kadto ang mitiyabaw. Ang mga yawa kadto ang nanggitiyabaw, “Kung pagulaon Mo man Kami,” oh, sus, “tugoti kaming mosulod nianang panon sa mga baboy.”

275 Wala gisulti ni Jesus, “Karon, Amahan, mahimo Ko ba kahang buhaton kini?” Gisulti Niya, “Panggula kamo kaniya,” ug nanggula ang mga yawa. Sigurado, nasayod Siya nga Siya ang Mesiyas.

276 Didto sa lubnganan ni Lazaro, upat na kini ka adlaw nga patay na. Miingon sila, “Kung ania Ka lang, Ginoo, wala unta siya namatay.”

277 Giingon Niya, “Ako ang pagkabanhaw ug ang Kinabuhi.” Amen! Dili sa kung asa, kanus-a, o giunsa. “Ang nagatoo Kanako, bisan pa siya patay na, mabuhi siya.” Amen. Nasayod Siya kung Kinsa Siya. Nahibalo Siya kung unsa Siya. Nasayod Siya nga Siya si Emmanuel. Nasayod Siya nga Siya ang pagkabanhaw. Nasayod Siya nga Siya ang Kinabuhi. Nasayod Siya nga nagapuyo Kaniya ang bug-os kinatibuk-an sa pagkalawas sa Dios. Nakita Niya ang yanong mga tawo didto, ug nakita Niya kung unsa kaniadto ang giingon Kaniya sa Dios nga buhaton Niya, ug atua na Siya. Miadto Siya didto.

278 Wala Niya gisulti, “Karon, hulát usá, moluhod sá Ko dinhi. Tanan kamo mangluhod ug mag-ampo.” Giingon Niya, “Nagatoo ka ba nga mamahimo Ko kini?” Amen. Gihangyo Niya kadto.

279 Dili Siya kadto; sila kadto. “Oo, Ginoo, nagatoo ako nga Ikaw ang Anak sa Dios nga moabot dinhi sa kalibutan.” Oh, sus! Dinha na Siya napaila. Aduna gayud dayon magakahitabo.

280 “Lazaro, gumula ka!” Gisulti Niya, ug migula ang usa ka tawo nga patay na. Dili nga, “mahimo Ko ba kaha?” Gisulti lang Niya. Sa dihang natagbo ang pagtoo, nahitabo ang maong butang.

281 Ginasulti Niya, gilitok Niya, ug ang buta nakakita na, ang bakol nakalakaw na, ang bungol nakadungog na, nanggitiyabaw ang mga yawa ug nanglayas, nabanhaw ang patay, og tanan na. Ngano man? Wala na Siya nga moampo pa. Siya ang dinihogan

nga Mesias. Siya kadto ang Mesias. Nasayod Siya nga Siya kadto. Nasayod Siya sa Iyang posisyon. Nasayod Siya kung unsa ang buluhaton Niya nga gikapadala Siya. Nasayod Siya nga ginapaila na Siya sa Amahan ingon nga mao ang Mesias, ngadto sa magtotoo. Ug sa dihang nahinagbo Niya kadto nga magtotoo nga adunay pagtoo, gilitok lang Niya ang Pulong. Napatlaag na ang mga yawa. Oo, Sir. “Isulti! Ayaw pagtuaw. Isulti!” Amen.

²⁸² Ug nahibaloan Niya ang gikahatag Kaniya sa Dios nga mga katungod, pero kita wala nasayod. Nasayod Siya kung unsa Siya. Kita wala nasayod.

²⁸³ Nalimtan kadto ni Moises. Nasabtan ni Samson. Nasabtan sa uban pa. Nasabtan ni Josue. Nalimtan ni Moises. Kinahanglan pa nga tawgon sa Dios ang iyang pagtagad alang niini. Gisulti Niya, “Nganong nagatuaw ka man nganhi Kanako? Gipadala Ko ikaw aron buhaton ang maong buluhaton. Isulti, ug pagpadayon sa imong tumong. Giingon Ko na kanimo nga moabot ka niining bukira. Dad-a sila nga mga kaanakan ug padayon ka nga magauna kanila. Isulti mo lang. Dili Ko igsapayan kung unsa man ang anaa sa imong dalan, pahawaa kana sa imong agianan. Gihatag Ko kanimo ang kagahum sa pagbuhat niini. Gilitok ko . . . Gilitok mo nga nanungha ang mga langaw ug mga pulgas, ug ang pagmugna, ug mga butang nga ingon niana. Karon sa unsa man ang imong ginatuaw nganhi Kanako? Nganong miduol ka man Kanako, nga ginatuaw kining mga butanga? Isulti lang ug himatikdi ang pagpanglihok niini, kana lang.” Oh, sus! Oh, daw sa unsa ko kagusto kini!

²⁸⁴ Ania, si Jesus, nga ang tanang gisulti Niya, gilitok lang Niya ang Pulong, ug nahimo kini. Gipanghimatud-an Siya og ayo sa Dios ingon nga Iyang Anak. “Kini mao ang Akong Anak nga Pinalangga nga Kaniya may kalipay Ako. Patalinghugan ninyo Siya.”

²⁸⁵ Tan-awa Siya. Gusto ko kini. Kung unsa ka maisugon, kung unsa ka halangdon Siyang mitindog sa atubangan sa Iyang mga kritiko. Amen. Gisulti Niya, “Gubaa ninyo kining templo, ug magaampo Ako sa Amahan ug aron makita kung unsay Iyang buhaton bahin niini?” “Gubaa kini nga templo, ug patindugon ko kini pag-usab, sulod sa tulo ka adlaw.” Dili nga, “Nagalaum Ako; Pagasulayan Ko.” “Pagabuhaton Ko kini!” Ngano man? Mao man ang gisulti na sa Kasulatan.

²⁸⁶ Ang mao rang Kasulatan nga nagsulti nga pagabanhawon Niya ang Iyang lawas, ang nagahatag kanato sa maong kagahum, sa Gahum. Amen! “Sa Akong Ngalan ilang pagulaon ang mga yawa, magasulti sila og mga bag-ong sinultihan; kung makakupot sila og mga bitin, o makainom man sila og bisan unsa nga makahilo, dili sila mangadaut; kung pagapandongan nila ang mga masakiton, mangaayo kini.”

Nganong nagatuaw man ka nganhi Kanako? Sulti, ug pagpadayon.” Oh, maisugon kong . . .

“Gubaa ninyo kining templo, patindugon ko kini pag-usab.” Oh!

²⁸⁷ Ug hinumdumi karon, (patapus na ta), Siya sa gihapon kadto. Siya kadto ang nagsulti, sa Juan 14:12, ang . . . “Ang nagatoo Kanako, magabuhat sa mao usab nga mga buhat nga Akong ginabuhat.” Husto ba kana? [Nagaingon ang kongregasyon, “Amen.”—Ed.] Siya kadto ang nagsulti niana.

²⁸⁸ Si Jesus kadto, sa Marcos 11:24, nga nagsulti, “Kon moingon ka niining bukid,” dili nga kon igaampo mo kining bukira. “Kon moingon ka niining bukid, ‘mobalhin ka,’ ug dili ka magduhaduha sulod sa imong kasingkasing, kondili nga toohan ang kung unsay imong gisulti mamatuman gayud, maangkon mo kung unsay imong gisulti.” Karon ikaw, kung ginasulti mo kini diha nga mapamasinun lang, dili kini mahitabo. Pero kon aduna sa sulod kanimo, nga ikaw—dinihogan ka alang sa maong buluhaton, ug mahibaloan mo nga kabubut-on sa Dios nga buhaton kini, ug nga isulti kini, mahitabo gayud kini. “Kon imong . . .”

²⁸⁹ Siya kadto ang nagsulti niini. “Kon kamo magapabilin Kanako, ug ang Akong mga Pulong magapabilin kaninyo, managpangayo kamo sa bisan unsa nga buot ninyo ug kini pagabuhaton alang kaninyo.” Oh, sus! Oh, sus! Nakuha ba ninyo unsay akong ipasabot? [Nagaingon ang kongregasyon, “Amen.”—Ed.]

²⁹⁰ Pasayloa kini, pero daw sa miabot na lang kini nganhi kanako. Kinahanglan kong isulti kini. Siya kadto ang nag-ingon, niadtong adlaw sa itaas didto, didto niadtong kakahoyan, “Wala ka’y mahimong dakpon.” Ug nagpatungha Siya og tulo ka mga squirrel nga nagkaatua didto sa among atubangan. Unsa man kini? Ang paglitok lang sa pulong, ingnon nga, “Mamaatua sila *didto*, ug *didto*, ug *didto*,” ug didto nagkaatua gayud sila. Siya ang nagbuhat niadto.

²⁹¹ Charlie, Rodney, Siya kadto ang atua niadto sa Kentucky; ug Nellie, Margie, ug kadtong uban pa kaninyo. Siya Kadto, ang mao ra nga Dios nga atua didto ug ang nakighinabi kang Moises, nga nag-ingon, “Nganong nagatuaw ka man nganhi Kanako? Isulti ang pulong!” Siya kadto ang nagpatungha kanila ngadto sa pagkaanaa. Siya kadto. Siya kini. Oh, sus!

²⁹² Siya kadto ang naghatag sa panan-awon mga usa na ka tuig ang milabay, nga nag-ingon nga moadto kita didto, ug sa niining Pito Ka Mga Selyo, ug kung unsa nga magkaaduna og usa—usa—usa—usa ka dakung dalogdog nga mao’y mopasugod niini, ug nga mahiporma kini sa usa ka piramide. Ug didto ang *Look* nga mag- . . . Gimantala kini sa *Life* nga magasin, nga nakasab-it na sa bongbong didto. Siya niadto ang nagsulti niana.

293 Siya kadto, niadtong gabhiona sa nagabiyahe ako niadtong dalana ug nga nakita ko kadtong dakung mamba nga bitin nga hapit nang tukbon ang akong igsoon. Ug miingon Siya, “Ikaw gihatagan og . . . gihatagan ka’g Gahum sa paggapus kaniya, o ni kinsa pa man kanila.” Siya kadto ang nag-sulti niana.

294 Sa akong ubanon na nga asawa nga nagalingkod dinha sa luyo: Kadto mao Siya ang nagsulti niadtong buntaga, nga nagpamata kanako didto sa maong lawak, ug nga nagatindog didto sa suuk, nga nag-ingon, “Ayaw kahadlok sa pagbuhat sa unsa man, o sa pag-adto sa bisan asa, o sa pagsulti sa unsa man, kay ang walay-pagkapakyas nga Presensiya ni Jesus Cristo anaa uban kanimo bisan asa ka man moadto.”

295 Siya kadto ang atua didto sa Sabino Canyon, mga tulo na ka bulan ang milabay, sa dihang nagaampo ako niadto, nga namalandong sa kung unsa niadto ang mahitabo. Nagatindog ako niadto, ug usa ka espada ang nahulog ngadto sa akong kamot, ug adunay miingon, “Mao Kini ang Espada sa Hari.” Siya kadto.

296 Siya kadto ang nagsulti kanako, “Ingon nga Ako nag-uban kang Moises, mao man usab nga igapadala Ko ikaw.”

297 Siya kadto ang nag-ingon kanako, traynta ka tuig na ang milabay, didto sa maong suba, ingon nga usa pa ka batan-on. Atua didto ingon nga usa ka batan-on pa nga magwawali, sa maong suba, traynta ka tuig na ang milabay, nga nagatindog niadto sa dihang miabot kadtong Kahayag, ang mao rang Haligi nga Kalayo, nga mikanaug gikan sa kalangitan ug nga atua didto, ug miingon, “Maingon nga gipadala Ko si Juan nga Bautista sa pag-andam sa unang pag-abot ni Cristo, ang imong Mensahe mao’y magaandam alang sa maong Ikaduha nga Pag-abot,” sa tibuok kalibutan. Unsaon man pagkahimo niini, nga ang kaugalingon kong pastor ginakataw-an ug gibiyay-biayan kini? Apan nahitabo kini sa ingon niana ka-eksakto gayud. Siya kadto ang nag-ingon niini. Oo, sir!

298 Oh, kung unsa nga Siya niadto ang nag-ingon diha sa pagpropesiya, sa maong panan-awon nga, “Magakahitabo kini.” Siya kadto ang nag-ingon nga, “Kung aduna ma’y usa kaninyo ang magapropesiya, o makakita og panan-awon, ug nga isulti kini, ug nga mahitabo kini; kung ingon-ana timan-i nga dili ná mao siya, Ako na kini. Anaa Ako kaniya.” Oh, sus! Daw sa unsa nga mapadayon ko pa, ug ingnon nga Siya kini, Siya kini, Siya na kini!

299 Siya kadto ang mikanaug, sa dihang gisultihan ko sila nga atua niadto ang Haligi nga Kalayo didto sa suba, ug dili nila matoohan kadto. Siya kadto ang atua didto sa kinataliwad-an, sa dihang ang kadtong magwawali sa Baptist, sa atubangan sa traynta ka libo nga mga tawo niadtong gabhiona, sa Sam Houston Colosseum, sa dihang nagpakuha sa Iyang hulagway

ang maong Manolunda sa Ginoo, nga atua didto. Siya kadto, ang mao sa gihapon kagahapon, karon, ug hangtud sa kahangturan.

³⁰⁰ Siya kadto ang nagsulti nang daan kung asa magakahitabo kining mga butanga. Siya kadto ang nag-ingon niini. Siya kadto ang nagpamuhat niining mga butanga. Siya ang mao sa gihapon kagahapon, karon, ug hangtud sa kahangturan. Gibuhat Niya ang tanan sa ingon ka eksakto gayud sama sa giingon na Niya nga Iyang buhaton kini. Amen.

³⁰¹ Nganong mohulat pa man ako? Gipanghimatud-an na sa Dios ang maong Pulong. Kini ang Kamatuoran. Mangadto na kita sa panaw. Manglakaw na kita. Magpadayon kita diha sa lakaw nga iya sa Ginoo, nga ginapadaplin ang tanang mga pagduhaduha, ang tanang kasal-anan. Hinloi ang balay, nusunsi kini.

³⁰² Sama sa giingon na sa panan-awon ni Junior Jackson, wala na gyu'y nahibilin pa nga unsa man kondili mga lamparahan; o ang iyang damgo, kung ania man siya nga nagalingkod dinha. Wala na gyu'y nahibilin pa gawas sa mga lamparahan, ug napalibotan ang mga niini og mga bughaw'ng sintas, diha sa maong damgo nga iyang gisugilon kanako sa miaging gabii. Oh, sus!

³⁰³ Igsoong Collins, ayaw kabalaka bahin niadtong isdaa. Puti kadto. Dili ka lang kahibalo kung unsaon mo kadto paggunit.

³⁰⁴ Ipadaplin na ang tanang uban pa nga supak Niini. Hinumdumi, Kamatuoran kini, bisan kung unsaon pa ka panatiko Kini kon tan-awon, ug kung unsa pa man, usahay. Magpadayon kamong kauban Niini. Ang Balaang Espiritu kini. Ang mao rang Dios nga nagbanhaw kang Jesus Cristo gikan sa patay, ang mao rang Usa nga mahimong isulti ang mga butang ngadto sa pagkaanaa, ang mao rang Usa sa gihapon niadtong mga adlaw ni Moises, ang mao ra gihapon sa karon.

³⁰⁵ Ang pagkatinawag Niya niining kaulahi pang panahon, gipanghimatud-an Siya. "Ingon sa nahatabo sa mga adlaw sa Sodoma, mao man usab kini sa Pag-abot sa Anak sa tawo." Gihimo Niya . . . Adunay Sodoma didto. Adunay usa ka Billy Graham ug usa ka Oral Roberts didto. Ug nagapadayon ang Iglesia, pinaagi sa mao rang mga ilhanan nga gikasaad Niya, sa parehong mga kahimtang, ug mao na gyud sila. Siya kadto ang nagsulti niini.

³⁰⁶ O Ginoo, hatagi ko og kaisog, mao ang akong pag-ampo. Tabangi ko, O Ginoong Dios.

Kinahanglan ko nang mohunong dinhi. Nagkaudto na gayud.

³⁰⁷ "Nganong nagatuaw ka man nganhi Kanako? Nganong motuaw pa man ka nganhi Kanako, sa dihang napamatud-an Ko na nga Ako uban man kanimo? Wala Ko ba giayo ang inyong

masakiton,” Kung ingnon pa Niya? “Wala Ko ba gisulti kaninyo ang mga butang nga nangahitabo sa ingon gayud ka eksakto? Dili kana mahimo sa inyong pastor. Ako! Dili siya makahimo; tawo ra siya. Ako kini, ang Ginoo,” kana ang Iyang igaingon. “Ako Mao ang nagbuhat niini. Ako Mao ang nagasulti kaniya nga isulti kining mga butanga. Dili nga siya kini. Tingog Ko kini. Ako Mao ang nagabanhaw sa inyong mga patay pag-namatay sila. Ako Mao ang nagaayo sa mga masakiton. Ako Mao ang nagasulti nang daan sa niining mga butanga. Ako Mao ang nagabuhat sa mga pagpangluwas. Ako Mao ang naghatag sa maong saad.”

³⁰⁸ Dios, hatagi ko’g kaisog sa paggamit nianang Espada sa Pulong nga Iyang gibutang sa akong kamot mga traynta ka tuig na ang milabay, ug nga kuptan kini ug magmartsa na paingon sa maong Ikatulong Pagbira, mao kini ang akong pag-ampo.

Iduko nato ang atong mga ulo.

³⁰⁹ Langitnong Amahan, nagkalangan na ang oras, apan nagkabililhon pa gayud ang Pulong. Sa dihang makita namo kini, Ginoo, sa matag higayon, ang walay-pagkapakyas nga Presensiya ni Cristo kanunay nagapakitagbo kanamo. Daw sa unsa ko Ikaw ginapasalamatan tungod sa Imong kaayo! Kung giunsa Mo kami pagluwas ug nahimong...ug nga gipanalanginan kami, daw sa unsa Ka namo ginapasalamatan tungod niini!

³¹⁰ Samtang nga gigunitan ko kining mga panyo sa akong kamot, Ginoo, kini ang mga tawong may pagtoo, nga ginatooan nila Kini. Hinaut nga ang matag yawa, matag balatian manghawa gikan niining mga tawo. Ug ginamandoan ko ang matag espiritu nga ania dinhi; nga dautan, ug nga dili iya sa Dios, ang matag espiritu sa sakit, sa tanang balatian ug mga kasakitan. Wala kami nagapahilandong sa landong sa tawo, nga okey man, apan napailalum kami sa landong sa Ebanghelyo, ang gipanghimatud-an nga Ebanghelyo.

³¹¹ Samtang nga nagapaanhi-paadto ang Haligi nga Kalayo niining maong bilding, ang mao rang Usa nga diha niana naglantaw ang Dios, ug nga sa niini nanggilihay ang Dagat nga Mapula, ug nga nakatabok ang Israel. Apan karon sa nagalantaw Siya, nawisikan kini sa Dugo sa Kaugalingon Niyang Anak, diha sa kalooy ug grasya. Hinaut nga magmasinugtanon kami. Hinaut nga undangon na namo ang pagsulti-sulti pa, og pagpangtuaw. Hinaut nga maamgo namo nga tinawag Mo kami alang niining maong buluhaton. Kini na ang oras. Ginasulti ko kini sa Ngalan ni Jesus Cristo, manghawa ang tanan nga sakit palayo niining lugara.

³¹² Hinaut nga ang matag lalaki ug babaye, nga nagapanawag sa Ngalan ni Jesus Cristo, ihalad ang ilang kinabuhi pag-usab karong adlaw. Ginahalad ko ang akong kinabuhi usab,

Ginoo, diha sa altar sa pag-ampo. Ginapaubos ko ang akong kaugalingon, ug gikaulaw ang akong kaugalingon ug ginayukbo ang akong ulo ngadto sa yuta kon diin Imo akong gikuha. Ginoong Dios, gikaulaw ko ang akong kaluyahon ug ang akong dili-pagtoo. Pasayloa kini, Ginoo. Hatagi ako'g kaisog. Hatagi kaming tanan ug kaisog.

³¹³ Mabati nako, nga sama ni Moises, nga pahigawas na kaming tanan. Ayaw namong mobilin og usa. Gusto namong dalhon ang tanan, Ginoo. Imo man sila. Ako silang ginaangkon para Kanimo. Panalangini kining mga tawo karon, Ginoo. Itugot kini. Ug panalangini ako, kauban nila, Amahan, ug nga mahimaya ang Imong Ngalan. Mamaimo ang Imong kahimayaan. Ihatag kanamo kining pagtoong Walay-Katapusan, Ginoo, samtang nga among ginahalad ang among mga kaugalingon nganha Kanimo karon.

³¹⁴ Ako, sa niining Biblia ug sa niining pulpito, ginatugyan ko Kanimo ang akong kinabuhi, Ginoo. Nagasandig ako sa matag saad nga Imong gikahatag. Nasayod akong mapamatud-an ang mga niini. Nasayod ako nga Kamatuoran ang mga niini. Hatagi ako'g kaisog sa pagsulti niining maong mga Pulong. Hatagi ako'g kaisog, Ginoo. Giyahi ako kung unsa ma'y akong pagabuhaton ug isulti. Akong ginatugyan ang akong kaugalingon nganha Kanimo, kauban niining iglesia, dungan niini, Ginoo, sa Ngalan ni Jesus Cristo. Amen.

My faith . . . up to Thee,
Thou Lamb of Calvary,
Saviour Divine;
Now hear me while I pray,
Take all my sins away,
O let me from this day
Be wholly Thine!

³¹⁵ Karon manindog kita, nga mahilumon, samtang atong ginalaylay kini. [Nagasugod na paglaylay si Igsoong Branham ug ang kongregasyon sa, *My Faith Looks Up To Thee*—Ed.]

. . . to Thee,
Thou Lamb . . .

Itaas nato karon ang atong mga kamot ngadto Kaniya.

O Saviour . . .

Ihalad ang inyong kaugalingon sa Dios karon.

Now hear me while I pray,
Take all my doubts away,
O let me from this day
Be wholly Thine!

³¹⁶ Karon sa dungan, nga nakataas ang atong mga kamot. [Ginasubli sa kongregasyon kini nga pag-ampo, paghuman ni Igsoong Branham—Ed.] Ginoong Jesus, [Ginoong Jesus,] ako na

karon [ako na karon] ginahalad ang akong kaugalingon nganha Kanimo, [ginahalad ang akong kaugalingon nganha Kanimo,] sa usa ka kinabuhing pagpangalagad, [sa usa ka kinabuhing pagpangalagad,] nga mas tuman, [nga mas tuman,] nga mas may pagtoo, ang ginapangamuyo ko [nga mas may pagtoo, ang ginapangamuyo ko] aron nga ako [aron nga ako] mamahimong usa ka mas kahimut-an nga alagad [mamahimong usa ka mas kahimut-an nga alagad] diha sa bag-o kong kinabuhi, [diha sa bag-o kong kinabuhi,] kay sa kung unsa ako niadto [kay sa kung unsa ako niadto] sa nangagi na nga kinabuhi. [sa nangagi na nga kinabuhi.] Pasayloa ang akong dili-pagtoo, [Pasayloa ang akong dili-pagtoo,] ug ibalik kanamo [ug ibalik kanamo] ang maong Pagtoo [ang maong Pagtoo] nga gitugyan sa makausa alang ngadto sa mga balaan. [nga gitugyan sa makausa alang ngadto sa mga balaan.] Akong ginatugyan ang akong kaugalingon nganha Kanimo, [Akong ginatugyan ang akong kaugalingon nganha Kanimo,] sa Ngalan ni Jesus Cristo. [sa Ngalan ni Jesus Cristo.]

317 Karon samtang atong ginaduko ang atong mga ulo.

While life's dark maze I tread,
And grief around me spread,
Be Thou my Guide;
Bid darkness turn to day,
Wash all my fears away,
Nor let me ever stray
From Thee aside.

318 Samtang atong ginaduko ang atong mga ulo karon. Medyo nabati n'yo ba nga ang Mensahe niining buntaga nakahatag og kaayohan kaninyo? [Nagaingon ang kongregasyon, "Amen."—Ed.] Nakahatag ba kaninyo'g kaisog? ["Amen."] Kung buot man ninyo, itaas lang ang inyong mga kamot ngadto sa Dios, moingon, "Dios, ginapasalamatan ko Ikaw." ["Dios, ginapasalamatan ko Ikaw."] Nahipataas ko ang duha ko ka kamot, tungod kay mabati ko gayud nga kini—kini nakatabang kanako. Nakahatag kini kanako og kaisog.

319 Ang pipila sa mga butang nga nasulti ko, wala nako pamalandunga nga isulti ko kadto, apan nasulti na kadto. Pagbadlong kadto kanako. Nakaplagaan ko ang akong kaugalingon nga wala sa dalanon nga abi ko nga atua ako, apan nakaplagaan ko ang akong kaugalingon nga nagatuaw na lang sa tanang panahon, imbis nga isulti.

320 Dios, tabangi ako, sugod niining orasa, nga mamahimo akong usa ka mas hinalad nga alagad.

321 Wala ako nagaampo sa ako lang. Nagaampo ako alang kaninyo, usab, aron, sa dungan, ingon nga usa lang ka Lawas ni Cristo, nga tinawag na pagawas sa kalibutan, nga nagapangandam na alang sa Yutang saad, nga hatagan ako sa Dios og kaisog nga isulti ang dalanon, ipahawan ang maong

dalanon aron nga dili ninyo masipyatan ang agianan. Isulti ko, kaninyo pinaagi sa grasya sa Dios, pagasubayon ko ang Dugoon nga mga marka sa tunub Niya nga Mao'y nauna na kanato.

Ug pas-anon ko kining hinalad nga krus,
 Hangtud mahatagan ako'g kagawasan sa
 kamatayon,
 Ug nga Makapauli na dayon, nga
 mapurongpurongan,
 May purongpurong Didto alang kanako.

³²² Among ginatugyan kini nganha Kanimo, Amahan, ang among mga paghalad, sa Ngalan ni Jesus Cristo, nga Imong Anak. Amen.

³²³ [Usa ka igsoong lalaki ang nagsugod sa pagsulti sa laing dila. Blangko nga bahin sa teyp—Ed.]

³²⁴ Ginapasalamatan nato ang Ginoo tungod niini. Maglakaw diha sa usa ka hinalad nga kinabuhi. Itugyan ang imong kinabuhi, ngadto sa pagkamalumo, sa pagkamainubsanon. Maglakaw diha sa Espiritu. Paglakaw, pagsulti, pagpamisti, pagpanglihok ingon nga mga Cristohanon, mapainubsanon, malumo. Ayaw pakyasa kini karon. Nagapakigsulti ang Tingog sa Dios pinaagi sa Pulong, nagapakigsulti pinaagi sa mga gasa. Sa dihang motungha ang usa ka gasa, adunay usa pa nga mopahayag niini, usa pa ka nagatungha nga gasa ug nga nagapahayag sa mao rang butang. Kita n'yo, sigurado kana nga tukma sa Pulong ug tukma sa takna. Uban kanato ang Dios. Daw sa unsa nato Siyang ginapasalamatan tungod niini! Karon kung ang atong. . .

³²⁵ Samtang nakaduko ang atong mga ulo, kung mahimo sa atong igsoong babaye nga hatagan kita'g tuno sa:

Take the Name of Jesus with you,
 As a shield from every snare;
 And when temptations around you gather,
 Just breathe that holy Name in prayer.

³²⁶ Lamang, buhata lamang kana, isulti ang Pulong ug isulti ang Iyang Ngalan. Kantahon nato karon ingon nga kita—ingon nga kita ginapapauli na.

Take the Name of Jesus with you,
 As a shield . . . and of woe;
 It will joy and comfort give you,
 Oh, take it everywhere you go.
 Precious Name . . .

³²⁷ Karon maglamanohay kita sa usa'g usa, ug ingnon, “Igaampo ta ka, igsoon, ug iampo mo pud ako.”

. . . Heaven;
 Precious Name, precious Name, O how sweet!
 Hope of earth and joy . . .


328 Karon nga nakaduko ang atong mga ulo, kantahon nato kining sunod nga garay.

Take the Name of Jesus with you,
As a shield from every snare;
When temptations round you gather,
Breathe that holy Name in prayer.

Precious Name, precious Name; O how sweet!
O how sweet!

Hope of earth and joy of Heaven;
Precious Name, O how sweet!
Hope of earth and joy of Heaven.

329 Karon nga nakaduko ang atong mga ulo, ug ang atong mga kasingkasing uban niini, sa pagkasayod nga si Jesus nag-ingon, “Ang nagapatalinghug sa Akong mga Pulong ug nga nagatoo Kaniya nga nagpadala Kanako, adunay Kinabuhi nga dayon ug dili na maapil sa Paghukom, kondili nakalabang na gikan sa kamatayon ngadto sa Kinabuhi.” Nahibalo nga kita, pinaagi sa grasya sa Dios, anaa kana sa atong kasingkasing; dala ang paghalad ngadto Kaniya karong buntaga, nga mangausab ang atong mga kinabuhi, sugod karong adlawa, nga mahimong mas positibo pa diha sa atong mga panghunahuna. Paninguhaon natong magkinabuhi sa ingon ka malumo ug pagkamapainubsanon, nga, nagasalig nga kung unsa ma’y atong ginahangyo sa Dios, igahatag Niya kini sa matag usa. Ug dili kita magsulti og dautan batok sa usa’g usa, o ni kinsa man. Igaampo nato ang atong mga kaaway ug higugmaon sila, buhati sila og maayo kadtong mga nagabuhat og dautan kanato. Ang Dios ang mao’y Taghukom kung kinsa ang husto ug sayup. Samtang nga . . .

330 Basi niini, ug nga nagduko ang atong mga ulo, hangyoon ko ang atong buutan nga higala, si Igsoong Lee Vayle, kung mahimo nga ipapauli na niya ang mga nanambong diha sa usa ka pag-ampo. Igsoong Vayle. 

NGANONG MITUAW KA? ISULTI! CEB63-0714M

(Why Cry? Speak!)

Kining Mensahe ni Igsoong William Marrion Branham, una giwali sa Ingles niadtong Domingo sa buntag, Hulyo 14, 1963, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2012 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org